

鎌倉史

傳

自八至
終十

リ 5

710

4 止



門 伊 5
號 710
卷 七



鎌倉史卷三十九

列傳第十四

佐々木秀義

子定綱經高
盛綱高綱

北越 東京

小川 弘著
村田直景校

佐々木秀義稱源三。近江蒲生人。世為佐々木地頭。秀義年十三。謁六條源大尉。大尉奇其才。賜鎧刀為假子。保元之役。從源左馬頭。攻白河殿。疾戰。平治之役。平重盛以鐵騎五百。攻郁芳門。秀義與鎌田政家。後藤基綱。波多野義通。三浦義澄。首藤俊通。齋藤實盛。岡部忠澄。猪股範綱。熊谷直實。平山季重。金子家忠。足立遠元。平廣常。關時員。片桐景重十六騎。

天野氏藏

從源義平擊敗之。左馬頭東走。秀義殿戰數卻敵。左馬頭得間脫。既而左馬頭被害。諸將變節。皆事平氏。秀義介然守節。落魄無以爲衣食。欲依姨夫藤原秀衡於陸奥。行抵相摸。訪澁谷莊司重國。自保元平治之役。秀義勇名聞天下。以故重國堅抑留之。以女妻之。於是州豪傑如大庭景親等。皆延爲賓友。秀義有四子。曰太郎定綱。曰次郎經高。曰三郎盛綱。曰四郎高綱。娶澁谷氏。生五郎義清。皆不治生產。射獵演刀。放游寄食。定綱客于宇都宮。經高寓于波多野。高綱游于京師。義清婿于大庭。而遣盛綱。事將軍于伊豆。及以仁王敗。景親歸自京師。受平氏旨。圖將軍。密語之。秀義。秀義遣定綱。馳告。

之將軍。且曰。天下之事。後者爲人制。後先之機。在今日矣。君盍早舉大事。時將軍方計畫舉義。見定綱大喜。謂曰。吾算未定。既傳播京師。若曠數日。則事愈露。今決意舉大事。先取八牧。天欲使吾掃清天下也。必克之。若命屬否塞。則轉死乎溝壑。將卜成否於一舉。卿幸留議。定綱請還取鎧仗。與諸弟俱來。將軍乃戒曰。又寓書招重國。定綱歸報父。且請重國。重國不從而沮之。秀義命諸子曰。四昆往矣。一季留。定綱等乃發。義清留與重國屬景親。及霸府建。秀義復爲佐々木地頭。養和元年。冬。源義經。足利義兼等。議欲逆平維盛于遠江。秀義料曰。聞維盛在近江。敗軍之餘。難可再舉。未知其期也。且源

藏人守尾張。彼安得踰而東哉。義經等乃止。維盛果不能出兵。元曆元年。富田家助。平田家繼等。起兵于伊賀伊勢。應平氏轉戰入近江。秀義發甲賀兵。逆賊于大原。勵衆督戰。得首九十餘級。而身亦陣沒。年七十三。四子皆建功於府下。獨義清後降。以父兄功免死。建永中。命掌啟行儀衛。官至隱岐守。定綱沈毅果敢。生長患難。而無傾險之態。折節下士。士皆重之。初將軍與定綱約期。而重國沮之。不爲給裝具。定綱曰。吾義不食言。遂率諸弟發。定綱經高跨瘦馬。盛綱高綱步從。遇秋潦道不通。後期一日。將軍疑其意中變。方悔恨。及見乃欣然也。又見其軍裝寒儉。爲之泣下。遂命與北條時政等乘夜

襲八牧。時政謂定綱曰。八牧監堤信遠。驍騎也。別居八牧北。子請當之。定綱許諾。命經高當前門。自與高綱出于舍後。經高入門射之。信遠知有敵。亦令其衆射之。自揮刀而出。經高舍弓交刃。定綱高綱繼至。斬信遠。馳援八牧屠之。石橋之敗。與諸弟走澁谷。將軍徇房總。入相摸。復起應之。從伐平維盛于駿河。又從入常陸。攻金砂城。疾鬪。累功拜檢非違使。左衛門尉。爲近江守護。建久初。衛京師。佐々木租入延曆寺者。會水滂多。逋負。僧徒奉日吉神輿來責租。毀牆垣。扑奴婢。定綱子定重麾兵禦之。傷二人。僧徒乃奉神輿入京師。誣奏定重放火斷橋。縱騎扼歸路。殺傷甚多。又馳使訴幕府。指定綱驍

騎五人爲兇首。將軍命提原景時入京師。多方營救。時朝廷事佛尤謹。凡獻山所請。曲意優容。於是詔流定綱于薩摩。子廣綱于隱岐。定重于對馬。定高于土佐。五人者下獄。山徒怒。猶未釋。朝議更追殺定重。梟首辛崎。後四年。會赦歸。將軍喜甚。執其手泣曰。吾報卿父子未終。卿則罹此難。悉復其故食邑。新增食邑七所。授隱岐地頭。近江長門石見守護。佐々木氏於是始强大。定綱元久二年卒。子廣綱。信綱著于時。廣綱襲近江守護。拜檢非違使。左衛門尉。後鳥羽上皇調爲西面。以勞增食。建保中。上皇幸日吉。廣綱從。有賊傷專當童。衆喧噪不能獲。廣綱袒朝衣射殺之。上皇褒之。授從五位下。幕府

增食。尋拜山城守。信綱拜左近衛將監。遷右衛門尉。娶北條泰時妹。爲其所親信。承久之役。從泰時犯京師。官軍拒宇治河。泰時命芝田兼義探津先涉。信綱在傍。卽起俱往。時雨水暴漲。溺死者九百餘人。信綱獨達中洲。信綱子重綱年十五。援父馬尾泅而涉。信綱命還乞兵於泰時。重綱往來水中。將命。觀者壯之。信綱遂濟河先登。王師敗績。調檢非違使。尋轉左衛門尉。叙從五位下。追論宇治河功。授數莊地頭。補近江守護。是役也。廣綱與從子久綱屬王師。拒東兵于大豆渡。聞大炊渡敗。衆皆遁去。久綱自書名於旗。留戰。曰。恨與懦夫共事。軍敗自殺。廣綱退守宇治。爲東兵所擒。斬于京師。廣綱季

子勢多伽。事仁和寺道助法親王有寵。親王送勢多伽于六波羅。遣使乞之。其母從之。哀訴痛哭。感動傍人。泰時原之。比出府門。信綱適至。謂泰時曰。狼子不可畜。終殺之。信綱後拜近江守。叙從五位上。爲評定。薙髮名虛假。屏居高野山。卒年六十二。子孫世居顯職。

經高。拜中務丞。爲淡路阿波土佐守護。宿衛京師。嘗犯法。以勲舊不問。正治元年。將軍薨。京師訛言。大和賊來犯。經高徵三州兵。都下騷然。上皇震怒。下幕府按治。貶爲庶人。削髮名經蓮。明年。使子高重齋書入鎌倉。分疏其寃。幕議釋罪。而不還食邑。經高入謝。偶當將軍忌月。經高齋親寫法華經。慶之。

影堂。作文奉祀。語甚酸楚。二世爲引見。還賜一邑。經高說往事。陳功勞。慷慨激烈。聲淚俱下。親與其事者。如和田義盛等。皆爲之墮淚。北條泰時謂父曰。經蓮食邑。皆軍功所賜。今既赦其罪。何不盡還之。且經蓮強禦之士。不宜使懷怨。不聽。經高既不得志於鎌倉。承久之役。奉詔詣上皇宮。參軍謀。遣子高重守勢多。高重死之。經高逃于鷲尾。泰時使謂之曰。勿死。將請命於鎌倉。經高曰。是勵我也。我何不自耻。執刀自屠。未殊。泰時遣轎召之。尤非告諭之意。經高快叫而絕。盛綱。初名秀綱。年十七。秀義遣之。事將軍於伊豆。將軍命安達盛長加首服。更今名。爲人銳果。有氣概。八牧石橋之役。皆

疾戰從源範賴徇山陽。時平行盛軍兒島。範賴進陣于藤戶。行盛見其無戰艦。呼招之。盛綱曰：「惟我不得濟。使豎子嘲笑。苟能濟之。雖隻騎足以奪其膽。」求得土人知淺處者。令標識之。且躍馬破濤而進。衆從之。擊走行盛。將軍手書褒之曰：「古來無雙。賞賜兒島。累功拜左衛門尉。爲伊豫守護。盛綱矜絜自喜。不附權貴。及將軍薨。號伊豫守護。上書曰：「事與時移。沉淪失所。不敢望新恩之榮。請還本管之地。不省。薙髮名西念。退居上野磯部。建仁元年。城資盛叛于越後。令越後佐渡兵伐之。不克。乃起盛綱督越後佐渡信濃兵伐之。盛綱適行散門外。使者來傳教。卽取馬於門側跨之而發。家人倉皇追及。

之。諫其輕易。盛綱曰：「不然。天慶之亂。藤原忠文爲追討使。方食。聞有召拋箸。遂入朝受節刀。不復還家。勇士忘躬殉國。何謂輕易也。遂倍道兼行。三日抵鳥阪。遣使告諭。不服。乃縱兵攻之。賊不能支。終屠之。月餘。越後悉平。建保中。命盛綱檢斷越後州事。兼參守護事。尋卒。盛綱幼事將軍。最見親信。八牧之役。獨留盛綱自衛。既而又遣援軍。後賜食邑於越後。越水多鰕魚。嘗從朝于京師。抵菊河。偶邑致鰕魚脯。執刀割食之。以爲美。使幼子并刀獻之將軍。將軍題歌盆背報之。其見親狎如此。子信實稱加地太郎。盛綱嘗與將軍博。信實時年十餘。侍傍。工藤祐經後來。無座。乃抱信實遷之。代居焉。信實志。

取石投祐經流血。因走出。不知所之。將軍使盛綱追之。不獲。盛綱叩頭謝曰。永斷父子之恩。立錐之地。不敢傳焉。將軍曰。第往謝祐經。盛綱曰。兒無狀。亡論于死罪。然非臣與祐經有怨。以子故。屈膝於儕輩。勇士之所耻。請賜幕下之慰諭。將軍可之。遣使諭旨。祐經曰。是臣之過也。童子所爲。本無纖介。況於其父乎。信實走就僧。薙髮名西仁。後承家承久之役。從北條朝時。由北道犯京師。河勾家賢據越後。願文山。信實擊敗之。林石黑諸族望風而降。信實弟盛季。官兵衛尉。攻鳥阪城。先登。

高綱機警。慷慨負節。便弓馬。少依姨。在京東吉田。負寔不能自存。欲事平氏。既而歎曰。昔大人與六條大尉。約爲父子。今吾雖貧。豈執役仇氏乎。以仁王敗。遽辭姨而東。旦日過野洲河原。遇控馬田父。高綱假其馬濟河。因殺田父奪馬。疾驅而東。石橋之敗。教諸將射馬斃。斃馬橫路。敵不能進。諸將多逃。將軍親殿射敵。高綱諫曰。臣等尚存。君何輕鬪。宜速去。臣請冒尊名以當敵。乃自稱源賴朝。以殿戰甚力。將軍顧曰。苟得志。則天下與卿共。元曆元年。將軍遣範賴義經討源義仲於京師。令曰。北軍阻我兵。必於宇治勢多。衆宜騎渡。乃悉出厩馬贈之。獨留二駿。曰。池月。曰。磨墨。池月最駿。梶原景季請得之。以先登。不許。賜磨墨。諸將皆發明。日。高綱自近江來謁。將軍

曰。卿宜便向京。今來何爲。對曰。臣赴戰不期生。欲一拜辭以親受指旨。馳三日乃達。馬已疲極。不得與諸將俱發。獨後至。今日將軍喜謂之曰。汝得善馬。能先登於宇治乎。曰。能。臣生長上流。識其淺深矣。乃賜池月。曰。景季請得之。而不與。汝宜記於心。高綱感謝曰。君聞臣未及戰而死。則先登爲人所奪也。聞尚在。則先登者臣也。拜舞而出。時諸將在浮島原。景季牽磨墨。而上高阜。誇示於衆。既而聞遠嘶聲。畠山重忠曰。池月聲也。何以來。衆不信。頃之。馬卒牽池月。從高阜下。過金鑣。噴白沫。仰而大嘶。聲如洪鐘。景季問曰。誰氏之乘。馬卒曰。佐佐木氏。景季曰。三郎乎。四郎乎。曰。四郎。於是景季大愠曰。不

許我而賜彼。公之寵彼有踰我者。我不圖遽如此。豈堪至恨。不如與彼死於此。乃按刀當道而候。高綱望見之。謂其騎曰。彼非源太平。殺氣滿面。殆爲池月也。景季呼曰。四郎久闊。無恙。鄙者見池月。卿所恩賜乎。高綱曰。否。吾馬疲不可用。欲就公。願請一聞。卿已得磨墨。至於月池。卿請之不能得。吾安得有請。因誘厩人竊之。他日蒙譴。子幸救之。景季色解。笑曰。噫。不竊何得。悔我不竊。乃與俱西。抵宇治河。自橘小島碇。爭先進。景季差先。高綱。高綱自後呼曰。源太馬帶緩矣。恐覆鞍。景季駐馬約之。高綱起躍而過。上岸大呼自名。兩軍觀者拊膺鳴。箠以贊歎之。遂爲先登第一。景季踵上。俱突北軍。逐北入

京師從義經護法皇六條宮。從攻福原。累功任左衛門尉。爲備前安藝等七州守護。既而高綱慨世路艱險。薙髮隱高野。高綱有兵略。諸兄皆不能及。建仁中。經高盛綱奉勅。提高綱子重綱等。攻延曆寺僧徒于金子山。高綱省二兄於路次。二兄盛稱重綱材武。高綱不答。熟視久之。二兄怪問其故。高綱曰。厚甲大弓。裝不稱身。是必不免。因說攻守略。經高盛綱從其言。皆驗。而重綱果戰沒。

野史氏曰。平治十六騎。皆當世雄傑之士也。然及左馬頭被害。皆低頭屈膝。改節事平氏矣。獨秀義舍利取義。卓然無所阿附。一朝勃然。攀鱗附翼。四子首建功於府下。皆爲時大臣。天之福善。何其速也。

鎌倉史卷三十

天之詔善阿其教也

鎌倉史卷三十一

列傳第十五

狩野茂光

加藤景員

子光員
景廉

狩野茂光伊豆著姓也世為押領使稱狩野介嘗與州人三
戶氏構兵各募勇士茂光得加藤景員父子由是兵威大強
加藤景員稱五其先加賀人景員為伊勢祭主大中臣能隆
家司調檢非違使殺人避讎于東二子曰光員稱太曰景廉
稱次並驍武茂光聞其名以妹妻景員嘉應中詔茂光督武
藏相摸兵討源為朝于大島茂光率景員等討平之將軍在

伊豆射獵之次。游狩野氏。茂光子親光。及外孫田代信綱等。皆勇猛。與景員二子。皆爲將軍所知。義旗之建。實倚其力。石橋之敗。茂光欲走甲斐。老而肥大。艱行步。顧親光曰。天乎。吾不能復行。顧佐公非常人。汝曹亟舍吾而從之。慎勿懷貳。乃自盡。景員追及將軍。請從。將軍諭散去。景員匿宮根山。不食三日。謂二子曰。吾老矣。生死不足慮。佐公非常人。汝曹亟去從之。努力奉之。遂入走湯山。剔髮爲僧。二子攬涕別。趨伊豆。爲土兵所逐。兄弟殊途走。至駿河。復相得。遂共匿富士山下。及時政引武田氏兵入駿河。復從之。與橘遠茂兵戰。光員斬一人。虜一人。景廉斬二人。虜一人。謁將軍於黃瀨河。將軍聞

茂光死。深悼之。以其子宗茂襲狩野介。光員景廉等。賜宅地于鎌倉。迎景員于走湯山。景員建久中卒。親光陸奧之役。攻厚樞城。先登死之。

光員元久中宿衛京師。後烏羽上皇擢爲西面授左衛門尉。從平賀朝雅討伊賀伊勢賊。以功增食。拜伊勢守。子光資爲兵衛尉。建保之亂。疾戰亂定。益食。承久之役。光員屬官軍守市脇。敗走。不知所終。

景廉膽勇善戰。茂光之擊大島。至則源爲朝旣自刃。倚柱不僵。狀如生。爲朝勇名震天下。衆環視莫敢近。景廉後至。突出斬其首。將軍遣茂光等襲八牧。約之曰。吾卜成否於斯舉。勝

則舉火留景廉及佐々木盛綱等自衛。既而火久不舉。將軍執眉尖刀。授景廉曰。夜戰利於長兵。卿以此斬兼隆。景廉抵八牧。戰方酣。塞堅不拔。景廉聯楯數枚。綴以絃。浮諸塹以渡。踰壘而入。立斬三人。有善射者。關屋八郎。自櫓上呼曰。吾所餘惟一矢。誰敢當之者。景廉謂家奴洲崎三郎曰。人無百歲壽。所重名耳。幸當義旗之初。汝能代吾死乎。洲崎感奮。佯稱景廉而進。中矢死。景廉突入斬關屋。進又殺一人。及寢。寢戶微開。見兼隆拔刀立燭影。乃脫胄冒於眉尖刀闖戶。如人窺戶狀。兼隆以爲敵至。擊之。誤入于楣。景廉乘虛舉刀斬兼隆。用燭縱火于屏障。以出。將軍望火舉大喜。黎明凱旋。提兼隆

首。呈將軍曰。天下可以卜也。石橋之役。將軍親殿射敵。景廉執將軍轡回走。復還斷後。由是益爲將軍所知。元曆元年。從範賴徇山陽。在軍遭病。強起入西海。人或止之。景廉曰。大丈夫死且不避。疾病何足言。寄書於父曰。兒蒙幕下之寵恩。嘗命侍左右。緩急之際。非臣子辭難之日。是以從役於西海。不幸罹病。勢日危殆。舍身殉國。不敢愛生。卽以病死。幸視爲死國。景員持書入白。將軍嗟悲。與書勞問。賜之鞍馬。謂速騎此歸。景廉夙被知遇。居常有病。將軍輒臨問焉。將軍伐陸奧。以武藏上野兵屬。景廉及葛西清重。擊金剛秀綱。攻厚樫城。疾鬪累功。任檢非違使左衛門尉。二世時坐與梶原景時善。褫

食邑。建仁之亂。殺仁田忠常。攻比企氏。先登。後削髮稱妙法。承久三年卒。子尚景官至伊豆守。

田代信綱

信綱者。伊豆守藤原爲綱子也。爲綱爲州時。通茂光女生之。遂屬茂光育之。稱田代冠者。剛勇有機斷。石橋之敗。登高樹注射。將軍得聞而遁。源義經之攻福原。與土肥實平議。欲夜襲敵營。實平未應。信綱僥和曰。我軍衆盛。敵必謂我不求利。於夜掩其不意。莫不克矣。遂襲平資盛營。資盛果大敗。義經乘大風入南海。諸將懼不敢往。獨信綱與畠山重忠等從之。戰尼子浦。屠勝浦城。攻陷屋島。大戰壇浦。並有功。

工藤景光

子行光

工藤景光。茂光宗人也。爲狩野莊司。以仁王敗。景光勸將軍舉義。遂提子弟入甲斐。說安田義定起兵應之。將入相摸。與股野景尚戰。波太山敗之。謁將軍於黃瀨川。景光巧射。兼精射儀。爲當時所推。建久四年。從敗富士。有巨鹿挺走。連發三矢不中。舍弓而歎曰。吾結髮射獵。今踰七旬。未嘗不命中。今者心惘然。使鹿逸去。豈是山神所馭乎。吾命必盡於此。及昏果病作。竟不起。子行光。

行光稱小二郎。驍勇善鬪。將軍嘗創永福寺。命諸將負材。行光與畠山重忠。城長茂等。功敵百人。觀者睥眄。陸奧之役。行

光與狩野親光。藤澤清親等。攻厚樫城。先登。比入城門。行光第一。有伴藤八者。力冠六郡。行光格殺之。有驍騎與清親搏。行光扶清親而獲之。清親喜甚。約以女妻其子。明日城陷。所將卒。獲下須房秀方。陸奧平定。賞賜岩井邑焉。明年。大河兼任作亂。行光與由利維平等擊敗之。行光射騎並巧。嘗從二世游稻村碓。發一箭墜二翼。又嘗從游相摸河。命騎惡馬行險。了不蹉躓。二世賞之行光有三壯子。曰藤五。藤三。美源。二世嘗命陸奧人宮城四郎。伐芝田。二郎。偶藤五。藤三。自岩井邑。將歸鎌倉。途聞之。還會于軍。襲芝田寨後。殺十餘人。芝田遂敗。二世聞之。欲識其面。行光裝三士入謁。二世欲取一

人祿之。行光曰。自先臣景光。屢從征戰。出十死。遭一生。皆此輩之力。幕下收天下之精銳。所乏非勇士也。臣惟有此三士。願恕之。二世曰。汝言有理。汝不唯善弓馬。辭令亦巧。宜亟傾三杯。賜酒而罷。時人榮之。

後藤實基

後藤實基。源氏舊家人也。平治之役。從源義平。戰待賢門。追北至東三條。射殺大木戶八郎。軍敗。從左馬頭東走。至龍華。左馬頭命還京。育其少女。既長。爲中納言藤原能保妻。義旗建。實基歸之。從義經攻屋島。平氏急收兵上舟。實基疾驅焚城。平氏失依據。遂潰。實基無子。養佐藤仲清子基清爲嗣。基

清以軍功拜檢非違使左衛門尉。爲讚岐守護。及能保爲京師守護。請基清爲警衛使。獲反者平知忠平正重等。二世時。坐事免讚岐守護。承久之役。屬官軍。軍敗而降。當斬。子基綱請刑之。

仁田忠常

仁田忠常。伊豆田方人也。有拳勇。能搏猛獸。應義旗。戰於石橋。西海東奧之役。皆疾鬪。建久四年。將軍敗富士。曾我祐成。及弟時致。殺工藤祐經。行營騷擾。壯士出戰。多被創。忠常奮擊。斬祐成。初將軍在伊豆。忠常往來給事。以故尤親寵。嘗有病。將軍親訪之。二世時。北條時政專府權。嘗命忠常及天野

遠景。殺比企能員。遂攻小御所。俄而二世密賜書忠常及和田義盛。殺時政。事泄。時政招忠常。忠常不知事泄也。以爲將賞己功。乃往。時政留之。日晏不還。其馬卒怪而歸告。子弟等以爲忠常被殺。乃襲北條義時第。皆見殺。忠常辭出。聞變駭然。曰。吾可死矣。趨入幕府。途見殺。忠常嘗從二世獵富士山。中有穴。名人穴。二世命窮其所至。賜寶劍。與從者五人入焉。狹隘不可迴踵。冷水浸脚。蝙蝠撲顏。入漸深。豁然見大河。逆浪沄沄。忽隔水見火光。從者四人中毒死。忠常解劍投河。獨從一卒得歸。往來穴中一晝夜云。

宇佐見實政

宇佐美實政稱平次。伊豆人也。有猛氣。爲將軍所知。石橋之役。與兄政光俱殿戰。甚力。將軍入鎌倉。論功行賞。實政與焉。命直寢室。將軍伐藤原泰衡。命實政及比企能員督上野。越後兵自北道入。出羽擊殺田河行文。秋田致文等。會大軍于陣岡。又生擒泰衡騎將由利維久。以軍功賜津輕。留撫邑民。明年大河兼任起兵入津輕。實政戰死之。

野史氏曰。當戰國縱橫之間。得一士猶足以自強矣。如羈縻失方。萬卒離心。吾讀史至石橋之敗。如茂光景員等。皆目右大將。爲非常人。使其子弟舍己而從之。其他見危授命之士甚多。人心歸向如此。其所以大興有由哉。鎌倉史卷三十一

鎌倉史卷三十二

列傳第十六

土肥實平 弟土屋宗遠

土肥實平稱二郎。其先自武藏徙相摸。至實平居足柄土肥之鄉。與伊豆相隣。實平爲人清儉。有幹局。將軍以爲可屬大事。義旗之建。多出其所謀。將軍入相摸。主土肥氏以會將士。石橋軍敗。將軍入杉山。大庭景親率兵迫之。實平導將軍逃後山。我諸將躡後來見。皆請從。實平說將軍諭諸將散去。諸將固請。將軍欲可之。實平憮然曰。是失計也。從者雖多。未足當敵。而徒多蹤跡。使敵易撿掠。今君臣各走便。以自全。他日

雲蒸龍變必能雪會稽之耻矣。將軍乃謝諸將散去。遂出杉山。匿宮根山。循山走土肥。遇實平妻齋糧備告。三浦氏入海。狀實平自真鶴碇航赴安房。使子遠平報夫人北條氏于伊豆。當是時。海陸皆敵。實平保護。焦思百端。與三浦義澄相得於海上。房總尋降。遂入鎌倉。駿河常陸之役。皆參謀議。言多被聽。元曆元年。將軍命弟範賴義經西討。命實平及梶原景時監軍。義經之陷福原。其大計大謀。多決於實平。平氏南奔。命實平景時分部經略山陽五州。實平鎮三備板垣兼信。欲參其事。實平不許。兼信怒曰。吾宗族也。豈立汝輩下風哉。遣使鎌倉請為之上司。將軍報曰。任吏不問親疎。惟器之用。實平

貞純絕倫。未嘗攜貳。西討軍事。細大委之。卿輩分當死戰而已。何不自揆之甚。其被信任如此。尋從義經攻西海屋島之役。平教經來擊。義經將自當之。實平諫曰。大將不宜輕戰。乃與畠山重忠率五十餘騎進戰。及置守護追捕使于諸州。實平首膺選。實平儉薄自奉。將士有奢侈者。將軍乃引千葉氏土肥氏以戒之。子遠平嗣。實平弟宗遠。

宗遠稱土屋三郎。石橋軍敗。奉將軍至下總。卿命使于甲斐。趣武田安田諸族發兵。元曆文治之間。從軍有勞。後坐以私怨殺梶原家茂。拘于和田氏。和田氏上言曰。宗遠建義功臣。殺叛者子孫而見拘。忠勲與悖逆。簡擇何在。會赦而出。宗遠

初養妻兄岡崎義實子義清爲子。已而生子忠光。忠光義清皆從軍于石橋。義清拜右兵衛尉。累遷大學助。後與實平孫左衛門尉維平等。黨和田氏。義清有膂力。與朝比奈義秀。古郡保忠。勇冠軍中。左右馳突。疾如風雨。府兵屢卻。三世避之法華堂。義清攻入龜谷。中流矢死。忠光維平亦見殺。

大庭景能

大庭景能。相摸高座人。稱平太。又號壞鳥權守。保元之役。從源左馬頭。門於白河殿中。矢幾死。弟景親救之。得免。遂病創爲跛。性骨鯁。有俠氣。義不苟合。初將軍使安達盛長招八州諸豪。盛長先抵大庭氏。景親既爲平氏謀伐將軍。故弗應。景

能奮曰。汝爲恩固善矣。我乃爲義也。與弟豐田景俊歸將軍。景親圍將軍於石橋山。自名曰我鎌倉景政苗裔也。顧誰爲戎首。將軍使北條時政言曰。汝不知我君八幡公四世孫。而奉王命討亂逆也。汝亦記乃祖之從八幡公於陸奧乎。今乃背義嚮利。以忝乃祖也。景親語塞。不能答。既而石橋軍敗。景能不肯降。景親及將軍入鎌倉。景親出降。景能不肯救。景親。景能粗通兵書。兼精營築之術。將軍創幕府。命景能監營造。宮室制度。皆出其指授。軍謀機略。亦多咨問。將軍欲伐陸奧。上書請於朝。朝議未許。而徵兵既集。將軍患之。諮於景能。景能對曰。古者將在軍。君命有所不受。且泰衡先世嘗爲源氏

家人。今討其罪。何待詔。聚兵曠日。徒糜糧食。毋爲也。將軍大喜。賜之鞍馬。軍出。使景能及三善康信留守鎌倉。後以言事忤旨。見逐。祝髮爲僧。建久六年。將軍將朝京師。景能上書陳功勞。請充行伍。見許。將軍嘗與諸將談兵事。景能曰。馬上弓箭。要稍短縮。保元之役。吾接鎮西。八郎于大炊門前。值其左。八郎執弓擬我。我意八郎長于西海。不使馬上。廼驅而進。避之右。八郎乃發箭。直指胷。而中膝。雖傷。脚尚得全。以八郎絕技。不能命中者。弓箭制過度也。聞者以爲至言。及入京日。景能修保元舊鎧。著之。甲左裳闕一札。乃所爲八郎射者。其直垂紺色。以鷺羽爲絲縫之。騎而候將軍車前。時以爲偉觀。初

相摸人。波多野義經。河村義秀等。困將軍於石橋。及將軍入鎌倉。令州郡購二人。義經自殺。義秀出降。義經子有經。景能外甥也。將軍命景能拘義秀。有經於其家。既又命誅義秀。景能退而歎曰。中原遭不虞之變。向背皆不足。深谷獨何二氏之不幸也。吾誓保之。乃提有經入幕府。固請宥死。將軍許之。賜義經故邑松田。以育有經。景能又匿義秀。不刑。後十年。將軍修放生會於鶴岡。觀流鏑馬。臨期。射手有病者。景能因請赦義秀。充射手。將軍駭曰。渠猶在世乎。遂命之。義秀發十三膚箭。鏑長八寸。將軍按箭。憮然曰。義秀挾能心驕。其黨景親。不亦宜乎。更命射法三儀。曰。一失則死。三儀者。挾物八的之

類。當時射手所難。而畢儀無一失。將軍喜赦之。他日景能入請曰。臣今謹誅義秀。將軍曰。是何言也。嘗命誅之。不肯。今赦而反請誅。何也。景能曰。渠以拘故。食於臣。今赦。臣不敢與食。渠謂與其餓死。寧刑死。將軍大笑。復義秀食邑。其所為皆此類也。義秀有弟秀清。小字千鶴。其母事夫人北條氏。號京極局。密育之。及陸奧之役。母囑之三浦葛西諸將從軍。千鶴時年十三。從諸將攻厚樫城。先登。將軍偉之。問其父。因就陣中加首服。命小笠原長清為賓。賜名。後承久之役。戰于宇治。有首功。景能承元四年死。子景兼。黨和田氏死。

安達盛長

從子足立遠元

安達盛長。稱藤九郎。下野人。為人陰重。有器局。言論多理致。將軍流于伊豆。盛長從之。保護懇到。致游士。結豪傑。多出其言。建義之初。移檄歷說八州。聞者感激響應。將軍入鎌倉。論功行賞。以盛長為上野奉行。尋攝三河守護。以其二十年奉養之厚。最被親寵。丹後內侍者。比企尼女也。將軍寵暱之後。以妻盛長。時燕其甘繩之邸。二世時。太夫人北條氏。命參決政事。削髮名蓮西。歿年六十六。盛長儉約自奉。餅飶蒸飯。舊盛以朴葉。有用楮葉者。盛長視而歎曰。是驕奢之漸也。子景盛。別有傳。次時長。稱大曾禰氏。官兵衛尉。為評定。盛長從子遠元。

遠元稱足立氏官右馬允義旅徇武藏遠元勉病與豐島清光等迎將軍以文無害爲政所寄人建久元年從朝京師拜左衛門尉。

天野遠景

天野遠景稱藤內伊豆君澤人官內舍人遷民部丞爲人雄偉有器量義旗之初首應之八牧石橋之役並疾戰將軍入駿河伊藤祐親聚舟鯉名將奔于京遠景掩擊擒之將軍北伐源義仲遠景與岡崎義實奉命入越後定和得質而還將軍忌一條忠賴召府賜酒因命工藤祐經就席斬之祐經懼變色將軍目遠景遠景刺殺忠賴忠賴僕山村等揮刀入內。

遠景執魚几拋之擒殺之從範賴徇西海將軍手書勞之平氏滅範賴留豐後撫綏西州既而範賴東歸遠景代爲鎮西守護兼豐後奉行以功勞加食義經西奔將軍疑其黨有匿鬼界島者遣宇都宮信房與遠景擊之文治四年率兵入島島人降附事竣東歸祝髮名景蓮建仁中遠景與仁田忠常從北條時政退朝至荏柄祠前時政顧曰比企能員叛矣將使卿等伐之遠景曰殺一老夫何必用人宜召而誅之時政從之托佛事招能員遠景忠常伏戶內覘其入擒殺之既而時政殺忠常遠景亦不賞建永中遠景錄功乞澤亦不省子政景至和泉肥後等守。

葛西清重

葛西清重稱三郎。下總葛飾人也。勇武而愛物。將軍在伊豆。雖隔州郡。常通慇懃。是以被親信。將軍奔于安房。使使召清重及其族江戶重長等。既又慮重長前屬大庭景親不肯來降。命清重誘殺重長。清重迎將軍於隅田河。重長亦尋降。將軍欲奪重長地而賜清重。清重辭曰。富以庇族。褫族益臣。臣不願之。彼罪可禡也。請賜他人。將軍怒曰。汝不受我賜。我又收汝地。清重曰。臣由此得罪。命之窮也。不當受而受之。臣雖死不肯焉。將軍感悟。終不禡重長地。時論稱之。與千葉胤正擊伊北莊司常仲滅之。將軍自伐佐竹氏還。以丸子莊賜清

重。因館于其家。事在倉卒。清重欲有所饗。不得。乃粧其妻爲姬。以侍膳。時論醜之。將軍撰親臣直寢室。清重與焉。尋從範賴徇西海。將軍賜書勞之。將軍伐藤原泰衡。以武藏上野兵屬清重。及加藤景廉。清重與三浦義村。工藤行光。工藤祐光。狩野親光。藤澤清親。河村千鶴七人。冒夜先登厚樫城。疾戰有功。大軍入平泉。泰衡既火館而逃。有一庫免火。將軍命清重及小栗重成。開之內皆珍寶古器。特以無縫麻衣象牙笛賜清重。玉幡金華鬢賜重成。陸奧平定。以功最賜伊澤盤井。牡鹿三郡。爲平泉檢非違使所。因留勾當州務。會年穀不登。轉粟移民相救。互市通布貨。百姓便之。將軍賜書褒之。明年。

大河兼任起兵出羽。入陸奧。殺由利維平。宇佐美實政等。清重防禦有方。終滅之。時將軍將朝京師。遣伊澤家景為副留守。而召清重還。從朝京師。天子擢功臣授官。清重拜右兵衛尉。既復遣鎮陸奧。其母在家罹病。將軍遣使訪問。且報之。清重。清重承元中。與千葉三浦族直隴口。建保之亂。疾戰卻敵。後官至壹岐守。

野史氏曰。當中原風雲之會。辯者馳說。智者演略。各出其能以成其志。如實平散將士而匿蹤跡。盛長馳詞鋒以說八州。蓋其才略有出於人者。景能去恩取義。有古烈士之風焉。清重遠景非有豪強之資。而一朝被知遇。東西擁大鎮。以著于時。非亂離之際。亦安能致於此哉。

鎌倉史

卷之八

比企能員

[Faint bleed-through text from the reverse side of the page]

鎌倉史卷三十三

比企能員

比企能員。稱藤四郎。不詳其世系。有姨夫掃部允某者。為武藏比企少領。某卒。姨薙髮稱比企尼。比企尼嘗乳將軍。尼子曰朝宗。調內舍人。又養能員為子。能員因冒比企氏。當將軍在伊豆。尼餽遺之。二十年不衰。及義旗建。知與不知。咸曰比條氏比企氏之力也。比企氏由此著矣。陸奧之役。能員別將兵。自北陸道入出羽。略定郡邑。所至皆降。會大軍於陣岡。大河兼任起兵出羽。入陸奧。能員帥東山道兵。擊敗之。初比企

鎌倉史

卷之八

苗

比企能員

尼生三女。皆有色。長曰丹後內侍。事二條院。以和歌名。通惟宗。廣言。生島津忠久。後東歸。嫁安達盛長。次適河越重賴。次適伊東祐清。祐清死。再醮平賀義信。將軍以盛長女嫁範賴。重賴女配義經。能員女爲二世所暱。生世子一幡。他三女。一適左衛門尉笠原親景。一適兵衛尉糟谷有季。一適中山爲重。朝宗女亦有色。給事府中。權寵傾一時。北條義時挑之。將軍乃妻之。比企氏號稱好女之門。能員子宗員亦有二女。適小笠原長經。中野能成。細野四郎。比企氏親黨漸廣。二世立。能員與北條時政。大江廣元等。參決庶政。二世表能員。授檢非違使。左衛門尉。以肺腑用事。威權頗重。能員子宗員。時員。

及長經能成四郎等。以姻好爲二世所親狎。常在內用事。二世下教。五人所爲。將士不得與抗。違者以名聞。五人遂橫行都邑。婦女技工。隨見以聞。安達景盛買妾於京師。頗有姿容。五人告之。二世私遣書挑之。不從。會室平重廣在三河爲盜。二世乃命景盛伐之。因奪其妾。徙居石壺。日與之姪戲。禁諸將不許入內。及景盛歸。二世命長經率兵伐之。太夫人北條氏諫而止。二世既多過失。而諸大臣無有諫者焉。各競納子弟。希旨取寵。北條時政納子時連。和田義盛納孫朝盛。而朝盛尤被寵遇。得與五人者出入臥內。二世好蹴鞠。時連乃以鞠進。廣元修一堂於後園。購佳鞠于京師。以請二世。二世命廣

元請上皇召鞠師紀行景。自是日以游宴蹴鞠爲事。不復視朝。遇有所教令。皆違理。而能員不能有所匡救也。二世又用平知康等爲狎客。知康善蹴鞠擊鼓諸技。而爲人巧佞輕險。使酒初事後。白河法皇拜左衛門尉。源義仲之叛。法皇之幽。皆起於知康。當時知康入鎌倉。將軍憎之。命諸將杜門不納。知康無所舍而還。至此爲二世所寵。嘗從觀雪夜歸。馬驚。跣踏墮廢井中。及歸。賜衣二十領。二世嘗請太夫人北條氏觀鞠戲。時雨後場濕。二世患之。知康脫所著直垂拭場。二世大悅。戲畢酒出。知康乘醉嘲時連。夫人銜之。欲令二世逐知康。知康患之。適二世與行景相對蹴鞠。爭優數次不決。知康俄

起奪鞠。連稱奇奇而退。既罷。謂行景曰。不欲使卿窮於其道。爾行景喜。乃詣太夫人。陳知康無他。知康遂得留。既而二世暴疾。時政謀分京西三十八州授弟千幡。已翼戴之。能員因其女。告二世曰。分權起爭。必不利於世子。二世亦憤北條氏所爲。密召能員於臥內。與議圖時政。語泄。時政招能員。能員欲往。子弟皆曰。毋往也。往必以兵自備。能員曰。是自我啟釁也。彼何能爲。遂往入門。甲起殺之。從者走告宗員。宗員與能員女婿笠原親景。糟谷有季。中山爲重等。奉世子據小御所。時政遣子義時。率畠山重忠等攻之。宗員火第自殺。世子焚死。時政夷其族。長經能成四郎等。皆見禁錮。放知康行景還。

京師初右大將授島津忠久薩摩大隅日向守護至此亦坐免。

野史氏曰昔孟子有一薛居州獨如宋王何之歎幼習成性化於所深也予視二世之五臣皆輕浮悖慢之徒加之大臣競納諂取寵無有諫者二世年少群臣終以此養成其驕暴之性能員既不能有所匡救而又欲藉此以爭權不亦誤乎予不暇爲比企氏悲而爲將家惜之誠使右大將得端人正士與二世居豈至于此哉故特表之後之讀者庶幾亦知愛子之有道與。

宇都宮朝綱

從孫信房

宇都宮朝綱下野河內人也。少有志烈。鳥羽天皇時任武者所調北面。久之拜左衛門尉。義旅之起朝綱在京。而弟知家應鎌倉平宗盛怒之。欲殺朝綱。平貞能救之得免。遂歸將軍授伊賀壬生野地頭。以勞益食。及平氏滅。貞能薙髮投朝綱。朝綱請宥之。將軍不許。朝綱請曰。嚮平宗盛將殺臣。貞能生之。今臣願代之。終許之。陸奧之役。大軍攻厚樞城。城堅不拔。朝綱與結城朝光等謀遣其兵。冒嶮出于城後襲之。城卽陷。後坐犯公田。勅流于土佐。孫賴綱于豐後。朝業于周防。先是板垣兼信佐々木定綱亦見流。將軍深以慨歎。使結城朝光唁朝綱。無幾會赦歸。薙髮稱尾羽入道卒。子成綱任左衛門

尉早卒。孫賴綱嗣。元久中有人上變告賴綱謀叛。幕府命小山氏討之。賴綱與書北條義時自解。削髮名蓮生。就結城朝光獻鬻以謝。事得釋。子泰綱女爲北條經時妻。遂被拔擢。官至下野守。寬元中爲評定。

朝綱從孫信房亦任武者所。霸府立以功食一莊。將軍欲伐鬼界島遣信房於鎮西。就天野遠景謀之。先是平氏命筑後守平家貞討之。遇風不能進而還。以故廷議頗難之。信房獻地圖於幕府。言可討之狀。將軍遂決意。命遠景信房率舟師討平之。歷官至大和守。

平清盛八田知家

八田知家。朝綱弟也。或謂右大將季弟。平治中平清盛收殺源族。朝綱父宗綱匿知家。冒八田氏。事後白河上皇。任武者所。知家爲人疎躁。不修行。然險黠有口辨。以此見任。遇從範賴徇西海。及入京師。拜右衛門尉。將軍惡不因其舉。責不許東歸。既解而歸。以功賜食於常陸邑焉。知家嘗以家士充大內巡邏。坐事下獄。將軍課知家修鎌倉道路。購罪征與之役。使知家帥常陸兵與千葉常胤自東道進。建久元年。將軍將朝京師。豫命知家司廐。及期諸將悉集。將軍束裝而。知家未至。及日午。知家始至。自常陸。將軍意色不能平。知家倉皇託病謝罪。因問所用乘。及前後部爲誰。將軍曰。吾欲待卿至。謀

之何太濡滯也。前隊已命畠山重忠。後隊未得其人。乘將用梶原馭馬。知家曰善。畠山爲前隊。千葉介宜充後隊。顧馭馬恐不勝著甲騎之。臣有細馬願獻之。乃控一大驪於南庭。將軍視之大悅。遂命千葉氏爲後隊。從入京。天子擢功臣授官。知家與焉。請田授其子。知家與州人多氣。義幹爭勢相惡。義幹管領鹿島祠戶。舊例每二十年更造神祠。義幹過年不造。將軍命知家造之。知家因欲奪其職。會將軍獵富士。曾我氏復父讎。行營騷擾。知家欲乘變圖義幹。先使人唱曰。知家將來襲。義幹勒兵自守。知家乃發遣使誘義幹曰。聞獵場有戒。請與公偕行。義幹果疑不出。知家至鎌倉。見將軍誣義幹叛。

將軍召義幹。與知家辯對。知家曰。義幹聚兵據城。而不援行營。非叛而何。義幹不能辯。終坐焉。二世立。知家參決政事。久之拜筑後守。後薙髮稱尊。卒。子知重稱小田太郎。有武幹。將軍嘗命直寢室。以父功任左兵衛尉。尋進左衛門尉。知重郎與和田氏隣。建保之亂。知重先知之。報大江廣元。軍起。戰甚力。歷官至常陸介。次家政。稱穴戶四郎左衛門。建保之亂。與朝比奈義秀鬪。見殺。次知尚。建保之亂亦疾戰。後宿衛京師。拜右衛門尉。承久之役。屬京師。上皇賜親燂刀。勵之。守大井渡。軍敗。武田信隆追之。知尚揮所賜刀斫之。中其馬。因得脫。復出守宇治。戰死之。次時家。稱高野氏。官至伊賀守。薙髮

稱道圓。文永中。爲評定。次義勝。義勝子家長。知家養爲子。稱中條氏。任出羽守。嘉祿安貞之際。爲評定。

橘公長 子公業

橘公長。伊豫人也。數世祖遠保。天慶中。討賊藤原純友。以功管領宇和。公長善騎射。然性剛褊。嘗與齋藤實盛。片桐景重。鬪。旣而悔。謂彼隸源大尉。我必得罪於大尉。大尉責實盛。景重。而不及公長。公長德之。後隸平知盛。任右馬允。與平宗盛。僕清九郎鬪。宗盛怒。請公長於知盛。知盛不與。而逐之。公長退居嵯峨。及東國軍起。人薦公長於宗盛。宗盛命隸平重衡。以東。公長不悅。以爲臨急用人。終不如源大尉長者也。於是

提子公忠。公業奔鎌倉。因小笠原長清請降。將軍素聞公長名。又聞其二子皆精射。時幕府落成。是日命始射。乃以公忠。公業充射手。遂收祿之。公長尋卒。公忠亦早死。公業美姿儀。有口辯。元曆元年。將軍以讚岐兵屬公業。西討陸奧之役。有功。賜小鹿島。留撫郡民。會大河兼任作亂。公業戰不利。脫走歸鎌倉。少之拜左衛門尉。將軍將落東大寺。行到勢多。台嶺。座主率徒縱觀橋畔。座主太貴。而徒屬皆驚悍。將軍欲禮之。耻觀者。不欲下馬。欲直過。則不可。乃命公業進說將家式。宣布詳切。音吐清亮。聽者悚動。比將軍過之。皆誓首。公業卹與美作朝親對門。嘗夜坐賞月。有一姝來謁。遂與之私。卽朝親

妻也。朝親引武田氏小笠原氏將伐公業。公業亦引三浦氏和田氏自備。幕府遣北條時房和田義盛問之。使公業逐姝事得寧。官至薩摩守。

野史氏曰。朝綱育弟而殆速死。公業美貌而致女禍。善有不報。美有所惡。知家稱幕府庶弟。何其才之下也。時雖利於躬。惡可掩於後哉。右大將既不齒於當時。故不列之宗室傳。

鎌倉史卷三十三

鎌倉史卷三十四

列傳第十八

下河邊行平

附藤澤清親愛甲季隆諏訪盛澄
海野幸氏望月重隆那須宗高

下河邊行平。下總人也。其先藤原秀鄉。以善射著名於天下。父行義為下河邊莊司。行平襲之。家世傳射法。當平氏隆盛之際。行平雖為役屬。而竊通志於將軍。源賴政之舉義。行平先知報將軍。義旅入下總。即起應之。別將兵伐右馬允波多野。義經於松田未至。義經自殺。霸府建命直寢室。嘗從詣鶴岡。有刺客覘於路。行平擒之。將軍喜曰。賞從所欲。行平請免。

邑民貢馬。將軍曰：不有爵祿者乎？而卿求緩民，可嘉尚也。乃爲蠲之。源義廣之亂，率兵要於古河高野之津，敗之。義廣以身免。元曆元年，從源範賴討源義仲。又從徇山陽。明年，範賴將航海赴豐後，時糧運不繼，匱乏甚。行平賣所著甲冑而買船。人曰：科頭能入敵乎？行平曰：本不辭死，何辭科頭？且爭船而後，孰如得船而先攻？太宰種直于葦屋浦，殺美氣敦種。平氏滅，行平從範賴撫綏西州，偶見一良弓，欲買之，無錢，乃脫衣質之。事竣東歸，家人想其窮乏，作酒饌迎於途。行平不敢御，并所得良弓獻之幕府。將軍不納，曰：西征將士皆困乏，至有逃歸者，獨卿所獻豐贍，得非納賄遺乎？行平備陳狀。將軍

聞其賣甲質衣爲之感嘆，命左右張其弓，親挽試之，曰：佳哉！卿之於射，日下無雙。日下之良弓，無所逃於卿眼，是宜重寶。遂命酒，曰：吾欲以一州賞卿。卿所經州，何處最佳？行平曰：播州哉。有須磨、明石、書寫山之勝，臣最所垂涎。將軍諾焉。而不果。三年，京師多強盜，詔徵警衛。將軍命行平及千葉常胤按之。會常胤有病，行平先往。及入京師，夜獲賊八人，盡斬梟之。自是群盜屏息。京師肅靜。初，朝廷頗疑賊是東士，將軍命二人按東士在京者，有狀者聞於廳所。行平按狀五十三通，而不一啟於廳。及歸，呈之於幕府。將軍嘉尚之。行平與畠山重忠友善，重忠坐事被拘，既解而歸，梶原景時誣以謀叛。將軍

問之行平。行平曰：臣保其無他。將軍欲面試之，而恐其再召，生疑懼，乃遣行平諭召之。行平至，告以實。重忠忿然曰：吾何心敢為叛逆哉！恨為讒口所陷，無由自明。子來特欲謀吾爾，引刀欲自殺。行平急援其臂曰：止。子常自稱不譎，以信接人，吾豈讓於子乎？子稱將軍之胤，吾亦四世將軍之裔也。苟子有異謀，吾當布陣結營，鼓角相攻，以決雌雄耳。豈機詐權謀，效刺客之流哉？將軍所以使吾為石交，不相疑也。重忠意解，勸酒盡歡，遂共入鎌倉。將軍勞之，賜刀一口。陸奧之役，既拔厚櫓城而未詳賊所在，或曰據物見岡，或曰保玉造。將軍遣行平及小山朝政攻物見岡，而親赴玉造。行平朝政既屠物

見岡。朝政曰：徐就大道以及大軍。行平曰：豈謂玉造非我事乎？揚鞭而進。行平凡百武技，無不通曉。然其破軍殺將，皆弓箭之功，諸將無能及焉。初，將軍將伐陸奧，令諸將納兵具。行平獻甲冑，幟在冑後。異問之，對曰：曩祖秀鄉遺製也。臨陣者貴先登，使後者易知。將軍善之。至今士流多傳其遺法。行平方正有雅量，兼通將略，而名為射所掩。其所嗜好亦在此。儀則典故，皆窮其奧。將軍每游獵，必命在左右，或與諸將較懸筮追牛，常以行平自配焉。所賜與甚多。有信濃人藤澤清親者，亦以巧射聞。嘗從逐禽於入間野，發無虛鏃，獲五雉、二十五鶺鴒。將軍大喜，手牽所騎馬賜之。陸奧之役，清親先登厚櫓。

城清親弟親清亦善射。城氏之亂，其姑有坂額者，登城樓射官軍，軍爲之卻。親清登城後，高山射坂額一箭貫兩股。城卽陷。藤澤氏之射，妙於馳逐，能百發百中。行平之射，未嘗詭遇，容儀儼然，風彩可觀。然亦未嘗不命中也。建久元年，將軍遣使召之，貽以寶馬。既至，使世子受其射法。又嘗命行平授北條時房流鏑馬儀。武田有義、海野幸氏等有異議，行平爲說典故，舉坐箝口。將軍常稱其爲人，恩眷優渥，賜書子孫永擬門族。當時善射者，又有愛甲季隆、諏訪盛澄、海野幸氏等。愛甲季隆相摸愛甲人，以射藝聞，與行平、清親等齊名。將軍每有所啟行，命懸調度曰：「非能二十矢射殺二十人者，不許。」

懸吾調度，建久四年，敗于富士。二世南十二射鹿殪之。季隆相之也。將軍嘗游由比浦，與諸將較追牛，旣而挿履于八尺楸，以爲侯，命季隆馳射之。五發皆中，命檢其侯道，得八弓，遂定爲程式。元久中，北條義時擊畠山重忠於鶴峰，自午及申，戰未決。季隆發一箭殺重忠。

諏訪盛澄，信濃諏訪人也，以射藝播名于京師。自謂傳藤原秀鄉秘訣，每射城南流鏑馬，觀者如堵。及西海平定，盛澄坐嘗屬平氏教之射，當斬。爲其精流鏑馬儀，將軍恐誅之，永失其傳也。替刑者旬月，遇修放生會於鶴岡，觀流鏑馬，撰射手五人，皆命中。將軍意色快然，因思盛澄絕藝，急命召之。故擇

厩中惡馬與之。圉人私於盛澄曰。驚僻對侯右折。盛澄領之。畢儀不失一矢。更樹五寸楸於場中三所。各挿小土器。命射之。盛澄悉中之。復命射其楸。於是盛澄潛心默禱。諏訪之神。三箭射折三楸之中。衆皆駭歎。將軍大喜。赦其罪而祿之。親寵軼舊將。

海野幸氏。信濃小縣人。初屬源義仲。及義仲遣子義高質鎌倉。幸氏以年同命從之。義仲伏誅。幸氏謀脫義高。事覺。將軍殺義高。囚幸氏。既而感其忠。蓋收而祿之。遂以射藝著。與工藤景光。和田義盛。望月重澄。藤澤清親。諏訪盛澄。愛甲李隆。及行平幸氏。稱八巧手。七人者老成。獨幸氏以年少預之。每

游獵未嘗不從。城氏之亂。先登著功。拜左衛門尉。至藤原將軍時。北條泰時使孫時賴習流鎬馬。請幸氏視之。評其得失。幸氏辭不敢當。強請。乃曰。馬上挾矢之頃。執弓如一字。當時以爲通儀。而僧西行與右大將論典故。謂是非將射之體。宜上弭稍昂斜如注水。時我曹八人在坐。如老成下河邊。工藤皆稱善焉。泰時大悅。縱談及弓馬典故。三浦義村在坐。急召子弟於家聽之。其爲時所尊信如此。望月重澄亦以巧手見推。當時與武田信光。小笠原長清。及幸氏。稱弓馬四天王。然重澄當戰爭之世。未嘗見弓箭之功。豈數之奇歟。那須宗高。下野人也。稱餘一游獵善騎射。終至其妙。屋島之

役日將晡。平氏船上植一竿。挿紅扇。畫日者。去岸五十步。有美人立船首。招而請射之。義經募射者。皆辭。乃召宗高命之。宗高亦固辭。義經不聽。宗高遂獨騎而出。兩軍屬目。宗高憚射日。乃斷扇眼。扇掀於空。翩翩而下。兩軍絕叫贊歎。宗高一箭之功。傳于後。婦女兒童且知之也。宗高孫光助亦功手。建久中。將軍講射於小山氏。當時巧手十八人。名列于左。

下河邊莊司行平

小山左衛門尉朝政

武田兵衛尉有時

結城七郎朝光

小笠原次郎長清

和田左衛門尉義盛

榛谷四郎重朝

工藤小次郎行光

諏訪大夫盛澄

海野小太郎幸氏

氏家五郎公賴

小鹿島橘次公業

曾我太郎祐信

藤澤次郎清親

望月三郎重澄

愛甲三郎季隆

宇佐美左衛門尉祐茂

那須太郎光助

行平以壽終。子行光亦善射。拜左衛門尉。嘗從北條經時。畋于藍澤。諸將謂行光不習山澤。每逢走獸。便與之馳。行光必獲獸。所獲倍於諸將。諸將始服其能。次子行時。稱幸島四郎。承久之役。與小山氏自東山道進行時。謂小山朝長曰。死則與武州共。乃追北條泰時。及之野路驛。泰時偶開宴陣中。聞

行時來親起迎之。延于坐上。獻酬慙懃。命子時氏控名馬贈之。饗遺及奴僕。行時感奮。進涉宇治河溺死。行平弟政義射不及兄。而有弩力。將軍修永福寺。政義與畠山重忠佐貫廣綱等運材。功敵百人。擊源義廣有功。別授南郡地頭。政義嘗患邑多課役。訴之幕府。下教常陸。目代曰。政義勞於軍國。故賞以地頭。今聞公課繁滋。百姓愁苦。自今以後。正稅之外。勿有所徵發。政義娶河越氏。與義經女婿。及義經叛。坐禠邑。次弟行秀嘗從獵那須野。有巨鹿逸走。將軍命射之。不中。耻而遁去。雉髮隱熊野。後泛一舩於那智浦。乘之。語人曰。渡補陀洛山。置一燈。貯三十日糧。命以板蔽舩上。從外釘之。與書北

條泰時訣別。時人憫之。

野史氏曰。當中原逐鹿之際。據鞍執弓者。比比皆是。挽強巧中。不乏其人。然至其範馳驅而不失難矣。語云。學者如牛毛。成者如麟角。如行平蓋得其角者也。吾嘗訪外國兵具。至挽強獨我邦為最。而弓矢制度亦軼於諸國。蓋我土地人氣自然所長。禦侮于城舍之何賴。自近世傳火術。士人皆溺於新奇。遂疎斯技。惜哉。雖然。天之所賦。人不能滅之。君子有以辨勵之。安知不一箭覆艦者。亦復見于今矣。

鎌倉史卷三十四

[Faint bleed-through text from the reverse side of the page]

鎌倉史卷三十五

列傳第十九

北條義時

子朝時重時
政村

北條義時。遠江守時政子也。稱江間小四郎。深沈有略。度量過人。自少從軍。不務戰功。參謀議而已。將軍深器之。命直寢室。時政嘗有憾於將軍。不告而歸。北條將軍驚且怒。謂梶原景季曰。江間必不相從。試往視之。義時乃入謁。將軍大喜曰。託子孫於汝。遂以義時為家臣之首。右大將薨。二世尋廢。三世立。猶幼冲。時政用事。而太夫人北條氏決政於內。義時與太夫人同母而最親。事多決於義時。義時方言遜讓。能收人

心而內實陰狡。弑二世及取其子於緇祿殺之。凡時政絕嗣之謀皆其所爲。但與後母牧氏不善。牧氏陷殺畠山重忠。重忠妻義時妹也。義時恨甚。及牧氏謀三世事敗。與時政俱被幽。義時遂專府權。自病其威無尚於諸將。選壯丁請爲士。三世不許。少之拜相摸守。以修閑院勞。叙正五位下。自右大將薨。太夫人北條氏舉武功諸將共政。而義時欲專其權。諸將有死者不復補。至是功臣彫落殆盡。獨和田義盛自右大將世爲侍所別當。權勢頗重。於是亦請國司。三世雖不許。猶留書在內。又命義盛候北面。備顧問。義時忌之。會義盛子弟等黨泉親衡謀亂。事發。義時欲法之。義盛懼。急入府上謁。自歸

將軍。因得宥。二子翌日。義時入府。義盛復請宥從子。義時謂從子主謀不可釋。遂流之。義盛怒。義時因以謀激之。義盛果舉兵叛。其族三浦義村走告義時。義時方與客棋。豪無遽色。終局更服。整頓烏帽而入幕府。會幕府失火。與大江廣元奉三世避之法華堂。令子泰時率諸將擊之。及曉。義盛黨來援。軍復振。近郡諸將聞變來者。見幕府既灰燼。或觀望不至。義時與廣元謀。移書諭之。曰。賊軍既潰。幕下安穩。宜速追捕。餘黨以取功名。於是兵士競進。擊殺義盛。三世命義時爲侍所別當。益食二莊。尋表授右京權大夫。兼陸奥守。三世優柔。又不親政事。專委任義時。義時權益重。三世無子。太夫人命取

二世子善哉養之。既又有人間之。廢爲僧。卽公曉也。及公曉
弒三世於鶴岡。源仲章齎劍從之。公曉以爲義時也。并殺之。
先是。三世拜左大將。拜賀鶴岡。義時從。其夜夢成神。告曰。今
年神事幸無事。明年神事謹勿從。覺而異之。起一宇祀成神。
此行也。義時復從。及門乍見白犬過前。心思惘惚。乃謝病還。
故得免於難。於是益崇成神。義時與諸將連署。請後鳥羽上
皇二皇子中。戴一爲鎌倉主。不許。乃請左大臣氏子立之。是
爲藤原將軍。甫二歲。義時造第其宅南。以奉焉。太夫人入幕
府。聽政簾內。大江廣元等參謀政事。一遵右大將約束。上皇
常惡鎌倉權重。欲以時滅之。至是。鎌倉嗣絕。以爲威權可復。

而義時擁異姓。號令自如。及幸熊野。東士仁科盛遠挈二子
謁道左。上皇擢爲西面。盛遠感喜留京不歸。義時怒收其邑。
上皇令復之。不奉詔。上皇以倡龜菊故。令罷長江倉橋地頭。
義時曰。故右大將請置地頭。以賞有功。今不可輒褫。上皇積
怒。決意討鎌倉。以誅義時爲名。使西面藤原秀康誘東士宿
衛者。三浦胤義等。殺京師守護藤原光季。削義時藉。詔五畿
七道發兵勤王。召將士問曰。東士黨義時者有幾。胤義答曰。
彼身已爲朝敵。烏合不過千許人。莊家定曰。不然。彼收士心
有年。願爲彼死者。以千萬計。使臣等在東。亦被籠罩耳。上皇
不懌。彌益聚兵。秀康家僮押松善走。齎詔歷說小山宇都宮

諸將胤義作書勸其兄義村。義村以示義時。義時曰：唯子意所欲。義村誓無二心。義時哂曰：吾知有斯事久矣。因大索鎌倉。獲押松。奪詔燒之。啟狀於太夫人。太夫人會諸將於簾下。臨誓焉。諸將不敢異辭。於是會義時宅議事。義村等欲阨足柄宮根。義時用大江廣元議。直犯京師。命子泰時弟時房自東海道進。子朝時自北陸道進。武田小山諸將自東山道進。凡從役父兄行者留子弟。子弟行者留父兄。兵總十九萬。義時乃放還押松。使歸上言曰：臣將被誅。不敢逃避。聞陛下喜戰。謹獻臣長男泰時。次男朝時。以下十餘萬人。使之爲戰。陛下寓目焉。若未厭於心。猶有二十萬人在。臣宜自將以繼之。

押松走歸白之。內外失色。上皇乃命秀康胤義等分爲九隊。守美濃尾張。拒東海東山兩道。別遣宮崎貞範。仁科盛遠。軍越中。拒北道。東軍三道皆克。鼓行而西。官軍退守宇治。勢多復敗。上皇懼不知所出。乃復義時位。記遣使宣諭泰時。義時使廣元論其罪。上皇削髮徙之隱岐。順德土御門二上皇。雅成賴仁二親王皆徙焉。廢天皇。立高倉天皇孫卽位。公卿首謀者當斬。藉沒地三千餘邑。悉分與戰功將士。而一無所取焉。留泰時時房於京師。分居六波羅南北。自是廢立天子。進退公卿。皆出北條氏指麾。攝政以下。皆質曲直於鎌倉。天下不復知有朝廷矣。義時元仁元年卒。年六十二。義時初娶比

企氏生子泰時等。後娶藤原氏。生政村及一女。女適參議藤原實雅。義時鍾愛政村。又任用妻兄光宗爲政所執事。表授左衛門尉。累遷式部丞。其弟朝行任左衛門尉。次弟光重右衛門尉。及義時疾篤。實雅與妻至自京師。而留泰時在六波羅。俄而義時卒。光宗等與藤原氏謀立實雅爲鎌倉主。而政村執權。議未集。時人訛言曰。泰時至諸弟死。旣而泰時至自京師。太夫人北條氏命之執權。光宗等懼。政村之冠。三浦義村爲賓。約爲父子。於是欲倚三浦氏圖之。事頗泄。義村又中變。自歸泰時。光宗惶惑不知所爲。會府下夜驚。太夫人北條氏抱嗣君入泰時宅。召義村及諸將。命廣元論其罪。流光宗

于信濃。朝行光重于鎮西。遷藤原氏于北條。遣實雅歸京師。廷議流實雅于越前。嘉祿中。泰時爲太夫人北條氏修冥福。赦光宗等。復皆任使之。泰時自有傳。次朝時。重時。政村。朝時。稱相摸二郎。相貌雄偉。膂力邁人。義時諸子皆沈敏。富吏才。獨朝時豪爽。不治行檢。以將略自任。而人未之許也。嘗偷三世夫人侍兒。被譴屏居駿河。歲餘。和田義盛叛跡稍露。義時俄召朝時自備。及亂起。與義盛子義秀鬪被創。後拜式部丞。承久之役。朝時督四萬騎。自北陸道進。抵越後。官軍將宮崎定範。仁科盛遠等。據寒原寨。樹柵伏弩以待。朝時募民家得數十牛。夜束炬其角。驅以衝寨。寨中大駭。連弩皆發。乃

踰寨至市振。官軍設柵阨守。朝時以騎兵涉海。官軍出柵要之。步兵乘間破柵而過。入越中。定範盛遠守黑阪。糟谷有久守志雄。朝時皆破之。殺盛遠。走定範有久。林石黑諸族望風而降。遂會泰時于京師。是役也。諸道軍皆少利。僅而得捷。獨北陸軍全勝多功。諸將始服其能。後歷周防。越後。遠江等守。叙從四位下。爲評定。非其好也。晚年薙髮名生西。以歌詠自適。寬元三年卒。子孫有名越氏。江間氏。

重時。稱赤橋三郎。沈審有雅度。拜修理權亮。駿河守。累轉相摸。陸奧等守。進從四位上。代北條時氏爲六波羅北方。寶治初。東歸。與北條時賴連署。後削髮名觀覺。創極樂寺。退居焉。

卒年六十四。子長時。任左近衛將監。爲六波羅北方。康元元年。東歸。除武藏守。叙從五位上。循謹無他。時賴謂可以託孤。命傅時宗。遂傳執權於長時。長時傳之於叔政村。以及時宗。長時曾孫守時。嘉曆中。執權。死于元弘之役。事見高時傳。政村。稱四郎。拜式部丞。遷左馬權頭。叙正五位下。歷陸奧相摸等守。轉左京權大夫。進正四位下。仁治初。爲評定。康元初。與時賴連署。攝越後州務。文永初。執權。已而傳執權於時宗。連署焉。爲人安詳。爲政尚簡易。無所變更。嘗以女嫁族宗。政。當昏夜。將軍適來游焉。政村侍坐終夕。未嘗起。時人服其勤敬。性愛才下士。士皆愛之。頗善和歌。搢紳雅重之。稱爲東方

遺老及卒。龜山天皇特使使弔其喪。子時村。初名時遠。拜左近衛將監。歷陸奥武藏等守。叙從四位下。文永中。爲評定轉六波羅北方。歸。與師時連署。北條宗方之叛。時村欲誅宗方。并除師時而專政。未發。爲宗方所襲殺。

野史氏曰。義時繼父之烈。藉姊之威。擁幼主制天子。號令如疾風。殺伐如暴雨。赫赫乎隆哉。諺云。鷲鳥將擊。必收其爪。彼以遜言退讓。收人心於當初。逐父易主。而如不與知焉。如不得已焉。終之三軍乘破竹之勢。以掃蕩京華。稜威振枯。叱吒飛霜。從君戮臣。黜陟自己。視天下如掌中一粟。所謂人衆勝天者耶。或云。三世之弑。實義時使之。而其死實爲近習所刺。

蹤跡詭秘。無得而詳焉。

鎌倉史卷三十六

列傳第二十

和田義盛 子義秀 弟義茂

北越 小川 弘著
東京 村田直景校

和田義盛稱小太郎。三浦義明嫡長孫也。父義宗。長寬中。攻安房長狹城。病創死。義盛志氣高邁。以挽強聞。義旅之起。與叔義澄。義連等赴之。義澄聞。丸子河暴漲。駐軍一日。義盛曰。會戰後期。悔無及焉。義澄乃倍道而進。至酒匂。聞將軍敗死。乃還。至金江。過畠山重忠營。揚鞭指之曰。我已屬佐公。汝欲從平氏。能過我乎。重忠縱兵逐之。及小坪坂。義盛謂義澄曰。叔願分兵據鐙磨。義盛當下阪合戰。比敵少。却夾擊破之。義

澄從之。殺騎士九人，卒四十餘人。重忠請和，乃歸。既而重忠來圍衣笠城，拒戰不利，航奔于安房。與將軍遇，岡崎義實告子義忠死，義澄亦告以父義明死，相與悲慟。義盛進曰：「人誰無死，况戰死丈夫之常，豈可悲哀以自撓哉！今顛沛之際，君臣相遇，何喜如之。宜爲君立大計，爲身謀富貴也。」遂見將軍曰：「諺云：欲食者先器。臣嚮見藤原忠清爲平相國，侍所別當，東方人士伺候其門，承色拜趨，威權甚重。臣當時甚羨之。君得志願，授臣以是職，將軍笑而諾之。將軍欲投平廣常于上總，議者危之。北條時政等曰：『不若潛兵入下總。』義盛曰：『不然。』廣常盤據一州，所在城壁莫不爲彼守。假令潛行，亦必覺之。」

臣請奉將軍嚴命，往見廣常，令之出迎。將軍因驗其情，僞且死生有命，其與潛行死於溝瀆，寧死於行陣。將軍以爲然，乃遣義盛召廣常。廣常意色不決，請告千葉氏與之偕。義盛勵聲曰：「子非一國之介乎？去留當自決，何俟他人？今我奉使命來，言或違理，我不使子復去席矣。」廣常大恐，謝曰：「我誤矣。將不日奉迎。」義盛反報曰：「廣常口諾而意未決，必不來。衆皆失色。」議端蜂起。義盛起進，左目將軍，右顧義澄曰：「臣前言死生有命，其與死於溝瀆，寧死於行陣，今危疑如此，豈能有所成哉！且臣知廣常必無能爲，君宜顯然公行。臣請爲前鋒，叔願爲斷後。於是衆議乃定。義盛啟行入上總，廣常不敢動，遂入

下總千葉常胤引兵迎於國府。廣常亦來降。義旅大振。將軍創建幕府。以義盛爲侍所別當。踐前諾也。養和元年。平氏大舉東鄉。義盛率兵援安田義定。守遠江。元曆元年。從源義經討源義仲。從攻平氏於福原。又從源範賴徇山陽。與義澄戍周防。壇浦之役。乘輕舸而射。箭軼二百步。所殪甚多。陸奧之役。攻厚樫城。疾戰。城將藤原國衡潰圍北走。義盛挽弓追之。國衡回射。義盛先發。中其左膊。國衡走。畠山重忠兵得其首。義盛先還侍將軍。已而重忠獻捷。將軍悅甚。義盛曰。此臣所射。非重忠功也。將軍命取國衡鎧檢之。鏃孔如鑿。重忠不能爭。建久元年。將軍朝于京師。擢功臣授官。拜左衛門尉。五年。

伐安田義定滅之。以前後功增食。以其功尤著於上總。賜上總伊比呂焉。義盛膽烈使氣。於人少所避讓。自爲侍所別當。凡行軍。儀衛兵甲。糧運之務。皆關焉。諸將莫不奔走聽命。蓋得意甚。旣而義盛丁喪。所司梶原景時。權行別當事。喪除。欲復職。景時巧詐百端。不肯返。義盛無奈之何。二世立。結城朝光。與諸將連署。訴景時。義盛首應之。大江廣元欲和解之。過其書不上。義盛疑其久不報。詰廣元。因讓之曰。公爲關東耳目。而畏讒人之威權。遏諸將之積憤。豈理也哉。廣元懼而上其書。景時奔于一宮。無何。潛還鎌倉。二世命義盛逐之。毀其邸。於是義盛得復職。北條時政乘二世病。滅比企氏。二世怒。命

義盛伐時政。二世昏亂失政。義盛不奉命。以告時政。時政廢二世而立三世。既而時政又謀毒三世。事泄見幽。而子義時權勢自若。益收奪諸將權。自二世時。義盛參與政事。而義時用金窪行親。安藤忠家等。凡府中之事。皆出於己。侍所奉咨稟而已。義盛強梁自用。不能收士心。士之趨時就勢者。皆歸義時。其黨半一府。然士之偃蹇不得志於時者。亦多就義盛。義盛族廣資豪。以此自負。初右大將約。府臣非源氏不得爲國司。及右大將薨。時政義時皆爲國司。於是義盛亦請任上總介。書再上。太夫人北條氏自內止之。三世諭之曰。姑俟之。三年不報。義盛怒。就廣元請還前書。三世謂輕慢己。然以宿

老優容之。置北面直。以義盛爲長。同列皆年少。義盛耻與之居。託病歸居伊北。建保元年。信濃人泉親平。圖奉二世子千壽而滅北條氏。義盛子義直義重。從子胤長等與焉。事覺見收。義盛聞變。自上總馳入。見將軍謝之。將軍爲釋其二子。義盛大悅。明日。又率族九十八人入府南庭。就廣元乞赦胤長。義時固執不許。面縛胤長。過義盛前。以屬吏流之陸奥。義盛愧之。杜門不出。胤長有勇力。嘗從二世獵富士。山中有竇。將軍命入探之。有大蛇欲吞胤長。胤長揮刀斬之而出。時人歎稱之。以故義盛深惜之。胤長邸在荏柄。隣幕府。義盛就五條局請其宅地。內旨聽之。遣人守其宅。俄而義時逐義盛守宅

者而守之。曰：上請得允。義盛固憤。義時所爲。至是益大怒。曰：我誓與此賊生死。自是密會親朋。日夜計議。土屋義清。橫山時兼。古郡保忠等。刺血而誓。朝盛者。義盛嫡孫。而常盛子也。以善和歌蹴鞠。爲三世所遇。拜右衛門尉。直府北面。義盛命退直與議。朝盛心非之。而不能爭。乃欲遁焉。顧念將軍恩待之厚。悵悵不忍去。遂復入直。三世適宴月下。朝盛賦和歌上之。詞意秀麗。三世大稱之。時府下多流言。三世頗疑之。因朝盛復入直。謂定不叛。悅甚。手書授食邑數所。及日午。朝盛拜謝而出。不復歸家。就僧舍削髮而西。義盛聞之大驚。如失左右手。探其室得一書。曰：近日之議。勢不可中止。犯君不忠也。

違祖不孝也。忠孝兩不立。所以遁去。義盛急命子義直追之。及于手越驛。諭之俱還。三世猶慰問不絕。命著僧衣入謁。義盛不敢遣。而朝盛亦終不能諫。父祖。義盛與黨人約。以五月三日舉事。約定。義盛逐所客沙彌。評者曰：陽逐之。實命祈成事於伊勢太廟。流言嗷嗷。內外疑懼。三世使秦公氏詰之。義盛陳謝無他。公氏見其子弟閱兵仗。還報。更遣使者誚義盛。對曰：老夫受故將軍殊恩。豈敢叛幕下哉。獨兒輩憤義時專橫。欲往問狀。老夫諭之而弗聽也。於是先期一日。舉兵會土屋古郡澁谷中山土肥岡崎梶原深澤大方鹽屋諸族一百五十人。分爲三隊。其二攻義時廣元第。而自赴幕府。欲取三

世初三浦義村約守北門。而意中變。走告義時。義時廣元自北門入。義盛隨圍之。俄而府中失火。義盛乘之。所向皆敗。義時廣元擁三世避之法華堂。接戰一晝夜。黎明義盛兵疲。就食前濱。會橫山時兼率三千人來援義盛。而府兵益加。義盛遂敗。中矢死。年六十七。朝盛脫走而免。及承久之役。朝盛屬官軍。軍敗復逃。嘉祿中。擒于京師。義盛子常盛。義氏。義直。義重。義信。秀盛。義國。與父同死。子義秀。

義秀稱朝比奈三郎。勇力絕倫。兼善游。二世嘗遊小坪之海。命義秀游海。游泳徘徊。遂沒而不見。衆大恠之。頃焉挾三鮫魚而出。二世歡甚。賜所騎駿。兄常盛嘗請此馬而不得。進請

曰。義秀雖善游。而角觝不及臣善。願使臣兄弟角觝。勝者拜賜。二世笑而從之。下船入小阪氏。觀角觝。常盛勢稍屈。北條義時不欲決勝負。進而解之。常盛便跨馬而去。義秀搔首彷徨。無如之何。觀者皆解頤。然義秀名由是益著。及攻幕府向南門。衛士急關門。義秀極力押之。門倒。高井重茂。小物資政。葛貫盛重。新野景直。禮羽蓮乘等。名勇者皆見格殺。北條朝時等被創者亦數人。府兵皆披靡避其鋒。聞軍敗。義盛等死。率五百人航海而去。不知所終。

義盛弟義茂亦勇猛。小坪之役。自鎌倉會之。率七騎直衝畠山重忠陣。先是義盛既收兵而去。顧令人舉手招義茂。義茂

以爲獎己也。益進戰。義盛更揚笠招之。義茂戰益力。手斬綴黨三帥。揚言曰。敢戰者來進。重忠怒向之。義茂射殪其馬。義盛還兵援之。斬獲頗多。將軍入鎌倉。別將兵伐足利俊綱於下野。未至。俊綱僕桐生者。斬俊綱而降。義茂捕桐生送鎌倉。撫邑民而歸。後墮馬死。子重茂稱高井三郎。勇力類父。及義盛謀叛。獨不與焉。與義秀鬪。不克而死。是役也。府兵無敢抗義秀者。交搏共落馬。唯重茂一人矣。

野史氏曰。吾讀朝盛忠孝兩不立之言。哀之。抑兩立豈無道焉哉。當二世三世時。皆病北條氏專橫。而力能抗之者。獨有和田一族而已。誠能諫之以遏其私憾。而待國家可爲之機。

乘上直侍中之暇。徐陳當世之得失。論將來之安危。君臣相遇。如彼。其亦何爲而不成。或導此有方。制彼有漸。北條氏由是有所懼。而得自保。我亦以是伸吾志。而効其忠。君臣父子之間。豈無兩全之道焉哉。顧孱弱懼死。苟免其禍而已。而義盛武人。疎彊識不及遠。一往意氣。不能有所回避。以自取戮滅。是爲可哀耳。

[Faint bleed-through text from the reverse side of the page]

鎌倉史卷三十七當國四世今皇平丸昔從六部之錄耳且

二列傳第二十一並常禮重忠曰利限攻父何如

畠山重忠諱文重軍人神三浦義隆弟而誅軍

畠山重忠武藏男衾人小字氏王自曾祖重綱世為武藏總

檢校父重能為畠山莊司重忠廉潔以心言不二取信於人

義旅起時年十七以父在京不應焉以五百騎屯金江塞平

氏責也和田義盛三浦義連大呼犯其陣而過重忠曰我所

以不為佐公者以家君在輦下耳况於三浦氏素無纖介雖

然人犯我營而不擊是軍無名也縱兵追之及小坪擊殺多

多良重春等義盛呼重忠曰二郎耽新恩忘舊義以外孫抗

祖父可以訓乎。重忠母三浦義明女也。重忠家士榛澤成清。本田近常等見義盛求成。各收兵而別。既而義盛弟義茂自別道來衝重忠陣。義盛義連還兵援之。我兵死者五十餘人。近常復見義盛尋前議。義盛乃班軍。重忠歸謂其徒曰。卿等以三浦我親家也。動輒求和。是以吾亦無爲也。然我壯士死者五十餘人。今不報三浦氏。何以弔之。又何顏見其父兄子弟乎。於是與河越江戶金子村山諸族三千騎圍三浦氏衣笠城。義盛等不能支。棄城走。軍人斬三浦義明。既而將軍徇二總入武藏。成清近常勸重忠降。重忠曰。降則如父何。成清曰。源氏我舊事主。蒙恩四世。今屬平氏者。從一時之權耳。且

父子爲敵。兄弟異主。兵家常事。近取例保元是也。小坪衣笠事皆出於不意。佐公必不深咎。不如降也。重忠從之。初八幡公將伐陸奧。募兵于關東。重忠高祖武綱先應之。公嘉之。賜源氏白旗。於是重忠揭白旗。往降於長井渡。時三浦氏已從軍。將軍責之曰。衣笠死者可復起乎。重忠對曰。臣蠢愚不知去就。祇爲父在西姑出兵以塞責爾。小坪衣笠事則非臣本圖。君問之三浦氏情狀自明。將軍詢土肥實平。千葉常胤。僉曰。重忠雖年少。勇名聞于八州。且家世事我。爲今計宜舍前罪而收後用也。卽誅之。武相之士將皆解體曰。畠山氏尚如是。吾屬無所望。將軍曰。諾。出見重忠。偶見白旗而問其與我

同。重忠以狀白。將軍曰善。賜藍韋一片。命繡其旗。以識別之。曰宜居前列。立功自贖。自是畠山氏以藍韋爲旗識。旣而武相豪傑。皆相告來降。重忠父重能。與弟有重。從平維盛拒北軍。每戰疾力。而平宗盛猶忌之。欲殺之。平貞能曰。東軍用子。不似西軍殺父。宗盛慙而止。及京師失守。重能等從至淀。宗盛諭遣歸。重能曰。臣等蒙恩二十年。見危而去。不忍也。宗盛固遣之。乃東。將軍聞之曰。亦各爲其主也。赦而不問。重能退老。重忠襲職。重忠爲人多力。有長居者。自負其力。曰。八州無敵我者。獨與畠山二郎優劣如何耳。將軍命重忠角觝。重忠壓長居肩至地。骨碎氣絕。將軍築園池於永福寺。重忠捧大

石丈許。行池中。以待指揮。元曆元年。從源義經伐源義仲。北軍拒之。守治河。春水暴漲。義經欲試諸將。曰。俟水落乎。將由淀一口也。重忠奮曰。治承之役。足利忠綱涉之。彼亦人耳。非鬼神也。率五百騎絕河。馬中矢。乃潛行水底。大串重親者。其愛將也。溺水。重忠拯之。投對岸。重親謾然起。自名。號步軍先登。聞者笑之。時佐々木高綱。梶原景季先登。戰方酣。重忠揮太刀而進。北兵披靡。義仲從弟長瀨義負。欲當重忠。憚其勇。不戰而走。進入京師。與義仲戰。六條磧。得首三十六級。獲其將二河賴致。從義經護法皇六條宮。復出追義仲。至三條磧而還。從義經攻福原。下鶉越。從入南海。重忠每戰著勇。然而

未嘗爭功。廉讓冲退。其天性也。將軍伐陸奧。重忠爲先鋒。藤原國衡城厚。檜山以精兵二萬守之。其將金剛秀綱將數千人據山下。穿大濠。引遇隈河瀦之。重忠發武藏課役丁五十。負畚鍤而從。於是命運土石。頃刻填塹。擊秀綱軍破之。明日將攻城。三浦義村。葛西清重等欲先登。夜四鼓過重忠營。成清曰。君爲先鋒。而諸將犯我營而進。請以軍法正之。重忠曰。人各欲立功。若以軍法從事。是阻人之功也。不如爲不知以分功。諸將且進逼城門。疾戰拔之。大軍屯陣岡。宇佐美實政虜由利維久。天野則景爭之。將軍竊記二人鎧馬。命梶原景時問維久。景時倨傲。維久怒而不答。將軍更命重忠問之。重

忠躬布席進之。辭氣盡禮。維久喜曰。吾聞畠山公名久矣。今幸得見之。果勝於所聞。卽詳告之。爭乃止。陸奧平。諸將先登者。多得肥饒地。重忠賜葛岡郡。其地狹少。暢然自得曰。果如我志。重忠身體洪大。音吐如鐘。將軍每朝京師。以重忠爲前驅。威風堂堂。道路無不屬目。梅尾僧高辨。與其徒居。一日見煙塵乍起。其徒曰。京師火。高辨曰。不然。當有豪傑武士來。是其兆也。有頃重忠至。談華嚴而去。將軍定坐次三行。重忠與梶原千葉氏爲行首。重忠善歌謠。爲時所稱。數與將軍燕飲。然舉止儼然。有不可犯之色。夏日酷暑。儕輩有惰容者。見重忠在傍。爲之肅然。又愛才下士。士多就之。武藏諸將有相爭。

多質於重忠。目爲棟梁。終又以此致忌。重忠采邑吏掠伊勢大廟神田。將軍拘重忠。褫其傍四邑。重忠一謝而杜口不言。不食七日。將軍聞大驚。急釋之。復其所褫。特奪沼田御厨。重忠入謝。因謂同列曰。某清潔律身。而蒙此污辱。吏可不擇乎。旣歸。梶原景時乘間譖之曰。重忠嚮有怨言。而今鳩集族黨。據其邑管谷。是將叛也。宜先其未發伐之。將軍問結城朝光。下河邊行平。二人曰。重忠忠慤廉退。非叛亂徒。請試召之。召而來。非叛也。將軍乃遣行平召之。重忠卽來。鎌倉因景時陳謝。景時曰。子實不叛。宜上誓書。重忠允然曰。謂重忠貪暴抄掠人庶。我所深愧也。今以區區之身。而得叛名。適足以見吾

勇耳。自吾屬幕下。未嘗懷貳。而今蒙此誣讒。蓋亦命已。然吾心言不二。幕下所悉。何須誓書。子弟入白之。景時不能詰。入而白。將軍乃召重忠。談世事而止。二世立。結城朝光訴景時。重忠與焉。景時敗死。二世命波多野盛道捕景時黨人勝木。則宗於朝。則宗與重忠駢坐。盛道從後抱之。則宗多力不受縛。抽刀將刺盛道。重忠從傍扼其臂。骨碎。遂就縛。二世賞盛道。眞壁記內訴曰。捕則宗者重忠。非盛道也。二世召問重忠。重忠答曰。無之。退而責記內曰。凡爲士者。宜無邪心。子有怨於盛道。盍言躬獲之。而妄歸功於吾哉。盛道驍勇。非假手於吾者。記內慙服。重忠旣律身以正。而正人邪人不竝立。至是。

纔除景時。而北條時政又用小山田重成。重成者重忠從弟。與重忠皆爲時政婿。重成狡黠。時政甚愛之。而與重忠惡。會時政妻牧氏有憾於重忠子重保。時政令與重成謀之。遣人告重忠以府下軍起。誘之赴鎌倉。而誣之曰。叛。牧氏命子義時發軍殺重保於府下。而逆重忠於途。重忠至二股河。逢義時軍。又得重保訃。成清近常曰。我不知何由得罪。請還邑待罪。重忠曰。事旣至此。歸亦無益。且汝曹不見梶原平三乎。愛一時必死之命。而貽千歲叛者之名。前鑑不遠。豈復蹈覆轍哉。况重保旣死。吾何所顧戀。而再歸鄉里哉。移兵屯鶴峰。及戰中矢死。年四十二。義時傳首鎌倉。時政問軍顛末。義時曰。

重忠所率。不過百許輩。諸弟親族無從之者。吾以是知其不叛。而爲人所陷也。嚮見軍人效首。多年之交誼。不覺至噓唏墜淚。時政默然。恐其事發覺。急遣兵掩擊小山田氏。以滅口。曰。叛者族也。故誅之。重忠子重秀與父同戰死。次重慶爲僧。後有告謀不軌者。見殺。

野史氏曰。野卉蔓草。愈除之。而其種愈蕃。至奇花異品。世之所珍者。封植愈密。而其種或絕。寧奇姿之不善於世。抑天道亦有豐嗇耶。重忠天資廉潔。心言不二。膂力掩天下。而冲退自守。視之當時士流。猶叢中之獨芳也。加之外盤桓一州。內昏姻北條。封植非不密。而釁起於友婿。禍成於同族。疾風所

掃蘭芝無遺。何其悲哉。吾未詳東方地理。他年或訪菅谷之遺趾。渡二股河。顧望鶴峯。必有發吾感矣。

鎌倉史卷三十七 信實前美藤越前守公孫景時之志 其不

鎌倉史卷三十八

列傳第二十二

梶原景時

子景季 景高 景茂

梶原景時稱平三。相摸鎌倉人也。為人傲誕好氣。初屬大庭景親。圍將軍於石橋山。將軍逃于梶山。景時蹤之。知其所在。心憐之。乃欺景親而脫將軍。及將軍入鎌倉。景時依土肥實平請降。將軍德其嘗脫己於困厄。許之。景時粗通和歌。好尚風流。然苛察詭辯。喜中傷人。將軍謂可以為中外之耳目。任用之。寵冠諸將。將軍忌平廣常。命景時謀之。景時與廣常博伺其奪意。刺殺之。將軍壯之。擢為所司。將軍使弟範賴義經

西討。以景時及實平監軍。景時及源義仲戰于六條磧。得首十五級。獲其將淡路宗弘。二帥報捷於鎌倉。皆無戰簿。景時細書報之。將軍稱善再三。景時監義經軍。怙寵侮慢諸將。諸將畠山重忠等不平。及入京師。重忠去而屬範賴。既而景時與義經不合。去而監範賴軍。重忠亦去而從義經。景時啣之。範賴攻福原東門。與景時議傳令軍中。待後繼而戰。景時子景高不從。歌以諷父。單騎門于城。景時急罷令。率手下五百騎繼之。奪門而入。血戰而退。顧不見子景李。問卒咸曰。單騎深入。恐今既戰沒矣。景時揚聲大哭曰。吾老矣。所以苦戰為子孫地耳。源太死。吾豈獨生乎。旋轡復入城中。奮勇鏖戰。手

斬真鍋四郎。救景季而出。城陷。景時檻平重衡東。謁將軍。將軍命景時實平分部經略山陽五州。景時守護播磨美作。又別授美濃守護。景時復西入山陽。至淡路而還。文治元年。義經將攻南海。景時議船設逆櫓。以便進退。義經哂以為怯。景時誹議。不知其進退。義經怒相詈。諸將居閒解之。義經夜與數十騎發。景時深啣之。景時好陵人。範賴以下皆見輕蔑。而不敢抗焉。唯義經倨然不下。於是景時幸義經死于南海。不復出援。既而聞義經克屋島。急率二百艦赴之。見義經請為先鋒。義經不許而哂之。景時詈曰。此公無將帥之量。義經怒欲刃之。景時叩刀而進曰。吾獨知有我公耳。不知他人。諸將

復喻解之。景時愈益銜之。及西海平。景時欲爲讒閒之資。作奇瑞書。以上將軍曰。西海合戰之間。祥瑞尤多。幕下萬福。神明所祐。臣不敢忽。謹錄以聞。三月二十日。臣僕海太成光。夢有神童。自稱石清水使者。持書示之曰。平家以未日死。覺而語臣。臣異之。刻日待之。果如其言。攻屋島日。我兵無幾。敵見數萬衆幻出。又往年軍于長門。有巨龜泛海。徐徐上陸。漁者獲而獻之。參州。六人持之。僅能勝之。議欲解甲。參州偶有宿昔夢。命繫簡放之。及平氏滅日。龜復泛我艦前。竹簡依然。是時有白鴿一雙。翔我船屋上。平氏悉沒海矣。又周防之役。有白旗一條。見于空中。漸漸入雲。凡此等奇瑞。皆神明所以祐

幕下。誰不欽仰。然判官自以爲功。不思賴幕下多士之力。動輒有矜伐之色。而不恤將士。將士皆履薄冰。不復輯睦。臣深患之。屢諫而不見聽。旣觸忌怒。刑禍非遠。萬望幕下聖明神武。幸賜照鑒。令臣得速歸府下。將軍素忌義經。及得書大怒。使使入京。令將士無受義經節度。而召景時還。景時大喜。及歸。結北條時政。大江廣元等。以構義經。將軍乃奪義經食邑。不許入鎌倉。遣居京師。義經與備前守源行家交。景時曰。是共謀叛也。將軍遣景季入京。試命義經謀行家。以察向背。景季請謁。義經以病辭。間日見之。顏色憔悴。灸瘡數點。及傳將軍旨。亦託病依違對之。景季以狀反報。景時繼言曰。一日不

食體疲。一夜不睡神悴。如灸一瞬可灼也。况數日乎。將軍曰。然。是詐病耳。彼黨備州無可疑者。吾今決誅之。景時憮然曰。方今平氏既殲。天下精甲皆在君手。竊料膽勇精悍。誰爲判官敵者。奇計妙策。誰爲判官對者。他日爲幕下患者。必此人也。將軍曰。卿謂我麾下無人乎。乃召諸將謂曰。誰能爲我擊九郎者。衆莫敢答。將軍不懌。遂命景時。景時曰。君有命。馬蹄之所至。舟楫之所通。不敢不奔走。惟命。臣討判官。則非計也。判官素惡臣。臣往判官必備之。不如遣其所不意者襲之。乃命昌俊。昌俊者南都僧也。以事在鎌倉。性驍武。頗見親近。於是授計而西。義經殺昌俊。奔于陸奥而死。景時既得志。力至

能離間骨肉。諸嘗所憎嫉。莫不陷之。睚眦之怨必報。而人有就己者。必厚營救之。如城長茂。皆河太郎等。皆依景時免死。至其不就己者。如夜須行宗。壇浦之役有功。景時沮而不聞。及行宗自訴。又誣其詐。適有與行宗共軍者。事白。景時反坐。修鎌倉道路。以購罪。景時爲播磨守護。多不法。朝廷下書責將軍。將軍赦而不問。和田義盛爲侍所別當。丁喪。景時權行別當事。遂奪而不返。將軍不問。將軍朝于京師。擢功臣授官。景時與焉。以官回授其子。景時與時政廣元善。二人常護其短。是以寵益固。既陷義經。又欲中畠山重忠。誣以叛。請先其未發討之。結城朝光沮之。事不行。景時怨朝光。欲中之。朝光

亦有寵於將軍。未得間。右大將薨。太夫人北條氏命景時與時政廣元等共參決政事。景時遂以事中朝光而反爲所陷。先是景時以朝光失言。因誣爲叛。朝光大懼。乃與和田畠山千葉河野等。凡將校嘗爲景時所中傷者。六十六人。連署。訴景時讒諂陷人。二世以其書示景時。景時不能答。奔于其邑一宮。無幾復入鎌倉。二世使義盛逐之。徹其邸。施永福寺。景時乃陰蓄異圖。擁武田有義爲主。移書於筑紫將佐曰。奉宣旨管領鎮西。速來會京師。明年正月。舉族而西。至清見關。爲土兵所擊。死于狐碕。七子皆俱死。景時弟刑部丞朝景。因北條氏降。後黨和田氏敗死。

景季稱源太爲人傲奢。忿不思難。父子皆以善和歌自多。以諸將莫能當。以寵臣子命直寢室。將軍遣二弟西討。悉出善馬賜諸將。特留二駿。曰池月。曰磨墨。範賴請池月不能得。景季聞之曰。吾能得之。入而請之。賜磨墨。既而以池月賜佐々木高綱。及涉宇治河。與高綱相繼先登。追北入京。護法皇六條宮。福原之役。景季折梅花一枝。挿之簪。及入城門。敵四面萃之。景時旣引軍去。景季馬殪。堯墮。背巨巖自防。梅花繚亂。猶與八騎鬪。景時還軍救之。景季奮擊。斬菊池高望而出。景季風流勇名。由是聞于世。景季及弟景高。並以軍功拜左衛門尉。

景高稱平次。二子曰景員、景繼。及梶原氏滅，以其母嘗事太夫人北條氏，請宥二子。至三世時，並見徵用，頗以謹愨得寵。右大臣之拜賀，景員充儀衛。時人榮之。景繼夜侍將軍，誤滅燈，慙之，走入永福寺，髡髮爲僧。將軍遣使諭召之，不見，使者而逃，不知所終。

景高弟景茂，以父功拜左兵衛尉，有寵於二世。景時之奔于宮，留侍將軍。初，諸將之訴景時，中原仲業作狀。既而將軍與仲業等燕於比企氏，談及之。將軍曰：「景時怙寵讒陷，遂招衆怨。」景茂曰：「家父有寵於先將軍，今則何怙？」特仲業文墨利於弓箭耳，辭色不撓。時善其對。及景時復入鎌倉，遂共見逐。

景時將之京師，戒子弟曰：「道途所經，惟駿河有吉香氏而已。汝等可無懼。」及至駿河，吉香友兼與景茂交刺而死。軍遂敗。景茂子家茂被宥，後拜兵衛尉，亦爲讎所殺。

野史氏曰：公則明，私則晦。自古奸雄常爲讒人所晦者，特以其私焉耳。且如右大將之智，照景時姦而有餘矣。然而爲其所晦者何耶？譬猶明鏡，雖日照百媼，未害其復照妍也。然使一媼人常當前，雖有百妍於後，其照入鏡中者，惟一媼而已。夫天下固少正人，而其稱大姦巨猾者，蓋亦無幾。其餘則從利所在而已。人主縱一姦人，以伺察群臣，自以爲得計無害，而既不勝天下之從利於姦者多。於是乎，雖有一二正人已

不復能照。况當時巨熾大獐。吐舌瞋目。教之以隔其妍。遂至斬艾枝葉。截去羽翼。以覆其宗。嗚呼。是可以為後鏡也。

鎌倉史卷三十八。中曰。...

鎌倉史卷三十九

列傳第二十三

首藤經俊

首藤經俊。相模鎌倉人。稱瀧口三郎。父祖並屬源家陣歿。經俊變節事平氏。將軍將舉義使安達盛長。歷說八州豪傑。次抵經俊。經俊哂曰。卑語不云乎。貧賤喪守。以武衛敵平氏。猶埵壤抗富士。飢鼠圖良猫。及義旅起。圍之於石橋山。將軍入鎌倉。八州爭服。經俊倉皇出降。將軍責曰。鼠圖猫竟如何。命拘于土肥氏。將殺之。其母嘗乳將軍。入謁乞哀曰。兒罪誠不容誅。願君哀先臣資通。先夫俊通死事。以垂鴻恩。將軍不答。

命左右出甲示之。箭鏃著袖。具誌姓名。母知不可救。垂泣而出。將軍憫之。遂釋之。經俊壯武有幹局。時伊賀伊勢當敵衝。乃以爲伊勢守護。擊源義廣于羽取。山獲之。源義經之叛。其臣伊勢義盛聚賊攻守護廳。或訴幕府曰。經俊殆不免。將軍曰。吾知經俊矣。豈爲盜賊所害者哉。既而報至。果斬義盛。經俊襲父祖拜刑部丞。叙從五位下。以不由府舉被譴。無何得解。三世時。遷伊賀守護平賀朝雅。爲京師守護。因以經俊攝伊賀。會平基度平盛時作亂。經俊拒戰不利。朝雅以京兵伐平之。於是褫經俊守護。以二州授朝雅。後朝雅獲罪於鎌倉。經俊子持壽射殺之。經俊入請曰。願以持壽功復守護。不聽。

卒年八十九。持壽名通基。稱中山六郎。持壽其幼字也。

澁谷重國

澁谷重國相摸人。爲澁谷莊司。任俠好義。喜救人急。平治之敗。佐々木秀義落魄失所。重國以爲客。以女妻之。又以秀義子經高爲己子。義旗之起。將軍與書招之。不答。秀義遣諸子應之。重國懇留經高。不聽。乃特留義清與之。屬大庭景親。及石橋之敗。秀義諸子及將軍弟僧全成皆投重國。恃其俠也。獨經高恥前言。不敢來。重國出人索之。待如初。景親來欲收佐々木氏妻孥。重國怒曰。人之從事亦各有道焉。秀義遣四子爲義也。留一子爲恩也。吾與之從子於軍。而子欲收我親。

是何道也。景親乃止。佐々木氏得免辱者。重國力也。既降。從
範賴戰于豐後。有功。然舍軍先還。坐此不得賞。卒。子高重勇
敢而慎勤。深爲將軍所器重。特除澁谷下鄉貢稅。賞之。又食
于上野。特下教。停國衙催發。令別納。爲吉田地頭。建久中。除
其貢稅。而從官庫償之。以賞其匪懈之勞。又授市川地頭。後
與和田氏叛。敗死。高重弟高助。初隸平氏。平氏西奔。屬義仲。
義仲叛。屬義經。而擊義仲。追之入京。護法皇宮。重助有膽力。
南海之役。亦著軍功。義經表授右馬允。及將軍與義經有隙。
下書譴其反覆。曰。速備治工鐵汝頭。否人將斬之。終除名。

小山田重成

武藏人。稱稻毛三郎。爲人狡黠多計。善事人。初

小山田重成。武藏人。稱稻毛三郎。爲人狡黠多計。善事人。初
屬大庭景親。圍將軍於石橋山。重成勸乘義旅。未屬。先發擊
之。於是景親日夕挑戰。遂大敗之。既而降。坐詐掠食他人地。
無幾得釋。從範賴伐義仲。北軍拒之。勢多。重成渡供御瀨敗
之。建久中。從朝京師。還至青塚。使者來報妻病。妻北條時政
女也。將軍賜駿馬遣歸。既而妻死。悲哀爲僧。時政憫之。又愛
其慧黠。家事無大小咨問焉。時政之殄滅大臣。移奪國權。重
成與有力焉。而重成亦以此及禍。重成與從兄畠山重忠相
惡。當時政滅畠山氏。重成爲之計畫。諸將皆寃重忠而惡重
成。乃移兵掩擊小山田氏。殲之。曰。叛者重忠族也。故誅之。重

成弟重朝。

重朝稱榛谷四郎。性循謹善騎射。與愛甲李隆等齊名。將軍特命直寢室。將軍嘗命下河邊行平射。因目坐中求對。修理進季長起偶之。行平不起。及朝重偶之乃進。重朝有馬癖。陸奧之役。從軍七十餘日。日浴其馬。未嘗以一日而休。與重成共赤族。

金子家忠

金子家忠。武藏人也。姓平氏。稱十郎。以武勇名。逢敵則進。見血益勇。狂喜踊躍。不知所止。保元之役。從源左馬頭。門于白河殿。自呼姓名而進。源為朝顧左右曰。誰能挈彼來。高間四

郎出而交搏。家忠倒之。兄三郎馳救之。家忠并殺二人。須藤家末請射之。為朝曰。舍之。壯士可惜。吾他日得志。必召彼置旗下。平治之亂。屬源義平攻六波羅。力戰刀折。見足立遠元懇乞。遠元解從士佩刀授之。家忠大喜。又進犯陣。殺傷甚多。義旅之起。畠山重忠會諸將。攻三浦義明。衣笠城。義明據嶮。設三櫓。家忠將三百騎。大呼而進。矢著鎧如蝟毛。氣益勵。遂奪二櫓。義明歎曰。十郎不快。士乎送酒犒之。曰。武相之士。誰亦不剛者。而卿之舉錯殊可觀。請快飲以戰。家忠杖弓牛飲三杯。謝使者曰。吾意氣倍加。拔城在須臾。踊躍而進。義明命孫義盛射之。墜馬。弟近範援之而去。三浦餘一逐之。近範擊

殺之。霸府建家忠來降亦常從軍。

熊谷直實 附平山季重

熊谷直實武藏大里人。姓平氏稱二郎。大父左衛門尉盛方為北面。坐法誅。父直貞尚幼。與乳母奔于武藏。依小澤氏。及長。膽勇過人。郡之熊谷鄉有巨熊。害人。鄉閭患之。相與約曰。能殺熊者立為長。直貞入山搏熊殺之。於是立為私黨長。遂以熊谷氏焉。直實幼失所怙。育於姨夫。久下直光。性椎直。不能容忍。嘗代直光役于京師。同僚侮慢之。直實愠曰。彼侮我賤耳。人誰無心。不可復忍。即去事平知盛。直光怒收其食田。義旅之起。直實屬大庭景親。圍石橋山。既而降。從攻金沙城。

先登。直實勁悍驍果。無所回避。將軍極褒獎之。於是賜書復直光所奪地。元曆元年。從義經戰宇治河。射殪藤太兼助。從攻福原。直實有子直家。年十六。猛氣類父。直實謂之曰。宇治之役。欲先登。而為人所先。至今為憾。此行欲成宿志。直家曰。主帥常欲為眾先。且聞謀壓城後。是無為也。直實曰。男兒成功名。當先擇地。吾欲當西門。如何。直家曰。諾。未知季重何如。大人母為渠所先。

季重者。姓日奉氏。稱平山武者所。任左衛門尉。健捷有名。每臨陣。與直實爭先。直實使卒闕其營。季重命奴秣馬。奴叱馬。季重曰。畜乎。命在曉。且勿叱。卒反報。直實曰。果然。馳至一谷。

天未曉。父子當城門。自名挑戰。城中固閉。連射如雨。乃退。憇俄頃。李重果至。而門亦闕。李重先入。直實繼之。城兵二十餘騎圍擊之。李重旗卒見殺。李重追斬殺者。直家中矢。向父請拔。直實曰。創不重。姑俟之。復馳疾戰。城陷。直實追斬平敦盛。後幕府第。西門功。李重第一。直實次之。直實遇事不避難。意所向必果。將軍目以天下第一剛者。鶴岡流鎬馬。將軍命直實樹的。直實辭。詰之。直實曰。射者騎。樹的者步。自有優劣。將軍諭曰。擇器從事。初非優劣之。且樹的非賤役。新日吉之祭。車駕臨幸。則樹的。擬於瀧口。射手擬於本所。不是樹的。貴於射手乎。直實固不從。將軍怒。削其俸。直實終不可。後與久下

直光爭地相訴。將軍入問。注所親決之。直實木訥。乏口舌。見詰難。數四。恚曰。直光託梶原景時。景時幕下寵臣。巧言先入。宜臣言不用也。投文書於地。趨入西侍。援刀自斷髻。瞋目大叫曰。我不復上公堂矣。驅馬而西。遣騎追之。不及。將軍深惜之。急遽命宮根僧。倚關諭留之。直實不聽。長驅入京師。投黑谷僧源空為弟子。名蓮生。刻苦學問。終達其道。後數年來。過鎌倉。將軍延見之。言談頓別。將軍問兵法武技之要。議論詳切。悚動一坐。將軍苦留之。不聽而去。以承元二年歿。豫知死期。報親戚故舊。及臨終。來會者如堵。墻云。子直家夙負勇名。陸奧之役。從至小田橋。小山政光迎將軍饗之。直家侍坐。政

光指問曰。著紺直垂者爲誰。將軍曰。是本朝無雙勇士。熊谷小次郎直家也。其被稱重如此。承久之役。從北條時房攻勢多。敵方連射。直家曰。敵未可敗。何不暫休。以養銳。與衆臥地。飛矢如雨。堅臥不動。子直國稱平內左衛門尉戰死焉。

波多野忠綱

波多野忠綱。相摸人也。兄義經困將軍於石橋。後聞府兵來攻。自殺。由是沈淪。旣而忠綱及弟盛通。義景皆被赦。仕幕府。初岡崎義實見其陸沈。託姻婭。奪波多野莊。義景訴之。將軍罰義實直鶴岡一百日。而以地歸波多野氏。兄弟並善騎射。而忠綱又以膽勇著。建仁之亂。擊殺仁田五郎。三世時。拜中

務丞。和田氏之亂。先登者再。事平。三浦義村爭政所先登。忠綱怒詈義村。北條義時密諭忠綱曰。賊敗。因三浦氏反告。卿肯讓政所先登。我厚賞卿。忠綱曰。某雖無似。弓馬承家。不敢黷功貪賞。將軍廉問軍士。皆云赤甲駉馬之士在前。卽忠綱也。然忠綱坐詈大臣。以功贖罪。特賞子經朝功。經朝勇武類父。亦善射。二世嘗游大庭野。春雪初霽。禽獸成群。衆連轡逐射。皆無所獲。獨經朝獲二狐。將軍賞賜劍馬。承久之役。北條時氏率經朝及弟義重等七騎。絕大豆渡。官軍望風而走。進戰于宇治。官軍有熊野法印者。執太刀進。東軍披靡。經朝邀擊斬之。義重與官軍相拒。廷田挺前。敵射貫右目。義重奮而

答射之官軍遂敗。安貞中。經朝以捕賊功。益食一村。義重官至出雲守。為六波羅評定。

野史氏曰。千金之裘。不必一狐之腋。大架之棖。不必一木之枝。天下之才。不必一鄉之士。收長護短。而能者至焉。恩信以縻之。賞罰以厲之。而爪牙備焉。鎌倉氏之所以恢其業。其亦有得於眾士之力與。

鎌倉史卷三十九

鎌倉史卷四十四
列傳第二十四
河野通信

河野通信。稱四郎。伊豫著姓也。世掌本州州務。祖親清年老無子。禱三島神。生子通清。及長。身長八尺。狀貌非常。善騎射。名震一時。保元平治之役。屬源氏。及右大將起兵。通清舉兵遙應之。數與平氏戰。敗于溫泉。保高直城。備後人額西寂率兵攻之。城兵有內應者。通清死之。通信出奔于安藝。請兵于外舅奴田氏。得戰艦二十餘艘。如備後。以計擒西寂。以祭父墓。元曆元年。平通盛。平教經來攻。通信拒戰不利。復奔于奴

田氏平氏隨而圍之。防戰一晝夜。奴田氏出降。通信與殘卒六人走。追騎殪其五人。方與一人搏而頓地。通信斬之。提卒而去。抵豐前。與尾形惟義曰。杵維高。據今木城。教經復來攻。走歸伊豫。及平宗盛挾安德天皇據屋島。使人招之。不應。遣田口成直攻之。戰未決。會源義經攻屋島。成直還軍。通信乃率兵屬義經。擊平氏滅之。通信自起兵。獨當大敵。窮蹙奔走。不常其處。以故不能速奏功。然未嘗以一日而去兵。平氏常有西顧之患。將軍速得定東者。通信亂西之力也。西海平。將軍割伊豫州務爲二道。前授佐々木盛綱。道後授通信。又以南海道路遼遠難歲至。命以子弟代侍幕府。以優異之。陸奧

之役。從軍。以功增食。通信之先守興。酷好潔。飲食用陶器。子孫相承效之。是役也。通信載其器而往。世以爲口實。後遭梶原景時讒。奪道務。及景時敗。二世遣通信就國。深嘉宿功。并道前道後委之。又賜書以州內士三十六人隸通信。三世立。以勞增食。遂授州守護。後薙髮名觀光。以子通久侍幕府。承久之役。通久擊官軍於宇治。有功。賜地于阿波。是役也。天子詔通信勤王。率五百騎守廣瀨。王師敗績。通信見流于陸奥。貞應二年。終于流所。年六十八。通久子通有。拜對馬守。弘安中。元虜十餘萬。寇筑前。初元虜之警。通有祈神曰。我待賊。賊不來。則絕海伐之。至是通有大喜。舉族赴之。賊巨艦爲營。以

鎖聯之。鼓弩其上。俟薄擊乃發。我兵進者前後皆敗。通有與子通忠乘輕舸進戰。賊弩亂發。通有傷左肩。不能彎弓。右手揮刀益進。仆檣爲梯。躍入艦中。擒賊將玉冠者。斬首獻闕下。天子下詔褒之。增其食。孫通盛別有傳。

長谷部信連

長谷部信連。京師人。父爲連官右馬允。信連任左兵衛尉。隸高倉宮。治承四年。平清盛流之于伯耆。及平氏滅。右大將曰。信連首難之功臣。其召祿之。信連乃入鎌倉。賜能登大野莊。爲安藝檢非違使所。初以仁王之聚義事泄。清盛欲收王流土佐。遣檢非違使源光長。源兼綱等。率兵圍王高倉宮。源賴

政先知之。勸王遁於園城寺。王聞驚惋。信連進曰。王勿憂。臣能辨之。便入後閣。取婦人衣衣王。藤原宗信擔傘。僮鶴丸戴囊。日夕出宮以走。王有寶笛二枚。曰蟬折。曰小枝。居常不離身。及出偶遺小枝。信連於後得之。追及獻之。王喜命偕行。信連曰。官兵且來圍宮。圍宮不獲王。必四出掠王。恐王不能及寺矣。且堂堂王宮。無一人守衛之者。使奴輩恣蹂踐殿閣。臣之耻也。乃還開門待之。黎明光長等圍宮大呼曰。王叛謀既覺。臣等奉宣旨來邀。王速出。信連應聲曰。何物盜賊。敢爲亂言。王微行不在也。吏卒入門。信連叱曰。卑賤奴。何敢騎入王門。汝不知長兵衛尉信連在焉乎。拔刀而立。卒爭上宮。信連

縱橫奮擊。卒皆辟易不敢當。光長士有安清者。力兼十餘人。進當之。信連釋刀與之搏。挾安清於腋下。復執刀呼光長曰。我獲汝壯士。汝能救乎。光長懼不敢進。信連掀安清投地。氣絕復蘇。死傷者十餘人。信連亦折刀。乃躍出庭上。赤手而立。皆不敢逼。彎弓射之。中其左股。一人執眉尖刀進。鏃傷右股。遂見捕。信連詈曰。汝等田舍人。甚不解事。吾是靛負尉。何以縲紲。且吾雖不縛。豈遁逃者耶。乃送之六波羅。平宗盛見而詈曰。官吏收王。汝何殺之。吾決誅汝。然汝能言王之所在。及叛謀情狀乎。信連曰。吾不知王之所在。及叛謀情狀。縱知之亦不敢言。頃者聞劇賊入京師。窺王公第宅。託宣旨爲剽劫。吾常

警之。所以斬吏卒也。設有姦賊入公第。聞其稱宣旨。則坐見抄盜乎。意氣壯烈。毫無撓辭。清盛雅聞其名。欲收後用。宥罪流之。信連自少多力。年十六直瀧口。同僚有鬪者。止之不聽。乃挾之左右腋下。出門外。又嘗有賊入常磐殿殺人取財。宿衛皆畏不敢出。信連聞之至。立斬四人。賊傷其頰。信連益奮。復獲二賊。其勇力蓋天性也。信連姓甚長。故或單稱長。子孫終爲長氏。

僧昌明

僧昌明。京師人不詳其姓。初居叡山。號常陸房。文治元年。源行家源義經奔竄。北條時政入守護京師。募武勇者充警衛。昌

明應募。明年時政東歸，留從弟時定自代。以昌明等三十餘人屬之。是歲五月，時定聞行家匿和泉，遣兵圍之。衆聞行家多力善鬪，不敢前。昌明咄嗟赴之，遂擒行家，獻捷於鎌倉。由是著名，遂仕幕府。昌明食邑爲人所奪，文治之末，將入京訴之。因請賜書於京師守護，得以扶持。將軍謂求寓食也，與書藤原能保，令給之食。昌明得書不悅，入啟曰：「臣意欲鳴武勇，不圖以爲寒乞也。」將軍哂令改寫曰：「昌明雖僧，勇不耻士。在京之間，宜使爲直宿。」昌明乃喜。陸奧之役，從軍積功，爲但馬守護，賜邑移居焉。除法橋，承久三年，後鳥羽上皇旣殺京師守護藤原光季，使使賜院宣於昌明，勤王。昌明斬院使五人。

州內將士應官軍者，相率攻昌明。昌明避之山中，遂屬東軍，俱犯京師。當是時，凡在西之士，雖源家累世之臣，皆莫不屬王師。其決然以東者，昌明一人而已矣。北條義時深嘉之，曰：「軍士受命臨陣，死固其所而已。倉卒之間，是非未定，而先斬院使，非鐵心石腸者不能焉。」厚賞之。亂定，流雅仁親王于但馬，命昌明監護焉。

野史氏曰：右大將創幕府，熊爪虎牙，群聚如雲，然皆東北精英。至西南士，僅有此數士而已。河野通信至窮困奔走而不敢屈，以全舊好于源家。其尤嶄然者，大抵士必有鐵石不磷之操，而後可與言成事。是其所絕無而僅有，及功遂名成，與

方面將佐。比肩翱翔于府朝。光榮富貴。實所自取。豈向背之士所能企望哉。

鎌倉史卷四十一

列傳第二十五

大江廣元

大江廣元。京師人家。世業儒。多聞人。四世祖中納言匡房。教將軍高祖義家兵法。蓋由是源家世世執贄。廣元少涉史漢。智慮深邃。見天下之大機。慨然有當世之志。釋褐安藝介。年殊三十。湮厄不得調。及將軍創府於鎌倉。乃往屬之。時府下皆武力功臣。廣元為陳治亂。及為國之道。辭義敏切。深會將軍旨。禮遇日加親貴。舊臣無能間然。於是內與將軍謀議政事。外鑑諸將擢調才良。辨可替否。動合機宜。章奏文移。多出

于其手。將軍甚重之。表授因幡守。元曆元年。始置公文所以
廣元爲別當。西海平定。源義經。檻平宗盛送之。鎌倉將軍欲
見之。廣元曰。不可。嚮見平重衡。先帝猶在也。今公貴矣。而先
帝崩。豈有以堂堂貴臣對俘虜者哉。乃止。自義經西奔。物情
洶洶。天子詔七道捕之。不獲。將軍深患之。廣元進曰。世旣澆
季。姦宄得秋。今賴公威靈。關東稍稱寧靜耳。諸道遼遠。固難
坐鎮。屢叛屢討。差發東兵。則軍需不給。帑藏窮竭。無如。迨今
諸國置守護莊園。置地頭。皆用東士所在追捕。天下不勞而
自治。將軍大然之。奏請得之。乃布守護地頭于七道。兵馬之
權遂歸鎌倉矣。將軍大廣元功。賜食一莊。及諸道易地頭。武

人強梁。新陳相訴不已。廣元西入京師。乞院宣。繩檢澄汰。事
始謐。自是凡幕府有重事。廣元舍命往來京師。奏請皆允。鎌
倉所以得振耀威武。號令天下者。廣元力居多。建久元年。將
軍爲右近衛大將。明年。改公文所爲政所。廣元別當如故。尋
表授明法博士。兼檢非違使左衛門大尉。敘正五位下。關白
藤原兼實曰。彼世儒流。官不當踰外記博士。何得帶大尉當
使廳。法皇曲容之。尋解博士。是歲。廣元入朝。會法皇幸賀茂。
廣元陪從。賜厩馬舍人。明年。表解三官。久之。任兵庫頭。右大
將薨。與北條時政連署教令。二世又表遷掃部頭。大膳大夫。
是時。天下方定。而文教未振。廣元執府政二十年。明習典章。

精練機務。處斷如流。無有壅滯。大凡府中之疑議。僉決於廣元。故雖武功之臣。皆禮重之。其往來京師。將佐驢遺門前成市。至繫鞍馬百餘匹。建仁三年。二世疾病。比企能員圖北條氏事。泄時政欲及其未發擊之。往詢廣元。廣元對曰。政事則吾嘗與聞之。軍事未得與聞之。惟在君耳。時政默而出。既歸。復請廣元於其第。廣元欲往。家人皆懼請從。廣元悉止之。獨從家富宗長。誡曰。有事先殺吾。勿使吾首血他人刃。乃往。時政逼之問計。遂誘殺能員。三世立。和田義盛叛攻幕府。廣元與北條義時奉將軍避之法華堂。義盛退軍于前濱。廣元乃入政所護圖籍。既而義盛軍復振。將軍急召廣元。廣元與義

時謀弊厲將士。終破之。亂定。益食邑。尋敘正四位下。拜陸奧守。患眼去職。薙髮名覺阿。承久三年。後鳥羽上皇徵兵七道。討鎌倉。義時會將佐問計。諸將皆憚先發逆王師。欲扼足柄。筥根而防之。廣元曰。不可。守險彌久。人心內變。自敗之道也。宜直進兵攻京師。從之。以武藏守北條泰時爲將。待武藏兵至而發。廣元曰。未可。今群疑並起。變故不測。若曠一日。武藏兵亦不保其無他。請武州雖單騎。及夜先發。東士必如雲從。龍成敗之機。間不容髮。於是泰時卽發。羽檄所至。將士吐哺而從之。果大敗官軍。初。義時既遣軍。日夜憂懼。會雷震其廐。益大怖。問廣元曰。吾命窮乎。廣元曰。曲直之斷在天意。公何

怖。故將軍之捷陸奧。雷震其陣。此安知非吉兆哉。既而捷聞果至。上下相慶。皆如廣元所料。義時請廣元定其罪。天子廢之。上皇處流。大臣參謀者當斬。古來所未曾有也。廣元卒。年七十八。貞永中。北條泰時命清原季氏。藤原長定等。集壽永元曆以來。凡廣元所指畫。奏議。號令。功狀。勳級。割地。納賦之法。南都北嶺之制。及巨細文書。爲之目錄。以贈大江氏。貞永式目。實本于此云。五子並居顯職。親廣從五位下。右近衛將監。民部少輔。歷遠江武藏等守。薙髮名蓮阿。承久之初。衛京師。上皇逼之勤王。與藤原秀泰等守食渡。兵敗而遁。不知所終。季光從泰時犯京師。尾張河之戰。別攻鶴沼。又與三浦義

村。攻淀一口。皆敗之。歷左近衛將監。補藏人。敘從五位下。削髮名西阿。嘉禎中。爲評定。季光娶三浦氏。北條時賴之滅三浦氏。季光將行屬時賴。妻愠曰。棄親營利。非士也。季光乃屬三浦氏。死之。初廣元爲中原氏所養。冒其姓。後奏請復本姓。中原氏子亦仕幕府。

野史氏曰。良玉未割。與瓦石混。名驥未馳。與駑馬雜。及其割而瑩之。馳而試之。玉石駑驥。判然異別。大江廣元年。殊三十。湮厄不得調。卽調之外記而已。博士而已。及其一出佐霸王。觀世變於千歲之下。決時機於一日之急。四海夏制。萬乘移權。可謂曠世有爲之士矣。世或咎其失臣節於王朝。是固然。

然彼所謂風起雲蒸一龍一蛇與時翱翔與世變化者豈碌碌守一節哉且夫敗冠不敷屨其義則然若特冠貴以殘害面首武人疏強或廢冠不敢復用然則廣元遷主之策安知不為王家建萬代不拔之大計哉

中原親能

中原親能京師人為齋院次官性通敏涉獵經史長於尺牘仕幕府有幹事稱將軍發二弟西討以親能參軍謀政所建為寄人尋兼公事奉行先是問注教書皆用公印自是凡事屬忽劇者用親能印時幕府草創凡事合奏請者親能啣命入京師事皆辨濟表授美濃權守遷式部大丞文治三年以

事復入京師與大江廣元修開院六條殿敘正五位下拜掃部頭建久二年後白河法皇徙御法住寺召親能廣元延見殿上賜劔一口正治元年右大將薨遣親能入京師報喪且請二世襲職會乙姬疾病太夫人北條氏命親能奏乞御醫診視以親能妻為乙姬乳母也既歸會乙姬卒親能薙髮號寂忍承元二年卒于京師年六十六親能族有中原仲業者官左京進亦仕幕府參問注所為右筆頗有文名建久中以勞賜食邑結城朝光之訴梶原景時也仲業與焉諸將推仲業作書有養鷄者不畜狸牧獸者不育豺之語三浦義村擊節稱之承元中拜民部丞為公事奉行

藤原行政

藤原行政。京師人。父行遠。坐事流于遠江。母家與右大將有舊。遂以吏能進。與三善康信等齊名。軍謀機密。皆參預焉。政所建。爲令。表授主計允。轉民部丞。累遷出雲權守。山城守。居二階堂傍。子孫稱二階堂氏。二子行光。行村。行光。建久中。爲政所寄人。表授掃部允。轉民部丞。拜信濃守。建保中。增食。襲政所執事。行光博涉典故。資以綠飾吏事。又善和歌。三世常與之唱和。行村。拜檢非違使。左衛門少尉。爲上總奉行。元久之初。爲政所寄人。建保中。賜食一莊。調侍所司。子基行。行義。基行。美姿儀。便弓馬。三世時。爲近習。拜左衛門尉。右大臣之力戰有功。

鎌倉史卷四十一

[Faint bleed-through text from the reverse side of the page]

鎌倉史卷四十二

列傳第二十六

三善康信 弟康清

三善康信京師人也。為中宮屬。敘從五位下。沉敏有局量。恭儉退讓。以免於禍亂之世。其母為將軍乳母。將軍之在伊豆。康信月發三使。以報京師消息。二十年不衰。故將軍雖在遐遠。朝廷舉措。平氏動靜。無不熟悉焉。及以仁王敗。平清盛欲勦鋤諸源。康信使弟康清急報之。將軍得乘時先發者。康信忠蓋之力也。雍髮名善信。元曆元年。將軍已定關東。召康信輔政。始置問注所。聽民訴。康信為執事。不務摘發鈎距。虛心

待物以無冤枉爲要。故雖無灼然之迹。優游反覆。必得其情。府中疑議大事。將軍亦必延參決之。恐其或曠於職。故又舉康信子行倫參問注事。康信辭氣圓轉。不見圭角。最長諷諫。其與人言。溫溫其恭。雖觸其忌。而人不能怒。將軍嘗爲外甥女。課長絹百匹於大臣十一人。康信與焉。其五人旣致。康信等六人未致。甥女婚期漸近。將軍意色殊惡。召幹事臣責之。舉坐畏不敢言。康信徐曰。前數匹疾驅之。後數匹殆練之乎。將軍爲解頤。不復責幹事者。絹亦尋至。二世立。太夫人北條氏命與北條時政。大江廣元等參決政事。二世嘗得善算者僧源性。因欲檢治承以來所增諸將食邑。過五百町者。收之。

以與新進近習。事下政所。時二世酷暴。時政廣元等懼不敢諫。康信徐陳利害。二世乃止。三世立。時政專府權。嘗誣畠山重忠叛。遣子義時將兵逆擊之。以餘兵自守其第。府中無衛。康信病之。謂廣元曰。吾聞昔平將門叛於東國。而京師修關。今重忠近在隣州。而府中無備如之何。廣元以告時政。時政大慙。急率四百騎候府。康信能言匡救。皆此類也。承久之役。義時欲待兵集。廣元欲先發。議不能決。康信方病。太夫人北條氏強起之。諮謀。康信曰。天下安危。在此一舉。何不速出兵。而曠日間。議今雖兵未集。請先發一將。適與廣元議符。義時曰。二老議合。吾又何疑。卽夜遣泰時西上。康信涉獵史乘。尤

有文思。初將軍將攻京師。奉書於伊勢大廟。時府下多文士。而將軍遙徵康信文於京師。及文成。辭太華麗。美濃嘗獻白鴿。將軍顧康信問烏瑞。應聲對曰。天武二年八月。獻三足赤雀。三年三月。備後獻白雉。十五年大和獻赤雉。古來撥亂之主。多有烏瑞。時人服其強記。嘗夢從右大將游大倉山。有老翁教曰。此地清和朝。文屋康秀爲相摸掾所住。宜建精舍祀之。覺而異之。語右大將。將軍正病。許病已建精舍。既而右大將薨。其事遂止。常以爲憾。及三世時。將軍亦夢焉。遂建精舍。康信喜。以往年夢聞。三世問曰。史乘有康秀爲三河掾伴小野小町事。二人皆當仁明世。不知康秀及清和世乎。康信曰。

臣讀陰書。元慶三年。康秀任縫殿助。則及仕清和朝矣。但夢中事無實據。其爲相摸掾。臣亦未有所考。三世命左右記君臣所夢及問答語。爲精舍緣起。其以博識爲時所重如此。卒年八十二。子康俊行。倫康連。康俊累官右兵衛尉。民部丞。遷加賀守。承久三年。襲爲問注所執事。嘉祿元年。始置評定。康俊以問注所執事參之。時評定十二人。而康俊與弟康連從子倫重皆與焉。時論謂相門出相。康連繇玄蕃允。遷民部大輔。至阿波權守。博涉史籍。兼善律曆占候之學。北條泰時嘗欲有所行。司天官以道虛日忌之。既而聞是日天子行幸。徧問例於識者。康連舉吉例十餘事答之。世稱其博識不讓父。

最有史材。亦以匪懈致譽。泰時孜孜求治。昧爽入政所。諸士無能先焉。康連與倫重。及藤原業時等。侵夜入政所。以待泰時大喜。康連後爲問注所執事。兼引付頭人。泰時之撰式目。與康連定。卒年六十四。

康信弟康清。官隼人佐。亦仕幕府。爲公事奉行。有吏名。以善鞠有寵二世。子康盛拜左衛門尉。康盛子康知盛村。並喜武技。承久之役。北條時氏與康知等七騎。絕大豆渡。官軍望風走。追北至筵田。官軍留戰。發矢如雨。時氏命康知射之。官軍敗走。進亂宇治河。康知溺死。盛村奮戰。手斬三人。

藤原邦通

藤原邦通。京師人也。少涉書史。兼通天文。占筮。書畫。音律。諸技。任達不修。廉偶嘗爲判官代。非其好也。放浪於山野。以爲樂。將軍在伊豆。邦通介安達盛長謁之。將軍欲攻平兼隆八。牧寨。先遣邦通視其地理要害。邦通善歌謠。飲酒兼隆喜之。留數日。圖成。乃還授將軍。將軍大喜。與北條時政展圖。粲然如親臨境。將舉義旗。命筮日。簿書期會。皆關其手。霸府建。爲政所寄人。嘗重陽獻菊花。副詩一絕。將軍甚珍之。命每重陽獻菊以爲佳例。

清原實俊

附僧源性

清原實俊。陸奧人也。爲人有記性。嘗拜豐前介。罷而東歸。將

軍平定奧羽。求二州田簿戶籍。皆罹兵災。詢諸故老。乃薦實俊兄弟。實俊及弟實昌。以其所暗記脩地圖獻之。凡二州水陸道塗郡境田里之券契。無所不載焉。既校之地理。所漏僅三所而已。將軍大奇其才。遂收祿之。令參問注所。亦以吏才聞。子孫顯達。皆至評定。

僧源性者。不知何許人。父源整嘗拜左衛門尉。源性仕幕府爲右筆。二世時。陸奧有爭境相訴者。遣源性檢之。源性精算術。目力所及。推算頃步。不違毫髮。事竣。便路游松島。以其術校島廣狹。就一草庵宿。主僧曰。子以算自負。恐不及我。源性不服。僧乃取算繞源性坐。俄而雲霧晦暝。方丈爲海。所座席

化爲石。波濤洶湧。松風穿耳。源性恍惚不測死生。少焉。僧呼曰。如何。源性大懼。謝僧曰。復能以算自負耶。源性曰。不敢。既則霧晴。濤收。庵席如故。請受其術。不許云。源性兼善蹴鞠。二世數與之戲。

野史氏曰。初右大將創幕府。其下皆貔貅之徒。至文墨之士。惟有藤原邦通等。既而康信廣元等入輔之。而後政成於內。兵強於外。不數歲而海內大定。實俊源性等亦以異能進。又有平盛時藤原俊兼等。雖無赫赫之名。而文墨議論以緣飾治體。故建久之風。殆無耻王政。

鎌倉史卷四十二

[Faint bleed-through text from the reverse side of the page]

鎌倉史卷四十三

列傳第二十七

北條泰時

北條時房

北條泰時。初名賴時。稱江間太郎。遠江守時政孫。右京權大夫義時長子也。少仁厚。喜愠不形於色。嘗步出游。多賀重行逢之。不下馬。右大將聞之。誚重行曰。禮不別老少。因人加重。彼雖幼。非汝儕輩也。重行詐謝無之。將軍問泰時。泰時恐重行得罪。對如其言。將軍歎曰。異哉。金剛能掩人過也。賜刀一口。褒之。金剛泰時小字也。及長。宇量廣深。造次必於仁恕。容

納讜正。未嘗失色於人。明達善謀。能斷大事。二世立。耽好蹴鞠。不復視朝。會歲饑。災異累見。泰時私謂中野能成。曰。蹴鞠風流之技。好之無害。惟當與時用舍。吾聞故將軍嘗欲誓百日游海濱。逢天變即止。是後世所當取法。子親臣也。盍承間諫。能成白之。二世怒曰。踰父祖而易言何也。僧觀清密來告。泰時曰。宜稱病歸邑。俟君怒衰可也。泰時正色曰。下官聊忠告於侍臣耳。豈敢諫乎。然以此被譴。亦非所避也。吾有事於邑。明日將發。子勿以爲避焉。出裝具視之。時時政命泰時收所貸邑民穀。而邑不稔也。民相與謀逃。泰時至邑。悉召債家曰。吾本圖賑贍。豈求利哉。出契燔之曰。債了矣。幸勿爲念。

也。與之酒食。人給斗米。皆泣拜祝曰。願使君多子孫。建曆元年。拜修理亮。建保元年。和田義盛叛。圍幕府。泰時與叔時房督戰。躬先士卒。終破殺義盛。

時房者。義時弟也。敘從五位下。歷遠江駿河守。遷武藏守。雖無皎皎之節。亦無黷慢之累。爲士流所重。和田氏亂。定藉其食邑賞之。時房受而不辭。泰時辭曰。義盛言不叛幕府。惟恨臣父。臣爲父擊仇。焉敢受賞。請以賞臣者。恤死事之家。不聽。乃受。尋遷式部丞。兼讚岐守。固辭兼官。仍拜駿河守。敘從五位上。爲侍所別當。頃之。時房轉相摸守。泰時遷武藏守。承久元年。三世逢害。無嗣。大臣連署。遣政所執事藤原行光。奏請

太上皇二皇子中戴一爲鎌倉主。時上皇密謀討鎌倉。曰：朕要須遣一子東。然今則不可。姑待他日。朕授愛姬地。而地頭不從之。當先正其罪。乃遣使入鎌倉。勅褫地頭職。時房西入京師。奉對。因得藤原嗣主而歸。三年。上皇檄七道討鎌倉。義時令泰時先發犯京師。泰時諫曰：在昔平相國罔君。右大將奉勅掃殄之。關東相承。世奉朝廷。不敢失墜。今無罪被討。蓋議者之誤耳。然普天之下。無非王土。生養老死皆帝力。今悍然與之抗。非臣子之義。請東身詣闕。惟命是聽。天威不霽。舉族就刑。幸被宥。逃跡山林。亦何憾焉。義時默然久之。曰：汝所言。則明主在上之事也。上皇自登極來。政令紛亂。人抱愁怨。

鎌倉所管。僅能免荼毒。若政出王家。將置蒼生於何地。自下劄上。冥譴可畏。然本非爲一己謀。代天下之憂而憂耳。今我得志。廢昏立明。固皇基於萬世。宗廟之靈。豈不鑑我心哉。且此舉非侵掠宮闕。特除誤國佞臣而已。泰時曰：諾。已發。途還。復問曰：號令部署。既聞命矣。若乘輿親征。何以處之。義時良久曰：善乎問也。若遇乘輿。當免胄弛弓。委身下吏。諸將督師。則努力效死。有進無退。軍如失利。我不復見汝。泰時曰：敬諾。乃發。追遣時房副之。初泰時上道。兵僅十八騎。行三日。得十萬騎。自東海道進。上皇部署諸軍。拒之美濃尾張。能登守藤原秀康。檢非違使三浦胤義。前下總守中條盛綱等一萬餘。

騎守大豆渡。檢非違使藤原秀澄。山田重忠一千騎守洲股。神北賴經一千騎守鷯沼。朝日賴時一千騎守板橋。富來某一千騎守池瀨。皆阻河而陣。及他諸津。皆置兵守之。泰時向大豆渡。時房向洲股。遣毛利季光。足利義氏。狩野宗茂等。攻鷯沼池瀨板橋。既而東山軍攻敗大井渡。諸道官軍望風解走。山田重忠田軍拒戰。泰時擊走之。進與東山軍合。鼓行而西。京師爲之震。上皇欲據叡山。山徒辭。乃還。再遣中納言源有雅。參議藤原範茂等。率諸將守宇治。勢多淀一口。泰時進至野路驛。初安藤忠家被譴家居。聞泰時發。乃起從之。泰時曰。卿亦可從乎。忠家曰。僕欲戰死。不辭譴也。春日貞幸亦追

從之。東山兵小山朝長。幸島行時亦來見曰。願與公生死。泰時延行時於坐上。獻酬慇懃。贈以駿馬。行時感奮而出。既而時房攻勢多不利。泰時攻宇治。會大雨河漲。泰時欲待旦而進。足利義氏。三浦泰村。冒夜挑戰。亦不利。泰時下令休戰。明日。令芝田兼義探河深淺。行時忠家貞幸等。皆奮躍亂河。溺者八百人。泰時召子時氏曰。我軍將敗。大將致命之秋也。汝先進死之。時氏以六騎涉。泰時欲繼涉。初貞幸沒。水幾死。從者拯還。泰時手灸之。乃蘇。於是貞幸扣馬諫。泰時不聽。貞幸給曰。擐甲而涉。恐沈沒。請釋甲。泰時下馬釋甲。貞幸便奪馬去。不得涉。我軍涉者五百騎。時氏及佐々木信綱。芝田兼義

等先涉犯官軍。尾藤景綱毀民屋爲筏以渡軍。泰時乃渡。時氏縱火而進。官軍潰走。三浦義村毛利季光等破淀一口。胤義重忠走歸。欲奏事。上皇閉門不納。遂遁去。泰時進至樋口河原。上皇宣諭泰時曰。此舉非出震衷。爲臣僚所誤。汝宜論其罪。勿使兵士擾輦下。泰時時房入館于六波羅。報捷鎌倉。議曰。宜論罪從輕。不復究捕。遂奏求首謀者。上皇以權大納言藤原忠信。權中納言源有雅。藤原光親。藤原宗行。參議藤原範茂。藤原信能。答府議立高倉天皇孫。而徙後鳥羽順德二上皇。雅成賴仁二親王。獨土御門上皇嘗諫之。以不與謀不問。上皇曰。朕安忍獨留。乃徙之。公卿處斬。泰時時房難顯。

戮京師。分附諸將而東。斬之于途。獲秀康父子于南都。及府臣屬官軍者。皆梟之。義時命泰時時房分居六波羅南北。開府。號兩六波羅。關西機務皆綜理焉。居四歲。奸宄屏息。京畿肅靜。會義時卒。泰時時房至自京師。太夫人北條氏欲命泰時襲父執權。以其在喪不決。諮於大江廣元。廣元曰。第速決。人心自定。太夫人從之。泰時割父邑。多與諸弟。而自取太少。太夫人異而問之。對曰。臣業爲執權。他復何求。唯欲以撫諸弟而已。太夫人嗟嘆久之。於是泰時執權。時房連署。泰時後母藤原氏欲其子政村執權。與其弟光宗等謀。請援三浦氏。一府人皆懷危懼。泰時容止如常。或勸之備兵。泰時曰。無以

爲也。故禁人出入。獨許數輩而已。遣時氏及時房子時盛於六波羅。二人以府下洶洶爲言。泰時曰。京畿新定。鎮之非汝輩不可。遂遣之。有老婢密告曰。光宗兄弟誓於藤原氏前。雖不詳其顛末。而有不相渝之語。誠爲可怪也。泰時曰。約兄弟不相渝可嘉耳。旣而太夫人北條氏責三浦氏命大江廣元。論光宗等罪流之。事得寧。時幕府易主。而女君臨朝。動輒兄弟爭家。叔姪競權。時房恬淡自守。未嘗以利欲干懷。嘗置酒高會。聞泰時暴疾。左右請往省。不從曰。吾今日之樂。以武州存耳。一旦不諱。吾亦辭職遠遁。雖欲快飲。豈可得乎。歡謔自若。時房初稱五郎時連。以蹴鞠侍二世。平知康嘲之曰。連貫

也。慕紀貫之乎。抑貫錢乎。不如速改之。時房曰。諾。絕無愠色。遂改今名。承久之役。時房麾下多不得賞。時房數以爲言。義時不許。乃請納其地四所。而賞之。其寡欲與物不忤。皆此類也。嘉祿元年。太夫人北條氏。大江廣元等皆歿。泰時時房奉藤原將軍。銳意求治。改政所寄人。號評定。諮詢政事。又與三善康連等議。立憲法五十條。曰。貞永式目。以資聽斷。與評定十二人。誓曰。吾曹爲天下司直。所挾偏私者。神共殛之。武田信光與海野幸氏爭。上信之界。幸氏有證左。泰時直之。或告信光怨望。泰時曰。嚮和田氏請宥胤長。而先人處之流。彼不能爭也。顧公私如何耳。畏怨而枉理。何取於執權。信光聞之。

效書擔無他。泰時以示諸將。爾後相訴者皆先納起請。以爲例云。鎌倉嘗夜驚。武士爭先鍾門。禁之不止。乃使家令平盛。綱藤原景綱馳且呼曰。有叛者。衆皆從之。至海濱。二人顧曰。實無有之。然諸公擅舉兵何也。吾公不知其由。故引而遠之耳。苟無異心。各獻其旗。諸將皆授旗而去。泰時因機轉禍。率此類也。嘉禎二年。泰時進從四位下。兼右京權大夫。時房兼修理權大夫。尋進正四位下。泰時常推時房而下之。時房亦傾意待之。叔姪之間睦睦如也。曆仁元年。將軍將朝京師。泰時整頓部伍。日夜拮据。將發時。房猶與客圍碁。泰時贈行具。日晏方發。時人曰。匠作善逸。京兆善勞。鹵簿宿懸河。黎明。津

吏報曰。諸卒競渡。制之不聽。浮橋且壞。泰時往坐津頭。雖不一言。而行人自肅。行抵橋本。諸將爭占旅舍。北條實時後至。無舍。乃宿舞澤林中。泰時聞之曰。陸奧太郎非小侍別當乎。使其露宿。吾亦何煖坐。卽往同宿。足利泰氏。三浦義村等聞之。亦往。遠山祐時聞之。避舍以請實時。當是時。北條氏退讓之風。能馴服諸將。天下稱理平。時房。仁治元年卒。子時盛。官至越後守。泰時。三年。六月卒。年六十。先是。四條天皇亦崩。天皇之崩也。無嗣。凶問至鎌倉。泰時適與人飲。起席嘆曰。事去矣。天位至重。神人所主。然聽廷議所嚮。則安危難保。乃閉戶沈吟。幾忘寢食。意欲立土御門天皇子。然不敢自決。詣鶴岡

祠探籌。籌協乃遣安達義景立之。是爲後嵯峨天皇。泰時愛儒雅。敦親族。嘗在政所。聞朝時第有寇。卽起趨之。家令平盛。綱諫曰。明公位貴職重。宜無輕舉。如此小事。臣等奉命足矣。泰時曰。吾弟有急。在他人則爲小事。在吾身則不減。建保承久之難。苟喪吾弟。貴重何益。時人美之。曰。諫之者固善。對之者更善。朝時聞之。遺書其家。誠子孫曰。世世毋背武州裔。泰時不以權勢自異。常與諸將更直幕府。逮老匪懈。當直之夕。不敢辱。每詣右大將墳。拜于階下。或曰。盍上。曰。將軍在時。吾未得上。其進四位也。謂人曰。無功進爵。恐不令終。有僧說之。曰。建一寺。可以平安。曰。靡財蠹民。何平安之有。卽逐其僧。初

泰時在京師。聞拇尾僧高辨名。往謁問治術。高辨曰。治國家猶治病也。夫治病者。良醫能察其源。然後投藥。莫不立愈。庸醫反之。不究其源。而藥焉。徒益病耳。國家治之不成。其源實在人欲。君苟絕欲以率之。治可庶幾。泰時曰。已勉行之。而衆不從。奈之何。曰。語不云乎。身直則影不曲。政正則邦不亂。正也者。無欲之謂也。君心誠無欲。而率以風勵。誰敢不從。泰時感悟。及其爲政。常以其言爲法。尤勤於民事。其參政所。先衆而入。苟利於民。無知而不爲。寬喜中。諸州大饑。發倉賑之。或設厰救濟。諸將就富家稱貸者。待明年豐熟還本。幕府償其息。至貧者。子本俱償。損膳惡服。以身先之。及卒。天下知與不

知。皆悼惜之。三河本野原。曠莫。行人迷路。泰時命植柳標路。後人以比甘棠云。子時氏時實。時氏任修理亮。叙從五位下。先卒。時實爲從者所殺。無子。時氏子經時。稱彌五郎。文曆初。爲小侍別當。尋爲評定。襲執權。經時便騎射。嘗畋于藍澤。一箭斃熊。泰時誡之曰。政在文教。不在武斷。經時官左近衛將監。遷武藏守。亦長吏事。頗有祖風。稱于時。

野史氏曰。世稱泰時賢者也。然其所爲不合於道。時房善人也。然行出乎性而近於愚。以予觀之。蓋不然。時房爲武藏國司。爲政沿平賀氏例。泰時欲有所變更焉。而不聽。是當三世時。可見當初時房執論確然不動也。及泰時遇異母弟之阨。

彼雖賢明。豈無忌疑之心乎哉。况是時骨肉相謀。比屋騷然。於是時房洒然去其執持之見。而弗敢競。匡救弊順。以歸和睦。如聞其病。飲謔自若。是士行尤所難。而時房優爲之。愚者而能然乎。吾聞金章宗稱有志之君。一遭趙鄭王之變。乃疎忌宗室。而立柔弱無知之紹宗。鐵木真聞之。唾罵而叛。金源之業從此衰矣。益信北條氏之業所以益隆者。時房弗競之力也。泰時之事。使夫巖處高士。縱論之。則誠不合於道矣。然使之當其事。恐不能半其所得。然則由比浮鏡之夢。豈盡出妄談哉。

鎌倉史卷四十三

[Faint bleed-through text from the reverse side of the page]

鎌倉史卷四十四

列傳第二十八

武田信光

北越 東京

小川 弘著
村田直景校

武田信光。信義子也。小字光壽。稱石和五郎。少便弓馬。精悍果決。鉢田之役。與諸兄陷陣。信光先馳斬長田。由是著名。信義卒。三兄皆不當將軍意。信光乃舍垢飲光。深結北條氏。既而三兄皆得罪除邑。信光獨全。遂承武田氏之宗。建仁中。阿野全成謀叛。奔于駿河。信光捕之。送鎌倉。和田氏之亂。扼若宮大路。亂定。增邑。承久之役。與小笠原長清。小山朝政等。將兵五萬騎。自東山道進。將發。偶值十死日。家人諫止之。信光

曰勇士臨陣。十死固其所也。又何忌爲。勵衆以行。比至市原。上皇使者三至。勅諭歸順。信光斬使者二人。還一人曰。汝以所見報天子。進抵尾張。族弟大內惟信屬官軍。與築後有長。糟谷有久等。守大井渡。信光謂子信政曰。我惡人言我爲惟信。故不戰也。汝懋之。男兒功名在是時。無爲他人所先。信政使善泅者標津而亂之。官軍飛矢如雨。連殪數人。衆皆辟易。信政不撓。登岸奮戰。信光望見壯之。大呼犇勵。信政意氣倍加。大敗惟信軍。有長有久等被創而走。藤原秀康。三浦胤義等守大豆渡。聞大井渡敗亦走。是役也。東軍三道並進。而山道軍先捷者。信光力也。信光進與北條泰時軍合。官軍退守。

宇治勢多。信光進濟。供御瀨復敗之。以功爲安藝守護。自是益爲北條氏所信禮。晚年削髮稱光蓮。退居伊豆。卒年八十七。信光傳其家射法。最善追犬流鏑馬儀。北條時賴就受射法。情好款密。及卒。時賴爲建寺于市川。子信忠稱惡次郎。建保之亂。朝比奈義秀衝武田氏陣。將搏信光。信忠遮當之。義秀曰。孝勇棄之而去。後忤父旨見逐。北條泰時爲之陳謝。不聽。信光嘗游泰時家。信忠就訴泰時曰。某孝養匪懈。不知有何罪。如建保承久之役。代父蹈死地。明公所熟知。籍使乃公不記。明公何不少爲吾地。泰時爲懇謝。信光顧謂信忠曰。汝言不妄。我何忘之。然汝性行悖戾。我以義斷恩。汝當自省。終

不聽。信政稱小五郎。母源義平女也。以故將軍寵之。信光亦愛之。立爲嗣。至正四位下。累遷刑部大輔大膳大夫。

小笠原長清

小笠原長清。信光從弟也。父遠光稱加々美二郎。初長清與兄光朝共事平知盛。聞義旅起。長清託母病請歸省。不報。乃往守高橋。盛綱乞憐。盛綱悵然。向持佛堂合掌曰。平氏命窮于此矣。今留二郎毋益也。爲請知盛而還之。適將軍逆平維盛軍於駿河。長清謁于黃瀨川。將軍善其志。厚遇之。先是。父遠光以子故不出兵。至是起入鎌倉。元曆元年。遠光率二子從範賴伐義仲。戰于打出濱。獲首六十餘級。將軍表遠光爲

信濃守。初光朝爲平氏所拘留。不得歸。及平氏西奔。乃歸。將軍不善也。而特重長清。征西之役。將軍書教範賴曰。加々美二子。太郎不足惜。唯能寵禮二郎。長清善騎射。與信光及海野幸氏望月重隆稱四天王。後世矜式焉。承久之役。疾戰。以功爲阿波守護。幕議以公卿首謀者當斬。而北條泰時憚顯戮之。分附諸將。就歸途斬之。以右兵衛督源有雅屬長清。有雅以與幕府有緣。祈救于尼將軍。因請待報。長清不聽。既刑而赦書至。時論咎之。卒年八十一。子長經。長房。長經娶比企氏。爲二世所親狎。及比企氏滅。坐被幽。長房居阿波。子孫稱三好氏。

結城朝光

結城朝光。下野人。小山大掾政光子也。別食下總結城。稱結城七郎。初將軍徇地入武藏。朝光母八田氏。攜之候隅田河上。請以兒給事左右。將軍喜許之。親加之冠。賜名曰宗朝。後改今名。時年十四。以恭謹見寵。恆執護身刀侍側。源義廣之亂。將軍親禱鶴岡八幡祠。七日且拜神前曰。事遂如何。朝光率爾曰。此賊已爲家兄獲矣。將軍色然曰。此幾非少年言也。果然當厚賞汝。及歸得小山氏捷報。大喜。割義廣黨食邑賜之。源範賴徇山陽。朝光請從軍。已歸。復上直。將軍伐陸奧。軍至國見澤。藤原國衡據厚。檜城拒之。前鋒金剛秀綱率數千

騎陣于山前。朝光夜竊離直。且日斫秀綱營敗之。大軍攻厚檜城。朝光與宇津宮氏兵。間道向會津。攀鳥取越。乘曉霧襲之。城中謂大兵夾攻。遂驚潰。朝光追斬秀綱。由是功名大著。朝光結髮侍右大將。頗嫻辭令。建久中。落東大寺。會僧徒與護卒鬪。梶原景時諭之。遇僧徒倨傲。僧徒益鬧。將軍遣朝光諭之。敬跪加禮。說之曰。無慙之武士。猶思結緣喜供養之一。遇有智之僧侶。何好違亂妨我寺之再興。辭令甚辯。僧徒悚然敬服。有問其名而記之者。將軍益奇其才。景時亦爲將軍所寵。而景時所讒。朝光多救之。景時啣之。以其在君側未得間。右大將薨。二世立。朝光深感右大將殊遇。欲薙髮。初三世

之生。右大將聚諸大臣。託將來。朝光與焉。以故未果。一夕有所夢。勸府中人唱佛。因感恩述懷。朝光武人不知學。稱忠臣不事二君之語。景時因譖之。謂譏世茂。主是將叛也。宮人阿波局告朝光。朝光大懼。詣其友三浦義村詢之。先是。景時數讒滅大臣。府下皆切齒。於是與千葉和田畠山等同志諸將六十六人連署。訴景時構讒陷人。景時得罪。而朝光遂得免。初朝光兄宗政壯烈負氣。常謂門族中無及己者。及朝光訴景時。宗政初與之。既而慮後禍。不肯押印。物論醜焉。及三世襲職。朝光已老。然重右大將遺託。每行齋劍從之。如事右大將云。承元末。拜左衛門尉。和田氏之亂。將兵扼大倉。義盛不能

過。承久之役。與武田信光等。自東山道進。大戰于大井。渡敗之。尋叙從五位下。拜上野介。嘉禎元年。爲評定。非其好也。尋解之。并罷上野介。薙髮名曰阿。退居結城。三浦氏之亂。出兵援幕府。亂定。入鎌倉。見北條時賴。叙三浦氏平生之好。頗哀惜之。及論將士功。僉謂朝光不宜賞。時賴曰。朝光直無隱耳。今以微嫌。不賞勲老。恐非政也。乃賜一莊。朝光少小侍右大將。後又以功名見親信。府中事無小大皆參決焉。及北條氏執權。特重足利氏。足利氏亦自尊大。嘗與朝光書。斥稱結城上野入道。自署曰足利政所。朝光報書亦如之。足利氏怒。訴于時賴。時賴以問朝光。朝光曰。是不足以口舌爭。乃示右大

將手書。結城與足利爲對列。足利氏慙而止。元久中。命功臣家。徵右大將手書。小山結城千葉三家。上數十通。他無及之者。朝光善騎射。與兄朝政並入巧手。撰卒年八十七。子朝廣朝村有名。朝廣承久之役。屬北條朝時。自北陸道進。及宮崎定範仁科盛遠戰。越中般若野。朝廣奮擊。殺盛遠。大敗官軍。降林石黑諸族。尋叙從五位下。拜檢非違使。左衛門尉。襲上野介。調大藏權少輔。進正五位下。藤原前將軍時。簡士直府。朝廣與焉。嘉祿中。有偽稱僧公曉者。作亂白河關。朝廣與淺利知義擊平之。朝村稱細戶十郎。善射。從藤原前將軍朝京師。將軍省其宗家。游宴之間。家兒逸籠鳥。見將軍泣乞。生獲。

之。將軍命朝村射之。朝村取髀箭。削空其內射之。鳥入髀中而墜。納之籠中。啁噍如故。坐者皆感賞。將軍解衣。右府解劍以纏頭之。右府遂乞朝村。直其家。後歷官至阿波守。

大友能直

大友能直。本姓藤原氏。左近衛將監能成子也。小字一法師。爲中原親能養子。調右大將近侍。表授左近衛將監。有謙仗。宮六國平者。齋藤實盛外甥也。實盛屬平氏。死於北陸軍。國平爲東軍所擒。錮於中原氏。親能與之談兵。知其通軍略。及陸奧之役。親能請幕府釋之。因託能直曰。兒始從軍。功名富貴。賴卿力。國平曰諾。大軍宿國。見澤。能直上直。國平夜誘能。

直而出。旦日先登。戰厚樫城門。擊殺佐藤秀員等。以功賜食邑。能直曰。非臣功也。國平實輔之。將軍乃賜國平食邑。明年。大河兼任作亂。與羽。能直與千葉胤正等伐之。大小數戰。皆敗之。其軍略多出於大友氏指揮。將軍命留決二州軍務。能直具錄軍士功罪及亂人食邑。報鎌倉。將軍大稱之。事竣。召歸參侍所事。將軍畋富士。曾我祐成及弟時致。夜殺工藤祐經。行營大擾。將軍欲親出拒之。能直爭而止之。將軍嘉其忠。授豐前豐後守護。爲鎮西奉行。表授左衛門尉。檢非違使。建保初。南都僧徒與叡山鬪。命能直往鎮之。後拜豐後守。子親季襲鎮西奉行。

野史氏曰。武田氏爲右大將所忌。殆滅而後榮。所謂生於憂患者也。結城朝光。大友能直。皆少小侍右大將。終以功名著于世。豈才有所學。能起一家。而延慶于子孫。偉哉。

[Faint bleed-through text from the reverse side of the page]

鎌倉史卷四十五

列傳第二十九

三浦義村子泰村

三浦義村稱平六。義澄子也。少敏慧。便弓馬。西討東伐。皆從。以父功。官右兵衛尉。二世時。為土佐守護。梶原景時之讒。結城朝光。朝光懼。不知所為。詢於義村。義村為計畫。終滅梶原氏。三浦氏世有大功。勞于將家。義村又與北條氏通婚。威權次北條氏。北條時政之滅比企氏。畠山氏。義村皆與焉。因并滅小山田氏。時政既廢二世。而奉三世於其第。意思不測。太夫人北條氏命義村與北條義時迎三世。後時政復迎三世。

將毒之。太夫人命義村及長沼宗政等急迎三世。徙之義時第。府下勾勾。太夫人命三浦氏備兵。時政大懼。薙髮徙之于伊豆。由是益爲太夫人及義時所尊禮。從兄和田義盛與義時有隙。圖奉三世擊北條氏。請義村當幕府北門。初義村領小笠原牧。牧人與家臣鬪相訴。府議謂不勝職。罷義村。義村女爲北條泰時妻。而見出。義村鬱鬱不樂。遂從之。既誓而後悔。先期一日抵義時自首。義盛聞之。怨甚。急發兵圍幕府及義時第。而義時既自北門入幕府。義村拒義盛軍於政所前。事平。與波多野忠綱爭先登。忠綱有辭。義時曰。先登之功。措而勿論。變起倉卒。不日而平者。三浦氏之功也。增食一郡爲

司廐。表授左衛門尉。義村爲子泰村。娶泰時女。由是復與北條氏親睦。爲侍所司。表拜駿河守。及僧公曉弒三世。欲倚三浦氏以爲嗣。義村以太夫人命殺之。事詳公曉傳。義村弟胤義官檢非違使左衛門尉。舉止輕躁。樂酒好內。不屑人言。時政之弒二世。悉放其宮人。胤義視僧昌寬女鬢髮如雲。乃納爲妻。妻在宮中時生二兒。義時皆殺之。妻常痛之。曰。每見義時。心肝如割。胤義憐之。會朝廷徵宿衛。胤義率妻子役于京師。不欲復東。時上皇陰圖鎌倉。使西面藤原秀康誘胤義。秀康於酒間微說之。胤義奮躍應命。曰。臣兄義村亦必勤王。上皇大悅。徵兵討鎌倉。使胤義作書誘義村。曰。事成之日。賞當

從所欲書至。義村逐其使者不報。直抵義時。出書視之。遂共定議。犯京師。從北條泰時戰。大豆渡。大破官軍。追北至野上垂井。官軍退守宇治。勢多。義村建議。分兵五路並進。王師敗績。義村入京師。令佐原景吉攻胤義於東寺。胤義叱曰。汝非吾族人乎。與戰走之。盡亡其騎。獨與長子逃至木島。東軍充街。乃匿叢祠中。遇所識僧。僧告曰。前路咸塞。恐不能脫。長子聞之。先自殺。胤義謂僧曰。以我父子首視於我妻。然後致之。我兄僧如其言。義村送之泰時。安貞中。爲評定。初。義村承家。頗自脩飾。三世嘗詣鶴岡八幡祠。義村與長江明義爲儀衛。讓左相下。不已。時稱其有禮。至末年。意漸驕。藤原前將軍嘗

慶于鶴岡八幡祠。供奉既備。義村曰。慶事供奉始于承久。一旦有事。今所從皆匪器。請薦勇士。乃命其四子佩劍陪從。一府驚其擅。延應元年卒。子泰村。

泰村稱駿河二郎。性倨傲。以名家子。夙爲北條氏所遇。承久之役。義村向淀。泰村請父曰。嚮與京兆約從武州生死。請自此辭。義村分卒五十人與之。遂屬泰時。向宇治。泰村憤海道軍無功。與足利義氏勵士卒先進。與官軍爭宇治橋。戰不利。明日。泰時命子時氏先濟。時氏與六騎濟。泰村率四騎繼之。遂大敗官軍。斬將監一人。衛尉一人。寬喜元年。役于京師。歷掃部權助。式部少丞。拜若狹守。叙正五位下。歷仁初。爲評定。泰

時卒。孫經時時賴相繼執權。泰村益尊重用事。威焰赫然。驕蹇犯法。陵蔑諸將。與佐々木政義等論坐位。數相忿爭。又與小山氏鬪。時賴稍厭之。泰村弟能登守光村。自幼侍藤原前主。甚被寵待。及其見廢。光村護送至京師。臨別涕泣久之。曰。臣將有報德焉。既歸鎌倉。潛徵兵其邑。勸泰村圖北條氏。泰村不決。而光村意益銳。時賴稍覺之。延安達景盛陰圖之。而陽益親三浦氏。以泰村子駒石爲子。會有榜于鶴岡祠前者。曰。若州甚橫。宜加嚴誅。時賴有妹喪。次於三浦氏。俄而夜歸。曰。恐有變。泰村驚遽陳無他。明日。泰村邸有匿名書。曰。子將被誅。盡戒。泰村曰。是姦者所爲。毀棄之。使人謝時賴曰。人士

嗷嗷。府下不靜。家僕聞道路之言。爭來相衛。宜速散去之。如有事當奉指麾以周旋。時賴慰諭遣之。泰村意猶不安。日夕患之。大江季光妻泰村妹也。夜來告泰村曰。兄將及難。妾聞之甚悉。今舉事死。不舉亦死。請熟圖之。勿有貽悔。妹亦能使良人戮力於兄。泰村遂不能決。明日。時賴贈書載誓令罷兵。泰村大喜從之。使者出。妻賀進食。泰村以湯送飯。一饌乃吐。忽聞門外喊聲。安達氏兵來攻。泰村錯愕。急起防之。時賴遣兵助安達氏。大江季光來援泰村。時賴令火其北隣。煙焰掩邸。泰村不能支。出趨右大將影堂。光村以八十騎據永福寺。請泰村。泰村報曰。命盡力窮。雖據金城何益。均死死將軍影

前矣。光村乃至。從騎多死。府兵遂圍影堂。光村慷慨曰。向從我謀。豈有今日。引刀自釐其面。問曰。猶可識乎。遂自殺。泰村泣曰。我積功於幕府四世。又與北條氏昏。內外盤結。自以爲安於泰山。乃亦不免於禍。顧先人多滅不辜。豈其報耶。何啻北條氏之怨。與其族二百七十餘人。其黨二百餘人皆死。時寶治元年也。時賴後聞其言悲之。爲釋其妻孥。泰村弟胤村在陸奥。聞難。薙髮投小山長村。請曰。臣在遠郡。不與事。長村捕送鎌倉。弟光村家村資村長村重村皆與兄同死。有季弟僧良賢者。弘長中。與家村子圖復讎。發覺見殺。

安達景盛

安達景盛稱彌九郎。盛長子也。敏慧有器局。少小爲右大將所親寵。三世時表授右衛門尉。伐畠山重忠。先登。景盛素善北條義時。義時用事。引參謀議。當牧氏圖三世時。政見黜。諸大臣多避嫌疑。不敢言。景盛獨無所迴避。由是益爲太夫人及義時所重。累拜出羽權守兼秋田城介。三世遭害。景盛悲哀爲僧。遯高野。改名覺地。稱大蓮房。已而復出省。妻子遂往來山都之間。從意所適。承久三年。後鳥羽上皇討鎌倉。太夫人北條氏懷幼主臨誓。景盛傳宣其言。乃從北條時房犯京師。景盛女適北條時氏。生經時。時賴及二人執權。益被尊禮。時賴忌三浦氏。嘗延景盛圖之。因以詭言激之。景盛歸責其

子義景泰盛曰。汝曹不見三浦氏狀乎。昔者右大將之待先人。與彼無有軒輊。而彼今如此。異日將加無禮於我。何不及今爲之計也。會有匿名書。曰三浦氏圖亂。景盛從而構成之。遂滅三浦氏。自是北條氏秘議密計。無不預焉。安達氏大著。景盛寶治二年卒。子義景嘉禎中。襲秋田城介。叙從五位上。仁治初爲評定。四條天皇之崩也。無嗣。泰時欲立土御門帝子。遣義景入京師。義景途還曰。如順德皇子既立如何。泰時曰。煩卿爲此等。宜廢之。義景遂立後嵯峨天皇而還。建長中。祝髮名願智。尋卒。八子皆顯于時。第三子泰盛襲秋田城介。正嘉初以引付頭人爲評定。時大江三善之徒碌碌備員。獨

安達氏威權益隆。泰盛以善騎名。弘安中。兼陸奥守。請解秋田城介。以子宗景代聽之。尋薙髮名觀真。元虜寇西海。泰盛子弟與戰有功。泰盛既與北條氏連姻。勢漸橫肆。執權貞時。其外甥也。貞時宰平賴綱。頗張威福。而泰盛未嘗加禮。泰盛子宗景狂躁。奢侈甚於父。初右大將密通比企尼女丹後內侍。後以配盛長。生景盛。宗景因謂曾祖景盛實右大將子也。遂改姓源氏。賴綱因譖之曰。有異圖。貞時信之。擊滅安達氏。初三浦氏之滅。景盛實陷之。世以爲報。

野史氏曰。余讀三浦安達傳。悲其罹禍之慘也。夫以二氏之勲。又姻北條。而不免於族滅者。無持滿之道也。木之折也必

通蠹。牆之壞也。必通隙。滅二氏者二氏也。非他人矣。語曰。必忠信以得之。驕泰以失之。可不戒乎哉。

鎌倉史卷四十五

鎌倉史卷四十六

列傳第三十

北條時賴 子時宗 時宗子貞時

北條時賴。小字戒壽。稱五郎。修理亮時氏子也。時氏早死。時賴與兄經時。並為祖泰時所鞠。嘉禎三年。藤原前將軍親臨冠之命名。表拜左兵衛尉。遷左近衛將監。叙從五位上。少機警。神明秀發。折節勵行。三浦氏嘗與小山氏鬪。經時遣左右援三浦氏。時賴不動。泰時深譴經時。而稱時賴。傳之沐浴邑。賞其番直之勞。泰時卒。經時執權。寬元四年。經時有病。傳執權於時賴。先是。將軍傳位於世子。是為藤原後主。時賴從叔

光時有寵於前主。因勸圖時賴自代之。流言滿巷。兵士四集。時賴遣吏卒扼下馬橋。而以兵自衛。光時倉皇入幕府。請前主遣使諭時賴。前主使者來。時賴不敢見。光時知事不成。削髮謝罪。流之伊豆。從前主還京師。連坐甚多。北條重時鎮六波羅。時賴欲召之共事。詢三浦泰村。泰村沮之。泰村驕蹇。時賴素忌之。而其弟光村與前主通謀。時賴乃召外祖安達景盛。以語動之。又探一叢祠得禱書。土方次郎所納也。曰吾不與三浦氏逆。神其照之。訛言紛興。時賴丁妹喪。往宿三浦氏族。人悉集。各託治具。更起入內。時賴頗恠之。夜聞障外有披甲聲。曰果然。招一卒。徒步而歸。明夜使人訶三浦氏第。皆畜

兵仗。時賴乃戒吏卒。將士聞之。爭抵時賴。泰村使人謝時賴。時賴遣使令罷兵。既而安達氏兵攻泰村邸。時賴不得已。令弟時定助景盛攻三浦氏。令金澤實時守幕府。泰村光村走入法華堂自殺。於是召重時於六波羅連署。建長元年。拜相模守。三年。進正五位下。時賴頗涉學。文武兼濟。擇二道師。薦後主學焉。又寫貞觀政要一部獻之。其理世安民皆有所本。然主將弗平於上。士之不得志於執權者倚之。是以世常懷疑懼。既而前主復使長久連僧了行等誘鎌倉諸將。佐々木氏信縛之。送時賴。四年。時賴遂廢藤原後主。徙之京師。迎後嵯峨天皇子爲王。是爲親王始世。而養關白藤原兼經女。納

爲妃。初源氏嗣絕。太夫人北條氏請皇子爲嗣。不許。時賴蓋成其志也。時賴居常多病。自謂壽不長。將辭職。兄經時二子並爲僧。不得居職。時賴子時宗尚幼。不得襲職。康元元年。時賴傳執權於重時子長時。削髮名道崇。卒年三十七。時賴深留心於民政。建長元年。改問注所制爲引付五方。置頭人。以評定充之。自是凡爭訟皆經政所而決之。時政義時以來數發間使。分曹行郡國。問民寃。至時賴命被緇衣四出。多所摘發。而間使又稍因爲奸。時賴晚年親出按之。吏不能欺。皆以爲神。會伊具入道爲人射殺。訴于府。吏不得蹤跡。問於從僕。對曰。昏將歸山內宅。途上觀騎馬被蓑衣。從一奴相過者。旣

而主人中矢墮馬。顧視之。則人影已滅矣。時賴令檢屍。鏃孔如鑿。塗以毒。速命執諏訪入道。諏訪曰。昨與客飲。至夜未嘗出也。因引平俊職。收入道爲證。二人所言亦同。令鞠諏訪。堅持不服。時賴密引諏訪見之。曰。奴已承矣。卿雖強辯。府議已決。然皆憫卿死。卿盍自首。冀有生路焉。諏訪攬淚吐實。遂誅之。二人者流之人。問何以知之。時賴曰。初檢鏃孔。知非凡手。因思伊具邑。本諏訪所領也。予奪之間。必有宿怨。是以知之。衆服其明察。時賴善用人。嘗擢青砥藤綱任政。自是法詳刑清。內外稱治。又患士氣委弱。屢試壯士騎射。校其能否。嘗入幕府。命直候人角觝。士皆羞裸體。不敢解衣。然久之。士氣大

振族父宣時嘗夜詣時賴時賴手一壺酒曰欲與子共之奈無所得肴何照紙燭入厨獲殘豉干碟取以佐酒其自奉儉薄此類也頗通禪理以宋僧道隆爲師爲造建長寺又造最明寺自老焉臨終作偈曰業鏡高懸三十七年一槌破碎大道坦然死之日士無親疎悲慕慟哭薙髮持服者甚多至下教禁之而不止其得士心如此時賴母安達氏號松下禪尼秋田城介景盛女也嘗設食招時賴兄義景來助治具尼方手補紙障義景請命他人代勞尼不顧義景曰補之不若新之之省勞尼嘆曰吾豈不知之凡人居富貴不與驕期而驕自至欲使少年人知守儉惜福補敗理壞而止耳義景慙服

世稱時賴克儉母教所致也建長之始祈年於伊勢神宮時賴使東條次郎奉幣見御裳濯河紅如胭脂時賴聞之驚惋從是動履彌慎終得治名云子時宗時宗小字聖壽稱相摸太郎爲人強毅不撓幼善騎射弘長元年將軍入於北條重時極樂寺新第觀笠懸特命射小笠懸諸士無能焉時賴曰太郎能之召而上場時年十一跨馬出一發而中萬口齊贊時賴曰此兒可承我家者託從父長時視之十三叙從五位下任左馬權頭與族父越後守實時掌小侍文永元年長時傳執權於政村而時宗連署二年進從五位上兼但馬權守累遷相摸守三年將軍稱病不出召

僧良基嚴慧等禱之。而不御藥。物議騷然。兵士四至。良基等出奔。幕府諸士亦引去。留侍者五人而已。將軍遂還京師。時宗奉其世子而立之。是爲親王二世。上皇使左少辨藤原經任問北條氏意。知其無他乃安。五年。時宗代政村執權。時宗有庶兄時輔。與長時弟義宗。俱鎮六波羅。時輔居常快快。愧降於弟。九年。二月。時宗聞其有異志。令義宗擊時輔。殺之。先是。蒙古殆滅宋。勢威強大。四方致貢。獨我邦不通信。蒙古主命高麗。致書於我。書辭多失禮。朝廷草答書。下之鎌倉。時宗執爲不可。蒙古主復遣使者趙良弼來。時宗令太宰府逐之。使者前後數反。皆拒不納。十一年。蒙古兵一萬餘。寇壹岐對

馬。令鎮西諸將拒之。虜兵遂遁去。建治元年。蒙古已改國號曰元。復使杜世忠何文著等至長門。時宗致之鎌倉。斬于龍口。梟其首。修築太宰府水城。以上總介北條實政爲鎮西探題以守之。當是時。朝野洶洶。天子憂惶。禱祀無虛日。時宗昂然以戰爭自期。以安危自任。於是人心粗定。士氣大奮。弘安二年。元使周復等復至宰府。復斬之。元主怒。大發舟師。使范文虎將蠻軍十萬。洪茶丘忻都別率蒙漢三萬軍。高麗軍一萬隸之。四年。七月。抵水城。舳艫相銜。實政使諸將防戰。屢敗之。虜以累失利。乃退據鷹島。時宗遣宇都宮貞綱將兵援實政。未到。閏月朔。颶風大作。虜船破壞覆沒。流屍隨潮入浦。浦

可踐而行。少貳景資等因奮擊殲餘兵。蠻軍十萬得還者三人耳。洪茶丘等別軍頗有逃還者。而高麗軍亦喪七千餘人。虜終不能得志於我者。蓋時宗之力也。卒年三十四。子貞時。貞時。小字幸壽。弘安五年。任左馬權頭。七年。時宗卒。襲執權。時年十四。明年拜相摸守。安達泰盛以外祖用事。與內管領平賴綱爭權。賴綱譖之。八年。遂滅安達氏。賴綱獨專政。後賴綱圖殺貞時。賴綱愛少子而疎長子。為其所告。貞時殺之。貞時既滅二氏。孤立無倚。正應二年。九月。府下夜驚。貞時疑懼。廢將軍。徙之京師。請後深草天皇子立之。是為親王三世。五年。高麗使其臣金有成來說曰。宜通使於元。不則元復出兵。

貞時錮有成不還。元稍絕覬覦。正安三年。貞時廢後伏見天皇。立後二條天皇。初後嵯峨天皇二子。後深草龜山相繼昇位。後嵯峨特愛龜山。遺詔時賴曰。龜山之後。永承皇統。乃以長講堂領為後深草上皇湯沐邑。上皇不悅。欲倚時宗以得政。時宗不敢從。既而龜山天皇傳位於子後宇多天皇。上皇憤怨欲削髮。時宗乃以上皇子為後宇多儲貳。是為伏見天皇。伏見天皇立。三年。有賊夜入宮中謀逆不成。自殺。六波羅檢之事連龜山上皇。上皇賜誓書於貞時。以明無他。天皇密勅貞時曰。龜山在位。憤承久事。陰有所圖。特未發而已。立其子孫。非卿家利也。貞時乃立天皇子。是為後伏見天皇。後宇

多遣使責貞時。貞時更廢後伏見而立後宇多上皇子。是爲後二條天皇。因定議後深草龜山二統。每十年更立。以定策勲。進從四位上。尋削髮名崇演。造最勝寺老焉。卒年四十一。貞時慕尚時賴之風。留意於政事。既罷執權。迺被僧衣。周游郡國三年。以觀風俗訪民病。子高時泰家自有傳。

野史氏曰。嗚呼。吾讀時賴時宗貞時傳。而知人未有不可爲善之時矣。不幸雖失之東隅。猶當收之桑榆。三子廢君易主。內則兄弟有不睦之聲。外則大臣有忌滅之虞。一功十過。罪不相掩者也。然而稱武門吏治。則必曰時賴貞時稱戎狄扞禦。則必曰時宗。天下後世無之或非也。吾以是知北條氏之

用心於軍國深矣。其以倍臣執國命。能傳至九世之久。非徒然也。假令宰天下者。生涯無一過。然而深宮坐食。身不知艱難。不察吏治民患爲何事。終亦不若三子所爲也。夫樂舉人善者。君子之心也。見其不善而內自省者。覽者之志也。善惡兼舉而不掩瑕瑜者。史氏之法也。吾故并傳三子而論之如此。

[Faint bleed-through text from the reverse side of the page]

鎌倉史卷四十七

列傳第三十一

後藤基綱

後藤基綱。左衛門尉基清子也。貞應中。爲藤原前主近侍。領越前守護。表授左衛門尉。安貞二年。擢評定。尋役于京師。久而不調。愈益謹慎。年四十九。始得檢非違使。寬喜中。東歸。基綱性辯給。有學識。器量過人。嘉禎初。復遣參六波羅。時南都僧徒。與八幡宮寺。論事相鬪。南都遂奉春日神木。犯京師。鼓躁至木津河公卿聞之。皆杜門。基綱獨促駕而發。往說僧徒。僧徒乃罷歸。南都強梁。輕上命。自古而然。於是基綱一說卻

之幕府深嘉賞之。表授佐渡守。基綱東歸謝幕府。既而南都復大騷。據嶮築城。將作亂。幕議命畿兵伐之。復命基綱入京師圖之。基綱誘一僧。悉得南都地圖戶籍。乃獻策。置大和守護收興福寺封邑戶。補之地頭。僧徒聞之大懼。兵未合。壞城歸寺。由是基綱吏名大躁。尋東歸。兼引付。藤原後主時坐北條光時事免職。基綱善和歌。其邸在大倉。頗有泉石之勝。將軍時臨之。卒年七十六。子孫並居顯職。

青砥藤綱

青砥藤綱。其先伊豆人。本姓大場氏。祖近鄉。承久之役。戰于宇治河有功。賞賜上總青砥。徙家焉。因以爲氏。近鄉生藤滿。

藤滿有庶子。自幼穎敏。命爲僧。能勤其學。過弱冠。蓄髮改名藤綱。聞僧行印通儒學。又就學之。居數年。恍然有得焉。乃出干北條時賴。時早。時賴施僧祈雨。又自詣三島祠。藤綱私從之。見牛渡河。洩中流。藤綱曰。汝亦倣北條公薦佛耶。衆恠而問之。對曰。今民憂旱。令渠洩於田畝。雖微焉。猶不愈於無乎。今僧之在鎌倉。貧富貪廉不齊。而公之施不甄之。貧而廉者。寧餓不來。徒飽富而貪者。奚異牛之洩於水哉。時賴聞之。召見與語。大悅之。恨相見之晚。時北條氏政稍衰。吏奉職無狀。時賴召藤綱問曰。今吏多不職。告訴日衆。我思濟之。未得其道。豈我行有所失。汝具言之。我敬受以爲師教。不敢以爲臣。

諫汝母有所諱焉。對曰：臣不佞，自修之不暇，何敢言君非。然君言及此，而臣不言臣罪也。以臣所觀，君行未有所失，而國事如是者，左右壅蔽，上下隔遠爾。夫告訴衆者，吏治不良，民俗日薄也。今吏不職者，皆有所做，自不知其非也。府下相訴者，皆賂遺權要，權要爲之地。吏因或反其曲直，或有罪不坐，姦人日富而民含冤矣。近者既如是，遠者又做之，習以爲常，故雖數黜罰，無能懲其後。然而君不之知，壅蔽莫甚焉。所謂階前千里，門外萬里是也。夫下含冤而上不知，近地猶然，況遠國乎。如此而不已，恐終及亂。因至士風輕浮，儒學謬乖，巫祝誑欺，僧道姦穢，無所不言，皆鑄倉所有，而時賴未嘗知之。於是

大驚，乃錄評定以下姦回不職者三百人，從輕重罰之。又遣使七道，以察外吏貪虐無道者，皆罰之。擢藤綱爲引付，表授左衛門尉。藤綱爲政儉以自率，不過每食乾魚一片，衣袴用粗布，刀劔室不飭，而喜施於人。其聽訟，讞未嘗枉己而徇人。嘗有人與北條氏封人爭地相訴，衆皆畏執權，反曲直以擬之。藤綱平反之，其人德之，裹錢三百貫投其後圃而去。藤綱怒曰：吾直其直，欲使我君無秕政耳，豈敢私於彼哉。郵還其錢。又嘗夜過滑川，從者墜十錢於水，買炬照水而撈之。炬直五十錢，或笑之曰：少得大失。藤綱曰：幣之於國，寧有彼此。炬直五十錢，我失人得，水中十錢，誰復得之者。吾惜其朽壞

No.5

No.4

No.3

耳。笑者大愧。執權嘗欲加之祿。曰夢神告我增汝祿。藤綱辭。執權曰何辭。曰今以夢增祿。他日又以夢斬之耶。終不受。藤綱得其君。以展力於時。後世稱循吏者。皆以藤綱為首。

二階堂貞藤

二階堂貞藤。民部丞藤原行政六世孫也。以才學名。拜檢非違使左衛門尉。兼出羽守。當北條貞時執權。貞藤輔之。頗稱治平。貞時卒。貞藤祝髮改名道蘊。及北條高時執權。長崎高資事。鎌倉政衰。貞藤居常憂之。高時捕廷臣及僧圓觀等。欲謀廢立。貞藤諫曰。國權東移。百餘年于茲矣。威服四海。榮傳九世。無他。世尊王室。布德惠於下民也。今者囚廷臣。流貴僧。

為已甚。又復放天子竄親王。人謂之何。神明在上。可不畏乎。語曰。君雖不君。臣不可以不臣。苟使我無釁。朝廷何能為。益效臣節。天威亦必霽矣。高資睨貞藤曰。何論之迂也。獨不知承久故事乎。高時遂聽於高資。命貞藤帥兵而西。謀廢立。遂攻護良親王於吉野。用部將岩菊謀。夜繞出敵後。夾擊之。城陷。助大佛高直攻千窟城。會王師復京。帝素聞其名。又嘉其嘗諫高時。特原之。食其舊邑。無幾。謀叛見誅。

野史氏曰。自國家佞佛。叡山南都。橫比鴨河。劫掠無已。用兵不絕。基綱之略亦足賞矣。藤綱撈錢滑水。與程正叔雍華墜錢事酷相似。世固有不期而同符者。豈非以其所見出於公

耶。貞藤之諫高時。何其言之美也。惜乎不知出處之大節。特能言之而不能身蹈之也。語曰。不以人廢言。不其然乎。

鎌倉史卷四十七 寶曆王入關之何林即五上下不哥乎

鎌倉史卷四十八

天列傳第三十二

北條仲時

北條時益

附陶山義高小見山氏真守都宮公綱
陶山高通河野通盛

北條仲時相摸守基時子也。叙從五位下。拜越後守。元德二年。為六波羅北方。時益鎮南方。

北條時益。左京大夫政村曾孫。越後守時敦子也。拜左近衛將監。元弘元年五月。北條高時令六波羅捕僧圓觀。文觀忠圓等。先是。天皇圖討鎌倉事。泄。高時捕廷臣藤原俊基。藤原

資朝按之。不服。於是捕圓觀等鞠得狀。再執俊基殺之。使二階堂貞藤以三千騎入京師。命仲時時益廢天皇。殺山門坐主護良親王。仲時時益未發。帝微服逃於外。六波羅遣兵索宮中。不獲。乃奉兩上皇太子于北方。拘大納言藤原定房中。納言藤原公明等。叡山僧來告。天皇在延曆寺。六波羅遣畿兵五千向山前。近江守護佐々木時信向山後。時信者左衛門尉定綱四世孫也。率七千人戰辛崎。斬僧直源等。而敵援兵水陸來圍。時信不能支。敗歸。既而山徒聞天皇非真。乃散。天皇實逃南都。遂幸笠置。南都僧來告。六波羅令時信率州兵備叡山。遣檢斷糟谷宗秋。隅田通倫等。帥兵圍笠城。城堅

不拔。河內人楠正成備後人櫻山茲俊起兵應官軍。仲時時益告變於鎌倉。高時遣大佛貞直金澤貞冬將數萬騎西上。未至。陶山義高。小見山氏真陷笠置城。

陶山義高。小見山氏真俱備中人。率手兵五十騎。向西阻河而陣。聞軍不利。援兵且至。謂其下曰。汝等不見四面攻兵乎。朝攻朝死。夕攻夕死。骨骸未朽。聲名先滅。死一而已。均死則死于功名。庶幾得千歲之下照竹帛。汝等以為何如。士卒皆奮曰。誠然。二人曰。古來功名之士。如熊谷平山。佐々木兄弟。豈有他術哉。資大軍之威。而收一身之功。發而中機。危而後成。如是而已。今者舉十倍之兵。而攻無援之城。而不

能拔。又請援於關東。是舉天下而敵一城也。誠有奇謀良策。以陷此城。真垂功名之秋也。汝等其無意乎。皆答曰。謹從教。於是命作長繩十丈。每尺一結。上繫一鈎。候風雨夜。攀城後石壁。敵果恃險不設備。踰壘入城。歷伺諸營。有誰何者。對以風烈警夜。大呼警而過。敵終不喻。至城北高丘。見一坊舍火之。進燒諸營。城中震駭。外兵聞喊聲。皆起應之。三面夾擊。五十人者。隱見分合。殊死而鬪。莫不一當百。城兵狼狽無鬪志。爭開北門走。天皇亦與左右逃。追獲之。送於六波羅南方。東兵聞筮置陷。轉攻楠正成赤坂城。拔之。櫻山茲俊聞之自殺。高時使廢天皇立伏見上皇子。卽位。是爲光嚴天皇。正慶

元年。從後醍醐天皇于隱岐。令千葉貞胤。小山秀朝。佐々木高氏率兵護送。既而楠正成復起兵。取赤坂。進屯四天王寺。六波羅遣隅田通倫。高橋宗康將五千人攻之。大敗而還。乃遣宇都宮公綱。四天王寺時時六波羅一休言其別而五宇都宮公綱。下野人。左衛門尉朝綱七世孫也。容貌雄偉。兼通兵略。拜備前權守。遷治部大輔。高時聞京師多虞。使公綱率紀清兩黨助守六波羅。會畿兵敗歸。仲時時益曰。是由將愚卒怯。乃召公綱曰。勝敗雖兵家之常。豈無制之之道哉。使此輩再往。必復覆師。鄉使吾曹鎮京師。今復煩足下西者。以備緩急耳。今日是國家成敗之機。自非足下誰能任之。願足

下無辭焉。公綱曰：大軍失利於前，而以寡兵承其後，吾未見其利。然僕自受命而西，誓死以自効，何敢辭難。跨馬而發，從者僅十餘騎。比過東寺，追隨者七百人。公綱曰：吾不思復歸，逢人則掠其馬以益軍。疾馳至柱松，正成軍聞其兵寡，請逆擊殲之。正成默然良久曰：兵法固有以寡敗衆者。公綱東州精鍊之士，寡兵來承大敗之後，是期必死也。不如避其銳，棄營宵逃。公綱進取四天王寺，報捷六波羅。一府皆喜。既而正成夜炬南山漸近，公綱嚴備待。如此連夜，士衆稍倦思歸。六波羅又不出援兵。公綱乃引而歸。正成復取四天王寺，遂城于千窟。於是皇子護良、赤松、則村等起兵，據吉野、白旗諸城。

事聞鎌倉，高時遣阿曾時治、大佛高直、二階堂貞藤等率五萬騎西上。二年二月，分兵攻諸城。時治向赤坂，貞藤向吉野。高直向千窟。既而赤坂、吉野皆陷，合兵圍千窟，不能下。高時遣使六波羅，責諸將逗留。六波羅迺使公綱援諸將。公綱已去，而官軍愈逼京師。六波羅徵山陽兵，兵降於則村。據三石以扼西道，則村進據摩耶山。又徵南海兵，伊豫豪族土居通治得能通言等起兵，反爲官軍擊敗。長門探題北條時直、六波羅遣佐々木時信將五千人攻則村，大敗而還。於是數戒隱岐守護嚴衛先帝，而先帝潛逃至于伯耆。關西響應。六波羅再遣萬人攻則村，又敗。則村乘勝縱火來攻，隅田通倫、高

橋宗康率兵二萬拒之桂川。又大敗。則村子則祐日夕亂流來擊。新帝兩上皇入六波羅府。府因大出兵於七條磧。遣通倫宗康率三千人。軍于八條院。陶山高通。河野通盛率二千人。軍于蓮華王院。

陶山高通。備中人。壯勇通於兵機。河野通盛。伊豫守護通信五世孫也。初名通治。多力便於弓馬。高通謂通盛曰。烏合之兵不可用。不如餌於敵以乘其弊。通盛曰。善。通盛兵三百騎。高通兵百五十騎。合爲圍陣。向蓮華王院。遣餘兵先馳向八條磧。發喊。敵聞喊聲。皆西其馬首。高通通盛衝其背。奮勇血戰。解而復合。大敗之。還抵七條大宮。望朱雀街。通倫宗康戰

將敗。通盛曰。疾驅救之。高通曰。救之則勝。勝則彼不謂藉我力。姑待之。通倫宗康果敗走。乃進躡敵後。縱橫奮擊。又大敗之。敵收敗兵。復入七條。府兵與戰不決。高通通盛既破朱雀軍。復驅衝七條軍。則村軍皆敗。退扼八幡山崎。二將得首七十三級。捕虜二十餘人。獻捷於六波羅府。天子親見二將。擢高通爲備中守。賜鞍馬一匹。通盛爲對馬守。賜劍一口。通倫宗康耻無功。見則村兵敗退。謂則村必死。夜馘街上積屍梟之。圓顱者便假爲則村榜之。則村首凡五。都下嘲之曰。假者必生息。則村分身益寇無窮之兆。則村塞關西運路。府遣畿兵五千攻之。陷伏敗還。京人曰。何不遣陶山河野。而取敗衄。

也。二人由是名重一府。既而山徒又奉護良令來攻。府遣曠騎擊走之。因啗以利。使時信備之。而則村復入京師。高通通盛再敗之于京南。獲首八百。而先帝遣中將源忠顯奉恆良親王。率大兵來攻。時信率通倫宗康高通通盛等擊卻之。斬其將太田守延等。而結城親光降官軍。士卒多逃。府告急於鎌倉。使者相踵。四月。高時遣名越高家足利高氏等赴援。高家與則村戰狐川。被鮮甲挺進。中箭死。高氏傍觀不戰。下馬張飲。遂降官軍。與忠顯則村三道攻京師。京師兵三萬。大半吏胥不習戰。仲時時益乃據府爲城固守之。擊卻忠顯。既而府兵大潰。只餘千人。糟谷宗秋曰。城不可守。不如及東面圍。

未合。奉主上趨鎌倉。以圖後舉。仲時時益然之。夜奉兩上皇。新帝太子東走。土寇環起而射。時益死之。太子以下四走。矢中新帝肘。高通吮其血扶上馬。天明。又遇兵數百。破之而過。明日至番馬驛。土兵數千奉龜山天皇子守良。夾路而陣。宗秋擊破其前鋒。而兵疲矢盡。走入佛寺。與仲時謀欲據近江一城。近江守護時信殿而後待之。不至。仲時曰。是亦叛矣。乃謂其兵曰。獻吾首於官軍。此我所以報諸君之勞也。乃自殺。年二十八。從死者宗秋以下四百餘人。新帝兩上皇被執入京師。先是。公綱攻千窟。肉薄破柵。更令士卒前者鬪。後者鑿山。旬餘日。傾二槽。一軍倣之。城將賴會王師復京。公綱與大

佛高直等奔于南都。謀犯京師。楠正成等率兵來攻。公綱據般若寺拒之。相持數日。會天書招諭。公綱以七百人降。野史氏曰。六波羅之敗。不足咎也。蓋天下之事。恆相因而至。故天子失其御。而將家收其民。將家失其御。而北條氏收其民。北條氏失其御。而民無所歸。然則元弘之事。雖無王家。北條氏必亡。皮之不存。毛將安傅。其斯之謂也。

鎌倉史卷四十八
今以圖對舉
其地於上
天皇于中
其地於下
天皇于下
其地於上
天皇于上
其地於下
天皇于下

鎌倉史卷四十九

列傳第三十三

北條高時 弟泰家子時行

北條高時。小字成壽。相摸守貞時子也。年甫九歲。貞時卒。遺命安達時顯。長崎圓喜輔之。叙從四位下。任左馬權頭。正和五年。代北條基時執權。文保元年。拜相摸守。高時為人頑放。舉止無度。時荒忽如病狂。特以適襲職。委政於時顯。圓喜二人。協心修泰時舊規。頗稱無事。尋圓喜以老罷。子高資代之。高資性多慾。事以賄成。陸奧人安藤堯勢。與族季長爭邑而訟。皆賄高資。高資皆納之。不決其訟。二人怒。據邑相攻。遣兵

伐之不克。高時不以為意。日夜飲宴。一日見狗鬪。喜之。遂令民貢狗。狗數千。附諸將養視。載以籃輿。道路遇者下馬俯伏。每月鬪狗十二日。又好田樂。樂師亦數千。纏頭所費以萬數。一夕高時獨醉舞。有樂師十餘輩。歌以佐之。婢妾闕之。皆異物也。歌曰。見天王寺妖靈星乎。既去。獸跡狼藉。高時乃醒。無有所見。藤原仲賴聞之曰。妖靈災星見則國亂。亂其自天王寺起乎。於是人皆知其不終已。而高時有病。高資勸削髮。更名宗鑑。高時弟泰家謂當以執權傳已。高資勸而傳之於金澤貞顯。泰家母愠曰。四郎汝失職。何以立世。當祝髮以隱。泰家乃為僧。高時病愈大愧。欲殺貞顯以謝母。貞顯自髡謝之。

諸將爭倣之。圓顯滿朝。高資又推赤橋守時執權。北條維貞連署。眾情益不服。高時漸不平。高資密令長崎高賴圖之事。泄乃委罪高賴流之。內外怨憤。攝津渡邊氏。大和越智氏皆起兵。高時命吏卒討之。不克。後醍醐天皇見高時失政。竊喜之。令權中納言藤原資朝。右少辨藤原俊基等。誘美濃源氏土岐賴兼。多治見國長等。事覺。六波羅北方北條範貞。託擊攝津亂民。召四十八所。得三千人。襲賴兼國長。殺之。時正中元年也。二年。高時遣兵收俊基資朝。按之。不服。高時怒。謀廢立。天皇賜誓書。高時意解。奉還誓書。釋俊基流資朝。而天皇意益銳。元弘元年。高時執僧圓觀。文觀等。以其咒詛北

條氏也。初後伏見帝之廢也。貞時議定皇統曰。後深草龜山二統。每十年更立。後二條龜山孫也。傳位後深草孫花園。花園將傳之於後二條子邦良。而龜山特命立後醍醐天皇。天皇後二條弟也。既立。以邦良爲儲貳。而不欲傳之位。欲傳其長子尊良。高時不可。邦良薨。天皇又欲以第三子護良爲太子。遣使告後嵯峨遺命。高時堅執。貞時議立後伏見法皇子爲東宮。天皇怒。以護良爲山門坐主。以呪詛北條氏也。高時既鞠圓觀等得狀。再執俊基。後伏見法皇亦使人來具告天皇謀。高時乃大聚諸將吏問謀。衆無敢言。高資曰。前者不果廢立。所以貽悔也。今速遷車駕。流親王。公卿預謀者斬之。事

乃定而已。二階堂貞藤諫。高時不聽。遣貞藤等率三千騎入京師。天皇聞之夜逃于南都。遂幸笠置。六波羅兩帥北條仲時。北條時益遣兵圍笠置。而楠正成據赤坂。櫻山茲俊起備後。高時遣大佛貞直。金澤貞冬等督武藏相摸伊豆駿河上野五州兵二十餘萬西上。未至笠置陷。乃幽天皇于六波羅。貞直等引兵攻赤坂拔之。茲俊軍散自殺。高時復遣貞藤及安藤高景奉東宮卽位。是爲光嚴天皇。正慶元年。高時獻僧衣於先帝。請削髮不聽。乃請新帝詔徙先帝于隱岐。徙尊良親王于土佐。尊澄親王于讚岐。廷臣預謀者斬之。已而正成復起兵取赤坂。進屯四天王寺。仲時時益遣兵攻正成。取四

天王寺而不克守。正成復取四天王寺。遂城千窟據之。於是皇子護良赤松則村相繼起。據吉野白旗諸城。高時遣義子阿曾時治與高直貞藤高資帥五萬騎攻之。二年春赤坂吉野皆陷。合兵攻千窟。千窟未下。先帝出隱岐。幸船上山。勅四方討北條氏。四月高時遣名越高家足利高氏將兵西。高家戰死。高氏降官軍。合兵攻六波羅。仲時時益奉新帝東走。皆途死。高時未之知也。獨聞高氏叛則恐。發上野下野等六州兵。附弟泰家西。因徵糧於郡邑。次至新田。新田義貞斬其使而舉兵。高時大怒。罷西師。遣金澤貞將櫻田貞國分道攻義貞。貞國及義貞戰于入間河。殺傷相當。退守久米河。明日復

合不利。復退次分倍。高時遣泰家援之。拂曉搦挽強三千齊射。而全軍棄之。義貞大敗。泰家勝而驕曰。烏合之衆一敗皆敵。必有斬義貞首來送者矣。卸甲休士。邀妓縱飲。三浦義勝叛屬義貞。爲之先鋒。卷旗疾進。偵卒來報。泰家曰。然我徵三浦族。今來耳。俄而義貞義勝鼓躁斫營。泰家駭走。橫溝八郎安保道堪殿戰死之。而小山秀朝千葉貞胤亦叛。貞將與戰。敗走。諸軍敗歸鎌倉。而六波羅敗聞亦至矣。上下失色。長崎高重高資子也。豪放無賴。不事生業。祖圓喜憎之。於是高重自軍還。創夷滿身。提所獲首級。視高時圓喜。圓喜曰。我平生憎汝不事事誤矣。幸能爲主公致死。有烏津四郎者。容貌雄

錄傳史 卷之十
三志 卷之十
偉。圓喜愛之爲義兒。命護高時。旣而義貞三道來攻。高時遣基時貞直守時等拒之。守時守子囊坂。敗還。其妹足利高氏妻也。曰吾與被猜疑而生。不若速死。乃自殺。貞直守極樂寺坂。亦敗還。其家士本間獲罪家居。是日。以手兵出戰。斬敵將大館宗氏。致首貞直。謝罪自殺。貞直感愧。後遂冒敵陣死。基時與義貞相持于假粧坂。而義貞將選兵二萬自稻村崎入。高時聞海道軍不利。手斟三爵。飲島津四郎。與愛馬遣之一軍屬目。四郎漸近敵陣。免胄而降。敵乘勝而進。放火府中。高時以千餘人逃于東勝寺。貞將拒山內。身被七創。還見高時。高時勞之。授相摸守。爲長門筑紫兩探題。署與之。貞將題書

背曰。棄我百年之命。報公一日之恩。馳赴敵死。基時國時亦死。諸道不守。軍士雲散。獨高重奮勇血戰。左右衝突。所向皆披。還見高時曰。事已至此。公宜自爲圖。然臣猶欲一快戰。以爲冥閒話柄。公且待之。乃乘所愛馬。與百餘騎。撤旗裹刀。雜入新田氏軍。狙擊義貞。垂及而覺。大呼奮擊。馬上掀敵一將。投之數步外。敵軍辟易。高重走至東勝寺。高時方訣飲。屬觴高重。高重三醕。傳之攝津道準。屠腸出之。曰。請侑飲焉。道準笑曰。好下物也。安得不快飲滿酌。盡半以傳。諏訪直性而死。直性與圓喜皆死。高時乃自殺。從死者八百七十餘人。鎌倉滅後。於六波羅十五日。是月。長門探題北條時直。爲土居氏

得能氏所攻。航而東走。聞高時死。欲往筑紫。筑紫探題北條英時亦爲少貳貞經所攻殺。時直因貞經降。宥死歸邑。尋病死。淡河時治屯越前。阨北道。與越中守護名越時有。皆爲州兵所殺。初高時所遣高直高資等。解千窟圍。退保南都。官軍來攻。高直等削髮出降。斬于阿彌陀峰。高時子邦時。小字萬壽。高時託之五大院宗繁。卽邦時母兄也。及義貞入鎌倉。懸賞捕北條氏族。宗繁心忽變。給邦時曰。吏且來捕。宜逃伊豆。邦時宵逃。宗繁趨告義貞。吏追捕斬之。義貞疾其所爲。將誅宗繁。宗繁亡匿。時人傳之。無敢舍者。終餓死道路。泰家初名時利。稱四郎。拜左近衛將監。薙髮名惠性。義貞之

入鎌倉。泰家欲脫走。爲後圖。召親臣誠曰。度吾行遠。火第。乃爲重傷。歸鄉者狀。臥畚中。以蟻衣自覆。南部景家伊達匡衡昇之。令二卒繫新田氏號騎而前導。走陸奥。所留士火第曰。主公死矣。殘兵三百餘人皆自殺。新田氏至。以爲泰家實死。泰家畜髮更名時興。潛入京師。依權大納言藤原公宗。俱伺朝廷。時朝廷失政。天下復思北條氏舊政。於是時興與高時子時行及族時兼約。東西同時揚兵。事覺。公宗被誅。時興逃去。不知所終。

時行者高時子也。小字龜壽。稱相摸二郎。高時之逃于東勝寺也。泰家密諭諏訪盛高曰。亂敗至此。皆家兄素行所招。然

祖宗恩惠積在海內。民豈遽忘其德哉。萬壽家兄既託諸宗繁矣。汝奉龜壽以爲後圖。盛高許諾。時龜壽猶幼。從在母所。盛高往謂衆婢曰。相公欲與二郎訣。速見附。聞太郎已死。二郎亦終難免。衆婢皆泣。盛高佯怒。取之而去。奔于信濃。依諏訪賴重。建武二年。泰家使使約時行及時兼。東西同時揚兵。時行招聚黨故。旬日得五萬人。自爲上將。盛高賴重爲左右翼。進攻足利直義於鎌倉。直義大敗。時行復取鎌倉。兵勢大振。時兼亦起兵北陸。足利高氏自京師來伐。時行遣名越時基督三萬人逆擊。臨發大風發屋。兵皆避之。大佛殿殿梁折。壓死五百餘人。更卜日兼行。戰于橋本。後軍多亡。且戰且退。

阻相摸河而陣。水勢方漲。時基不設備。敵夜濟斫營。時基大敗。與三百人走歸。賴重使時行脫走。而與四十餘人。剃面自殺。足利氏至。謂時行亦死。時兼爲加賀將士所攻殺。及後醍醐天皇爲足利氏所逼。幸于吉野。延元二年。時行遣使行在上言曰。臣父伏天誅。臣不敢怨。所怨獨足利高氏。世受恩於臣家。而卒背之。今又困天子。臣願討高氏以購父罪。詔許之。以五千人發伊豆。從源顯家擊足利義詮于鎌倉。走之。追至美濃。及上杉憲顯戰于青野原。轉至和泉。及高師直戰于堺浦。顯家敗死。時行赴行在。拜左馬權頭。三年。從宗良親王至遠江。擊今川範氏兵于引馬驛。敗之。投井伊高顯。興國元年。

春高師泰來圍井伊城。至秋城陷。時行亡匿東州。正平七年。復從新田義興攻鎌倉。走足利基氏。無何義興敗走。時行匿相摸。明年見擒斬于龍口。初高時怠政。有工藤新左衛門者。屢諫不聽。祝髮隱高野。誓不復出。及北條氏滅。往弔鎌倉墟。作歌曰。赴屢佐杜能。牟加志烏美儒麼。茂等用離能。矩娑能。婆羅斗椰。於望比那沙麻之。遂周游天下。不知所終。

野史氏曰。孔子有言曰。倍臣執國命。三世希不失矣。北條氏執國命九世。何其久也。蓋泰時刻苦責躬。恭遜率下。親暱諸將。惠愛民物。孔子曰。持滿有道。豈謂此歟。時賴時宗貞時等繼之。或伸威於海表。或勞躬於理民。故大者懼其威。小者歸

其德。一人之心。雖未慊。萬民之望自足焉。鄙語曰。何知仁義。唯惠己者為有德。天下之常情也。故王家雖反正。政失其道。天下復思北條氏舊政矣。書曰。撫我則后。虐我則寇。苟知其后之非。后與非后之后。持滿之道備于此矣。抑篡弒悖逆之罪。無所逃於天地之間。自義時徙三上皇。握四海之權。至此恰百年。天降頑童。以絕其種類。幾無吹火。所謂天定能勝人。而古人稱三十年曰一世。則聖人三世之言亦驗矣。

曾我祐成

弟時致

曾我祐成。小字一萬。弟時致。小字宮王。伊豆人。伊東祐親孫也。父祐泰稱河津三郎。爲其從父工藤祐經所殺。時一萬五歲。宮王三歲。其母抱屍慟哭。顧二孤曰。汝等長大能報父讎乎。一萬泣曰。諾。一萬爲人循謹。宮王性剛悍。兄弟時或不協。母嘗予宮王一矢。曰。能折之乎。宮王折之。更予一束矢。曰。亦能折之乎。曰。不能。母曰。一矢易折。爲其少也。束矢難撓。爲其多也。故合則相保。離則俱亡。爾等兄弟無多。何不思合心報讎。乃爾相鬪也。二子泣。母亦泣。自是兄弟同心相與嬉戲。打柱射壁以擬讎。既而母再醮。曾我祐信。二孤從焉。遂冒曾我

氏。時祐經仕幕府有寵。因勸將軍誅二孤。將軍使梶原景季就祐信收二孤。母子聚泣。無所訴。終就囚。景季憐之。見將軍請哀。不聽。曰。祐親殺我兒。奪我妻。今死矣。吾欲甘心其孫。何言宥也。畠山重忠和田義盛竭力救之。乃赦之。母喜其得免。戒之自晦。一萬嘗仰見飛雁。歔歔曰。禽鳥猶有父母。使我孤者誰。宮王曰。豈謂讎首堅於鐵石乎。一萬遽掩其口曰。勿妄言。因相對泣。母聞益戒之。加一萬首服。名祐成。稱十郎。遣宮王從宮根僧行實爲弟子。而宮王復讎之志益固。將軍嘗詣宮根。宮王從僧歷問將士姓名。至祐經色動。乃懷小刀往來覘之。祐經執其手曰。汝非宮王乎。何酷肖迺父。宜速祝髮歸佛。

乘因出一裝刀授之曰。吾乃汝之從祖。聊表相見之情。宮王欲刺之。而諸士環列。恐不遂。終不果。行實命宮王削髮。宮王患之。竊歸。曾我謂祐成曰。弟如削髮。如誰人何。願兄早爲計。祐成提宮王。抵北條時政。備訴衷曲。時政壯其志。卽爲備禮。加首服爲假子。命名時致。稱五郎。歸省母。母見而怒曰。吾使汝爲僧。何遽如此。汝不母我。我何子汝。終逐之。而兄弟復讎之志益切。常游大磯黃瀨川三浦。以覘祐經。而未得間。建久四年。將軍大獵于富士野。祐經從焉。又命祐信會行營。兄弟大悅曰。天不棄我。成宿志在此行矣。將發。時致曰。弟獲罪於所恃。若不得面訣。死將不瞑。祐成入見母。叩頭爲時致謝。母

爲見之。因請賜衣。母出授之。兄弟嗚咽而去。至宮根。見行實。行實察其意。取祠中寶刀二口授之。遂抵富士野。陽爲警夜。乘間入祐經營。不在焉。兄弟彷徨不知所爲。逢畠山重忠家士本多親常。告祐經所在。祐經與吉備津祠官王藤內。招倡妓飲于別營。大醉酣寢。兄弟已入。舉炬相視曰。睡人猶死人也。因蹈席大呼曰。祐成時致報父讎。祐經蹶起。兄弟揮刀斬之。并殺王藤內。時雷雨暗黑。倡妓等驚呼。諸將倉皇出鬪。兄弟殺傷十許人。祐成爲軍人所殺。年二十二。時致直犯將軍行營。有舍人被婦人服。候時致過。自後抱之。衆共禽之。明日。將軍會諸將。召時致。命狩野宗茂。新開實光。鞠狀。時致叱二

人曰。我家衰替。不得左右幕府。雖然豈與汝輩言。幕下有問。一言而死耳。將軍壯之。親問之。時致對曰。兄弟自鬻亂至今。復讎之念。須臾無措。今志願畢矣。犯行營者。欲一謁而死耳。且祐經我之讎。而君寵之。祐親君之讎。而我祖父也。君寵我讎。而讎我祖。能無憾乎。意氣壯烈。聽者悚動。將軍欲宥之。祐經子犬房。哀訴不已。卒斫之。時年二十。有兄弟遺其母書。將軍覽之。攬淚命藏之。書庫除曾我莊祖。命祐信修二子冥福。後人爲立祠於富士野。祐泰少子爲僧。曰律師。幕府召之。至則自殺。有大礮倡虎者。與祐成相愛。諸豪競欲通慙。虎不顧也。和田義盛嘗飲其家。召虎佐酒。不出。義盛大怒。其母懼。

促虎。虎不肯曰。曾我寒士也。和田豪貴也。妾不忍以貧富易其心。義盛乃并請祐成來。然虎終宴不與義盛相酬。及祐成死。虎請行實修其冥福。手作文悼之。以祐成所騎馬視之。遂爲尼。時年十九。初居信濃善光寺。後歸大礮住高麗寺云。

源親行

藤原前主時。有源親行者。大監物光行子也。光行父豐前守光秀。嘗屬平氏。及平氏西奔。藤原能保深憎之。欲加以罪。光行入鎌倉。百方乞父命。得原。光行遂仕幕府。官大監物。親行拜民部丞。承久中。光行役于京師。兵興。屬官軍。軍敗。爲清久行盛所擒。行盛拘之而東。抵金洗澤。遣其子。聽命於北條義

時初上皇使押松齋誥入鎌倉。光行以書副之。又錄東士姓名令誘之。以故義時尤惡之。命戮之。親行聞之泣乞其命。義時不允。更守藤原實雅乞營救。終得宥死。親行躬攜赦書。竭蹶赴金洗澤。則白刃已臨頸。纔而得免。父子相抱而泣。是役也。東士屬官軍者無一人得免。而光行獨赦。時稱親行孝矣。抑亦光行嘗救其父之報云。光行有幹局。及北條泰時執權。頗見使用。

千葉時常

千葉時常。下總人也。父常秀。稱堺平次。從軍于西海。建久中。以父常胤功。拜左兵衛尉。後至上總權介。有二子。曰秀胤。曰

時常。以秀胤承家。而以埴生莊為時常食邑。稱埴生二郎。及常秀卒。秀胤奪埴生邑。時常貧甚。潛居陋巷。秀胤襲上總權介。為評定家。資富足。而斗米尺布未嘗頒賜。時常秀胤娶三浦泰村妹。及北條時賴滅三浦氏。遣兵攻秀胤殺之。時常聞變。即馳往曰。吾豈以私怨傷天倫哉。終死其難。

藤原光季 子光綱

藤原光季。不詳何許人。父朝光。稱所六郎。陸奧之役有功。朝光女為北條義時後妻。為其所任遇。三世時。朝光以善武技。與和田義盛直北面備顧問。建保之亂有功。賜常陸鹽籠莊。歷左衛門尉。檢非違使。至伊賀守。光季拜左衛門尉。檢非違

使爲人剛鯁有節概。承久元年。三世遭害。義時虞京師有變。遣光季與大江親廣鎮之。大內守護源賴茂謀叛。據昭陽舍。光季擊殲之。三年。後鳥羽上皇欲討鎌倉。召親廣光季。親廣至。上皇要盟。不得已而從之。光季先得藤原公經報。對使者曰。臣奉職巡警。頃者士馬嗷嗷。輦下不靜。臣日側耳聞之。而未嘗有詔命。今而召臣。臣竊惑焉。敢辭。再勅曰。事當面宣。未嘗有詔命。今而召臣。臣竊惑焉。敢辭。再勅曰。事當面宣。也。終不往。從者勸犇。光季曰。禍發而逃。何用鎮衛。夫仕死于職。人臣之分也。一旦奔竄。或斃道路。是自遺污辱也。不如坐待死。以明無貳。從者皆逃。留者僅二十七人。

光季子光綱。年十四。稱壽王冠者。光季謂曰。汝未仕。可以逃矣。光綱曰。大人死節。兒何敢獨去。光季喜。且日關京極二門。開高辻二門。以待官軍來攻。欲斬京極門。光季叱從者開門。左衛門尉閒野時連先登。光季射之。時連亡魂而走。檢非違使三浦胤義呼光季而責之曰。何敢敵天子。光季曰。汝誑天子倡亂。吾熟悉之。猶何敢饒舌。亦射之。胤義避易。檢非違使佐々木高重疾驅而進。光綱挾矢呼曰。君嘗冠我。約爲子婿。今送一矢以訣。射中高重胸。官軍競進。士卒皆死。獨贄田三郎及弟四郎并力拒戰。光季令火第。光綱自刺。手軟不能畫。光季曰。吾不忍委汝於敵手。斫首投之火。已亦自屠。贄田兄

鎌倉史 卷之一
弟亦死。光季遺孤四人在鎌倉。太夫人北條氏聞光季死悲之。召見遺孤慰撫曰。汝等皆做父忠貞。勿墜家聲。長曰李村。嘉祿中。賜父邑。後皆見調用。

安藤聖秀

鹽飽聖遠

鎌倉滅時。有安藤聖秀者。新田義貞妻伯父也。義貞攻鎌倉。聖秀拒之稻瀨河。軍敗而還。則府第灰燼矣。聖秀慨然曰。堂堂百年之蹤。豈可無一死節之屍乎。下馬將死。義貞及妻貽書招之。聖秀作色謂使者曰。姪士家女。為士家婦。何為此無耻之言。義貞亦不呵止之。而勸我以不義何也。以書握刀。割

腹而死。又有鹽飽聖遠者。謂其義兒忠賴曰。國亡矣。吾義當死。汝未仕。宜去為僧。修我冥福。忠賴曰。闔家保生由何人恩。在今日寧論仕不仕耶。即屠腹死。聖遠設椅趺坐。作偈曰。五蘊非有。四大本空。大火聚裏。一道清風。引領命次子忠年。斬之。忠年亦死。

野史氏曰。予編鎌倉史。以孝義終之。竊謂亂敗以戒之。不如孝義以興之。人壽不過百年。竹帛則傳之於千載。如懸明鏡而照妍媸。其孰不樂為善也。

鎌倉史卷五十 畢

あまの蔵

鎌倉史 卷之五 四十五

鎌倉の海

鎌倉史卷之十
鎌倉の海
鎌倉の海は、昔より名勝地なり。其の風景、雄偉壯麗、見るに飽かざる。其の地、古くより名産あり。其の物産、珍奇異宝、見るに飽かざる。其の歴史、悠久古く、見るに飽かざる。其の文化、栄華あり、見るに飽かざる。其の人物、傑出あり、見るに飽かざる。其の風土、人情あり、見るに飽かざる。其の歴史、悠久古く、見るに飽かざる。其の文化、栄華あり、見るに飽かざる。其の人物、傑出あり、見るに飽かざる。其の風土、人情あり、見るに飽かざる。

明治十五年十月十三日
同 十七年十月
版權免許
出版

著者 小川 弘

校者兼出版人 村田直景

監姑 牛込區神樂町三丁目二番地

上田正 庸書
宇治橋亮三

片岡藤次郎刺

鎌倉史 五三九 歳反

鎌倉史

北越小川 弘著

鎌倉史

全十冊

東京村田直景校
村田直景著

同考證

全二冊

近刻

村田直景編輯

温故叢書

第一集

既刻

村田直景著

國史圖解

全五冊

近刻

村田直景校閱

國史地名便覽

全二冊

近刻

對州山崎尚長著

日韓對照壬辰實記

全十冊

近刻

東京村田直景校

發賣人

開進堂

東京麴町區飯田町一丁目二番地

赤城廣敬

報行社

同 京橋區竹川町二十番地

竹内拙三

後凋閣

同 日本橋區通三町目四番地

小也綸叟

賣捌書肆

東京

北畠茂兵衛

東京

山中市兵衛

同

丸屋善七

同

出雲寺万次郎

同

北澤伊八

同

稻田佐兵衛

同

柳河梅次郎

同

原亮三郎

同

東生龜次郎

同

穴山篤太郎

同

中島信一

同

深野彌兵衛

鎌倉史

五志卷反

金倉史

東京	同	同	同	大坂	同	同	西京	名古屋	仙臺	
淺倉久兵衛	岡村庄助	青山清吉	巖々堂	大野木市兵衛	柳原喜兵衛	吉岡平助	岡島真七	村上勘兵衛	片野東四郎	菅原安兵衛
東京	静岡	甲府	神戸	長寄	加州金澤	越後新潟	同	同長岡	同高田	同水原
磯部太郎兵衛	本屋市藏	内藤傳左衛門	鳩居堂	鎌田勘次郎	近田太平	小林二郎	井筒駒吉	鳥屋十郎	本多勝三郎	島屋六平

